

Борьба корьга



6.2018

Эжва нөрысöй

ссыланкыв

Война ыпнитан лунъясö кывтіс
Эжва ю кузя юсь-пароход.
Ссыліс ышöдан, збой ссыланкывъяс
Шырöм юрсиа нюмсера морт:

Припев:
«Эжва нөрысöй,
Слөбöда керöсöй,
Коми муанöй
Да-й лöz Парма-вөр.
Ставöн ми
Рытыввывланьö тэрмасям,
Вөрөгöс вötлам
Да бергöдчам бөр».

Повтöм сьölöмсö тöдісны асьныс,
Тырмас вын, врагöс вötлыны мед.
Биö пырнысö ставöн дзик дасьöсь,
Кötь и бөрсö оз быдөн сесь пет.

Припев.

Зонъяс дорйисны пармасынь ылын
Чужан Слөбöда и Эжва ю.
Налысь подвигсö ошкана кылөн
Талун донъялö став Коми му.

Припев.

Найöс нимöдöм содö и паськалö,
Кольöм вояслөн турöб оз гарт.
Усьöм зонъясöс сьölöмсянь казътылö
Слөбöда местаö кыпалöм кар.

ПЕТӦ 1926 ВОСЯНЬ

ЛЭДЗӦНЫ: КОМИ РЕСПУБЛИКАСА ЮРАЛЫСЬЛӦН АДМИНИСТРАЦИЯ,
КОМИ РЕСПУБЛИКАСА ГИЖЫСЬ КОТЫР

ВОЙВЫВ КОДЗУВ



ISSN 0134-4323

БЫД ТӦЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

6 (858) ЛӦДДЗА-НОМЪЯ (ИЮНЬ) 2018

ТАЙӦ НОМЕРЫН:

В.Е. НАПАЛКОВЛЫ — 80

Чолӧмалам!	3
Виктор НАПАЛКОВ. Литератураӧ воськовъяс	4
Виктор НАПАЛКОВ. Ульяна. Романысь юкӧнтъяс	13
Александр ШЕБЫРЕВ. «Тшайподасис луныс». Кывбуръяс	37
Альбина БУШЕНЕВА. Медся бур зять. Праздникъяс. Лӧбӧны уткаяс. Висьтъяс	42
ЗАРНИ ЛЮСЯ. Нюмтӧвти сьӧлӧм. Кывбуръяс	55

ВОЯС ДА ЙӦЗ

Олег УЛЯШЕВ. Мый вӧлі сӧ кызь во сайын	58
Игорь ЖЕРЕБЦОВ. Мый эськӧ вермис лоны...	65

ЫДЖЫД ВОЙНАЛӦН ЙӦЛӦГА

Александр УЛЬЯНОВ. Ылі Австрияын, война помас...	71
Аделина ИГНАТОВА. Фронт вывсянь фронтӧ	75

ВУДЖӦДӦМЪЯС

Елена ГАБОВА. Содтӧд жыр. Висьт	77
----------------------------------------------	----

Обложка вылын: Вомын сикт, Кӧрткерӧс район, Эжва ю дорын.
Снимокыс **Ксения Мартюшевалӧн.**

12+

© «Войвыв кодзув» («Северная звезда»), 2018 г.

СЫКТЫВКАР

СЕВЕРНАЯ ЗВЕЗДА



*Ежемесячный
литературно-художественный
журнал*



Учредители:

АДМИНИСТРАЦИЯ ГЛАВЫ РЕСПУБЛИКИ КОМИ

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ
ОТДЕЛЕНИЕ ОБЩЕРОССИЙСКОЙ ОБЩЕСТВЕННОЙ ОРГАНИЗАЦИИ
«СОЮЗ ПИСАТЕЛЕЙ РОССИИ»**



Издатель:

АУ РК «ИЗДАТЕЛЬСКИЙ ДОМ КОМИ»

ДИРЕКТОР ПЛЕТЦЕР Е.В.



РЕДАКЦИОННАЯ КОЛЛЕГИЯ:

Главный редактор

ПОЛУТРУДОВ А.В.

Ответственный
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.



Чолөмалам!

Медводдза кывбурсө Виктор Напалков йөзөдлөма 1956 воын Кулөмдін районса «Ленин туйод» газетын. Сэсянь визувтис уна ва. Гижысьлөн петис кывбуръяса да проза гижөдъяса дас көкъямыс небөг, на пиын: «Утка туй», «Войся ангел», «Йөг каллян», «Лэбёны вояс».

Комын вит во Виктор Егорович уджалис радио-телевидениеын, «Би кинь» да «Войвыв кодзув» журнал редакциясын. Нэм чөжыс уна вын пунктис национальной литература да коми кыв сөвмөдмө. Колө пасыны, мый Виктор Егорович кодь мортмыс гежөд — сылы некор нинөм абу веськодь. Быдтор вылө эм аслас видзөдлас. И тайөс сийө оз дзев, а висьталө веськыда. Тиөкыда юксьө аслас мөвпгясөн лыддысьсыськөд, йөзөдлывлө «Коми муын» да «Войвыв кодзулын» вель ёсь статьяяс. Вермас ошкыштны, вермас и дивитыштны. И век нин висьталас, кыдзи бурджыка котыртны газет-журналын уджсө, кыдзи сөвмөдны литература, казялас, кутшөм шыбөльяс эмось литературной оломын. Став тайө критической видзөдласыс отсалө сылы и гижөдъясас восьтыны мортлысь мөвпалан серсө, обществолысь оланногсө, и дерт, кужөмөн артмөдны кывбур-прозасө художество боксянь.



Аслас чужан грездын, Кулөмдін районса Джеджимын, Виктор Напалков котыртис библиотека-музей (3 сюрс книга чукөртөма татчө да уна экспонат), и талун эм позянлун лыддысьсысьлы волывлыны тайө керкаас, төдмасьны литература-өн да этнография материалгясөн, быдтор йывсьыс сёрнитны гижыськөд. Збыль, тайө зэв ыджыд козин сиктса войтырлы Виктор Егоровичсянь. Татшөм кыпыд лола йөзсяныс и пестысьлө войтыр сёлөмын, челядь мывкыдын кыв да культура дорө муслуныс.


Ми сиам шань мортлы, ыджыд таланта гижысьлы уна вын да эбөс, дзоньвидзалун да творчествоын выль вермөмгяс! Кузь нэм да бур шуд, Виктор Егорович!

Коми Республикаса гижысь котыр,
«Войвыв кодзув» журнал редакция.



Литературао воськовъяс

Медводдза стихъясöс (тадзи сэк шулісны) менсьым йöзöдісны Куломдін района «Вөр фронт» да республикаса «Коми колхозник» газетъясын. А «Войвыв кодзулын» медводдзаысь петіс кывбурöй буретш 60 во сайын — 1958 воын май тöлысся номерын. Со сійö кывбурис:



Варышлön жалиттöм гыжйö
Сюрöма ичöтик колип.
Выныд кө абу — он пышйы,
Кымын здук овнысö колис?

Киясöй овлöны чождöсь:
Лыйывла уръяслы синмö.
Талун жö мыйлакö повзи —
Друг да... А друг да ог инмы?

Некор дыр думайтны сэнi,
Варышöс пищальысь лыйи...
Аттö кыв висьтавлö меным
Колипкai, енжын сылыг.

Редакторалис сэк нималана гижысь Яков Рочев. Редколлегияö пырисны лыддысьысь-яслы бура тöдса авторъяс: И.Вавилин, А.Вежев, С.Попов, Г.Торлопов, Г.Фёдоров, В.Юхнин. Ме öни листала 64 лист бока тайö журналсö и ог вермы торйöдчыны. Окота лыддыны сэтгысь став гижöдсö. А сэнi йöзöдöма романысь юкөн,

висьтъяс (верстыöлы и челядылы), кывбуръяс, серамбана гижöдъяс, эм и публицистика, критика да библиография, редакцияö письмöяс, пытшкөсса корка вылас вель сыланкыв. Дженьыда кө: йöзöдöма гижöдъяссö 22 авторлысь.

Квайтымын во сайын жö, 1958 вося сентябрын, муніс Коми АССР-са писательяслön медводдза съезд. Корлісны сэтчö и менö, кызди том авторöс. Сэксянь кути тöдны став коми гижысьсö. Локтан вонас, июлын, Сыктывкарö чукöртлісны том авторъясöс вежонся семинар вылö. Колис кад, и на пиысь öтияс лоисны республикаын нималана прозаикъясөн, мöдъяс — поэтъясөн. Август тöлысся номерсö «Войвыв кодзув» сиис томъяслы. Гижöдъяснымöс йöзöдіс портретъясөн.

1962 волön март 6 лунся «Югыд туй» газетысь медводдзаысь аддзи ас йылысь гижöд, ассьым вель ыджыд снимок да куим кывбур — ставсö найöс босьтöма öтувъя кытшö и йöзöдöма



«Бур туй, Виктор!» юргижөд улын. «Став сьолөмсянь сиам том поэтлы шуда творческой туй!»— тадзи помасьö ме йылысь гижöдыс.

Со тадзи ме вöчи литератураö медводдза воськовъяс. А олөмсö бурджыка тöдны меным отсаліс журналистикаын нэм чöж уджалөмöй. Казьтышта: 1959 вося январын вöлі Коми АССР-са журналистъяслөн медводдза съезд. Кызди активной селькорöс сэтчö корлісны и менö. Докладсö вöчис В.Н.Сельков — «Коми колхозник» газетса редактор. Колисны вояс, и арлыдъясным вылө видзöдтөг, Василий Никитичкөд ми лоим бур ёртъясөн.

Сійö жö вося гожөмнас коми газет вежис нимсö, лоис — «Югьд туй». Воськөдлысьнас индісны А.Д.Лыткинöс, коді журнаöдіс тшöтш и Коми АССР-са журналист котырөн. Öтиысь воис командировкаö Кулөмдинö, кежаліс и районаса «Ленин туйöд» газет редакцияö, көні ме уджалі кывкутысь секретарөн. Авив Дмитриевич сэки и вöзйис пырны менö странаसा журналист котырö, висьталіс, кутшөм документъяс колöны. И со ветымын нель во нин ме СССР-са, сэсся и Россияса журналистъяслөн Союзын.

Журналистика да литература быттö кык чой — найö торйöдны позьтөмөсь. Республикаса коми кывъя газеткөд йитöдъясöс ме кута 62 во нин. Тайö каднас сы лист бокъясын менсьым йöзöдісны уна кывбур, повесътъясысь да романтъясысь юконтъяс, коми литература йылысь мөвпъясөн юкси матö ветымын публицистической статьяын. Уна вöлі йöзөдöма и лыддысьысьясынь письмөяс, көні найö донъялöны менсьым творчествоöс — унджыкыс ошкана. Бадъяльскса олысь Е.Е.Уляшев асьыс письмөсö помалöма меным сійөм «Дыр на ов, йöзлы ков!» кывбурөн:

**Дыр мед вöльнöй светас олін,
Пыр мед коми йöзлы колін.
Тэнад аслад гижан ордым,**

**Гожъян Джеджим-парма ордын.
Паськыд войвыв муным — Коми,
Тэно лыдьям пöрысь, том и.**

Медводдзаысь меным воём письмояссö «Коми му» йöзöдiс быдса лист бок 1991 воын, май 16 лунся номерын. Ог ошйысь, шуа збыльтор: менам кывбуръяс, повесытьяс да романъяс йылысь газетын петiс лыддысьысьяслөн сы мында статья, мыйта эз пет ни öти мöд коми авторлөн гижöдъяс йылысь!



Сэтшöм статьяяс: «Кöнöсь тi, талантъяс?», «Коми лыддысьысьыд талун тшыг нисьö пöт», «Пыдди-ö пуктам ёрта-ёртöс», «А-у! Кöнi тэ, том прозаик?» да мукöд кыпöдлiсны вен литераторъяс пöвстын; мыжавлiсны менö — уна пö кулитчан, а ошкöмыс этша. Кадыс петкöдлiс: кызди гижлi, сiдзи и лоис. Кызь во мысти бара на окота юавны: кöнi тэ, том прозаик? Киссис Коми издательство, йöз кöдзалöны ас кывъя литература дiнö, вежöртö гильöдана коми небöгъяс оз петны. Литератураным пакталö шондi водзын ва гöп моз.

Кольöмвоя январын «Коми му» йöзöдiс менсьым «Кöрлөн кольö сюрис, гижысьлөн — гижöдъясыс» статья. Куим лист бок вылын помсянь помöдз сёрниыс мунiс сэн талунъя литература йылысь. Ок, уна звöнок вöли мен — кызвыныс ошкана. Öти журналистсянь вöли татшöм звöнок: «Этатшöм кузь статьяын сэтшöм этша критикаыс... А öд киö босьтана коми книга талун он аддзы...» Со и гижыссянь звöнок: «Ме дась кырымасыны тэнад статьялөн быд строка улö. Гижа газетö вочакыв...» Колис лун-мöд, и бара сысянь звöнок: «Напалков, извинит, вежсис думöй: статьятö шуи не гижны. Гижа кö, ни премиятö, ни почёт нимтö мен оз сетны...» Нöшта öти звöнок, кылiс мужичöйлөн скöр гöлöс: «Мыйла öтиясöс, на лыдын и талантöмъясöс да мывкыдтöмъясöс, лэптiсны енежöдзыс, а збылысь енбиа авторъясöс кедзөвтöны?» И вайöдiс примеръяс. Ме кори тайö юалöмнас шыöдчыны литература туялысьяс дiнö. Мортыд, кылö, помöдз дöзмис: мöдöдiс менö «ылöджык»...

...Комын вит ар тыригкежлӧ ме ачым аслым вӧчи козин — гижы повесът и пыртӧ «Войвыв кодзулӧ». Редакторалис сӧк Иван Торопов. Тӧлысь-мӧд мысти «Молодёжь Севера» газетысь казялі Владимир Ширяевлысь статья: «Мый лоӧ йӧзӧдӧма «Войвыв кодзув» журналын локтан во?» Аддзи сӧсь и ассыим нимовӧс. Журналлӧн июль тӧлысья (1974 во) номерыс вӧссис менам повесътӧн. Шусис сійӧ — «Козьнав мортлы муслун». Йӧзӧдісны кык номерын. «Войвыв кодзувлӧн» тиражыс сӧк вӧлі сизим сюрс сайӧ экземпляр. Владимир Ширяев, кодӧ редакцияс уджаліс кывкутысь секретарӧн, сетіс мен совет: эн пӧ энӧвтчы проза гижӧмысь, и шуис повесътсӧ ошкана кывъяс.

Ме думысь, коми литератураным медъюгыда сӧвмис 60–80-ӧд воясӧ. Сылӧн сӧвмӧмыс буретш да петкӧдчис «Войвыв кодзувлӧн» лист бокъясын. Комиӧн сӧтчӧ гижысьыс вӧлі морт нелямын — прозаикъяс, поэтъяс, журналистъяс, литературоведъяс, критикъяс, чужан му туялысьяс. Йӧзӧдісны и лыддысьысьяслысь письмӧяс. Ас кывъя журналсӧ медъёна радейтісны Эжва катыдын. Со мый пасйыліс «Югид туй» газет: «Кулӧмдін районса олысьяс ёна радейтӧны коми литература да национальной искусство. Та йылысь висьталӧ кӧть нин сійӧ, мый «Войвыв кодзув» журнал вылӧ 1972 во кезлӧ районын гижисны кык тысяча сайӧ морт».



1971 вося декабрын Кулӧмдін районын муніс ыджыд гаж — вӧліны коми литература да искусство лунъяс. Ветлісны сӧтчӧ Яков Рочев, Геннадий Фёдоров, Серафим Попов, Иван Изъюров, Геннадий Юшков, Иван Торопов, Василий Кривошеин, Владимир Безносиков, Иван Коданёв, Владимир Попов, художник Рем Ермолин, композитор Яков Перепелица, сьылӧм да йӧктӧм кузя Коми АССР-са Государственной ансамбльысь артистъяс, музыкальной театрса солистъяс, драматической театрса том артистъяс. Гижысьяс асланыс бригадаӧ босьтісны и менӧ. О, Ен-

мөй! Мыйта вөлі гажыс районса гырысь и ичот сиктъясын — Кулөмдінын, Помөсдінын, Пожөгын, Керчомъяын, Мысын, Донын, Аныбын, Немдінын... Гижысьяс нуөдісны творческой адзысьлөмъяс, артистъяс петкөдлісны спектаклясысь юкөнъяс, сылісны-йөктісны. И быдлаын юргис мича коми кыв.



Көть и колис нин уна во, паметьын олө татшөмтор. Мыс сиктө мунны өти машинаө веськалім Серафим Попов, Иван Изъюров, Владимир Безносиков да ме. Кулөмдінсянь Мысөдзыс сө верст, вөлі кадыс и сёрнитны, и шмонитны. Онөдз кыла Серафим Алексеевичлысь гөлөссө: «Виктор, тэнад ставыс на водзын... Сөмын эн сетчы юөмлы!» Талун ме, морөсын пернаа көкъямысдас арөса коми гижысь, ставлы кывмөнъя юрта: «Комын сизим во нин эг ньылыштлы вина-водка!»

Колө төдчөдны: коми литература да искусство лунъяссө Кулөмдін району вөлі нуөдома Коми АССР-са писательяс Союзлөн водзмөстчөм серти. Сійө воясас коми гижысьястө зэв на пыдди пуктылісны и республикаөн веськөдлысьяс, и лыддысьысьяс. 1968 восянь медбур гижөдъясысь авторъяслы кутісны сетны государственной премияяс, унаөн лоисны культураса за служеной уджалысьясөн, 1984 восянь — народнойясөн. Коммунизм стрөитан кадө Коми АССР-са Верховной Советө депутатөн веськавліс и коми писатель. Но, кор заводитчисны демократической бөйысьөмъяс (1990 вося март), депутатлөн мандат эз нин вичмыв ни өти коми гижысьлы. Босьтчылөмыс вөлі уналөн, но весьшөрө.

А ме водзө гижы и кывбуръяс, и проза. 1975 воын издательство лэдзис ичот классын велөдчысьяслы мича серпасъяса «Миян Пиля дед» кывбура небөг — тиражыс нель сюрс экземпляр. Кык во мысти петіс вель сборник, кытчө вөлі пыртөма 55 кывбур. Донъялөма (рецензируйтөма) пөшти быд кывбур Серафим Попов менө ошкана-ышөдана кывъясөн. Рецензиясө ме видза гортса архивын.

Коми гижысьясөс быдтысьөн пыр вөлі «Войвыв кодзув».

Быд автор ассыс медводдза гижодъяссё йозодліс сылөн лист бокъясын. А йозодны-ё — донъявліс да шуліс бөръя кывсё авторитета редколлегия. 1979 воын ме гижі поэма, а вöзйыны журналö мыйлакö полі. Век жö, збоймöдчи да, шуи медводз петкöдлыны Геннадий Юшковлы. Сэк сійö юрнуöдіс Коми гижыс котырöн, вöлі тшöтш и редколлегияын. Пасибö Геннадий Анатольевичлы, коді лыддьöма и пасйöма: «Поэмаыс ньöти абу öтдортана, колö сетны журналö. Ген. Юшков».

Помнита редколлегиялыс заседанииö — донъялісны 1980 во февраль тöлысся номерö гижодъяс. Редакторлөн пызан сайын пукаліс Пётр Шахов, сыыс öтдор — Альберт Ванеев, Михаил Игнатов, Нина Куратова, Владимир Попов, Серафим Попов, Степан Раевский, Иван Торопов (редакторöс вежыс), Геннадий Юшков. Номерын ыджыд статья лöб сйöма Усть-Сысöла сиктлы кар ним сетöмсянь 200 во тырöмлы. Лöö йозöдöма Сыктывкарöс Трудöвöй Краснöй Знамя орденөн наградитöм йылыс СССР-са Верховнöй Совет Президиумлыс Указ. А восьтыны шуисны журналсö менам «Туйвежъяс» поэмаөн. Сёрнитісны ставөн, и быдöнсянь кылі бур кывъяс. Сöмын Степан Семёнович вöзйыліс шуны гижöдсö кывбуръяса повесътөн. Но поэтъяс тшöктісны шуны поэмаөн.

И сідз, «Туйвежъяс» поэма, көні 700 строка, пегіс «Войвыв кодзувлөн» 14 лист бок вылын. Та бөрти поэмасö вöлі йозöдöма комиөн да рочөн нöшта квайтыс. Роч кыв вылö вуджöдліс



ленинградса поэт Николай Малышев.

Век жö, вель уна авторöс майшöдліс со мый. Сьöкыд вöлі веськавны странаса гижысъяслөн котырö. А абу кө гижысълөн билет, пöрысöдз верман кольны том авторөн. Сэтшöмъясөн и колісны прозаикъяс Иван Куданёв, Василий Торопов, поэтъяс Василий Власов, Александр Мальцев... Шуны кө ас йылыс, СССР-са писательяс Союзö пыригөн менам вöлі нин йозöдöма журналын вит повесът, кык поэма, лэдзöма Коми издательствоөн кывбуръяса да прозаа вит небöг.

Буретш да авторъясӧс писательяс Союзӧ примитӧм йылысь ыджыд сёрни кыптыліс 1988 вося декабрын Коми АССР-са гижысьяслӧн кӧкъямысӧд съезд вылын. Сэтчӧ волісны Москва да мукӧд республикаса гӧсьтъяс, партия обкомса да совминса чинаяс. Эз коль веськодъӧн тайӧ проблема дінас КПСС обкомса первой секретар В.И.Мельников. Съезд вылын сійӧ шуис: вет-



лыны пӧ, тыдалӧ, ковмас аслым Москваӧ и тӧдмавны, мыйла коми литераторъяс оз веськавны Союзӧ. Со мый вочавидзис Россияысь писательяслӧн Союз правленияса секретар, приёмной комиссияса юралысьӧс вежысь М.Годенко: «Ми некор эг тупкылӧй приёмной комиссиялысь ӧдзӧссӧ налы, кодъяс волісны дорйыны ассыныс авторъяссӧ. Мӧдарӧ, татшӧмторсӧ ми сӧмын ошкам. Вольвлӧны быд автономной республикаысь, дорйӧны ассыныс рекомандуйтӧм гижысьяссӧ, а Комиысь — оз!»

Вӧлӧмкӧ, кымын этшаджык Союзаса членыс, сымын кокныдджыка позьӧ нажӧвитны премияястӧ да почёт нимъястӧ, некутшӧм маньбатӧг лэдзны небӧгъястӧ Коми издательствоын. Но кымын водзӧ, пыр ёнджыка усис коми книга діно йӧзыслӧн интересыс. А критикъяс да литература туялысьяс ӧтарӧ ошкисны ӧти и сійӧ жӧ авторъясӧс. Ӗжмысдасӧд вояс заводитчигӧн буретш налысь медуна инасьтӧм книга вӧлі гуалӧма Кӧччойягӧ! Зато талун гуавны нинӧм. Гӧль талунъя коми литератураным коми прозаӧн. Некор эг чайтлы, мый республикаын коляс... куим прозаик! Со найӧ: Алексей Попов, Александр Ульянов, Иван Ногиев. Сэсса дум вылӧ некӧд эз усь.

Кывбуръяс медясӧ гижӧны аньяс — томӧсь, рочакань кодъ мичаӧсь, уна велӧдчӧмаӧсь, гижысьлӧн билетаӧсь; кӧть и шочника, лэдзӧны небӧгъяс. Но овлӧны коми мортлы гӧгӧрвотӧм кывбуръяс — рифмаа кыв чукӧръяс, кысь он аддзы ни социальной, ни нравственно-моральной проблемаяс. Татшӧм кывбуръяс дінад йӧзыс кодзалісны дзикӧдз. Он эскӧй? Волӧй сиктса библиотекасясӧ — сәні висьталасны. Коми поэзия тӧщаммис пытшкӧснас медясӧ бӧръя кызь воӧн. Со кутшӧм письмӧ йӧзӧдліс ӧти газет: «Я — давний читатель журнала «Войвыв кодзув». И хо-

чу со всей откровенностью сказать, что некоторые напечатанные в журнале стихи и стихами-то назвать трудно. Это просто рифмованные строки, непонятно, во имя чего написанные...»

Ассиянь вöзъя: гижöй сідзи жö гөгөрвоана, кызди гижлісны и öні гижöны Андрей Дементьев да Геннадий Юшков, Лариса Рубальская да Александра Мишарина, Василий Лодыгин да Николай Рубцов, Виталий Уляшев да Виктор Кушманов...

1986 вося июльын котыртчис посни челядылы «Би кинь» журнал, кытчö индісны менö кывкутысь секретарөн. Сэні квайт во уджалом бöрын, 1992 воын, вуджи «Войвыв кодзулö». 1993 вося декабрын вöлі Коми Республикаса гижысьяслön öкмысöд съезд, көні менö бöрийсны правление составö. Вит во мысти петі пенсия вылö.

Водз тулыссянь сёр арöдз ола чужан пельöсын — Куломдін районса Джемжим сиктын, аслам лыддысьысьяс пöвстын. Менам да менам гöтырлön, Наталья Васильевналön, водзмöстчöмön да районса администрация отсöгön сэні лои стрöйтöма коми культура шöрин, көні эм библиотека да музей, жытник, вöралан керка, беседка-лэбув, садитöма пуяс. Волывлöны экскурсияөн оз сöмын район пасьталаысь, но и республикаысь; овлöны уна сикас аддысьлöмъяс, көні зэв восьсөн сёрнитлам и талунъя



коми литература йылысь. Шöрин йывсьыс уна гижисны «Красное знамя Севера», «Республика», «Трибуна», «Коми му» да «Парма гор» газетъяс.

Пенсионералігөн нин ме гижы вит роман, öти повесыт, вель уна кывбур да статья. А вынсö сетöны мен чужан сиктöйлön вөр-ваыс, сынöдыс и енэжыс, шань сьölöма войтырыс.

**Чужан сиктöй — кага потан,
Чужан сиктöй — бытö рай,
Эжва шлывгö паськыд ота,
«Öввö» сьылö колипкай.**

Ас нэмö гижи вель уна, но, пöжалуй, ог вермы шуны ассым творческöй туйöс тырвуйö шудаöн. Квайт во сайын ме помалі гижны «Йöг каллян» роман. Чайтлі, арлыдöс босьтасны тöд вылö и регыдъя кадöн лэдзасны торъя небöгöн, но эскöмöй лои весьшöрö. Тыдалö, найö, кодъяс веськөдлöны коми литература-öн, оз чайтлыны пöрысьмыны. Ми и сідзи нин этшаöнöсь, колö пыдди пуктыны öта-мöдöс, öтвылысь кыпöдны ас кывъя литературанымöс. Кызь вит во сайын нин «Коми му» газетын Г.А.Юшков пасйыліс: «Колö ньöти нюжөдтöг лэптыны коми литературанымöс. Дерт, огö кө ми көсйöй, мед кывтöм пемöсö пöрис коми войтырыс». Коми классиклөн кывъяс дінö содтыны нинöм.



Аслам чужан лун кузя «Войвыв кодзулö» вöзъя «Ульяна» выль романысь некымын юкөн.

Снимокъяс вылын:

1. Виктор Напалков.
 2. Шуйгавывсянь: Пётр Шахов, Виктор Напалков, Николай Щукин да перым-коми гижысь Михаил Вавилин (1960-öд вояс).
 3. Том гижысьяслөн семинар. Шуйгавывсянь: Виктор Напалков, Леонид Огнёв, Юрий Васютов, Семён Кынев (Сыктывкар, 1960-öд вояс).
 4. Том гижысьяслөн семинар. Шуйгавывсянь: Николай Щукин, Семён Кынев, Виталий Куратов, Виктор Напалков, Леонид Огнёв, Владимир Безносиков, Изосим Туркин, Иван Симпелев, Александр Ганов, Александр Урнышев (Сыктывкар, 1960-öд вояс).
 5. Пединститутса да СГУ-са студентъяскöд аддзысьлöм. Виктор Напалков да Валерий Мартынов (Сыктывкар, 1974 во).
 6. Шуйгавывсянь: Геннадий Фёдоров, Герман Ходырев (удмурт гижысь), Виктор Напалков, Владимир Дёмин.
 7. Гижысь котыр, «Войвыв кодзув» да «Би кинь» журналса уджалысьяс Виль во водзылын. Шуйгавывсянь пукалöны: Елена Габова, Елена Козлова, Елизавета Киселёва, Надежда Белых, Лидия Ситкарева, Надежда Панева, Валентина Иванова; сулалöны: Виталий Осипов, Егор Рочев, Пётр Шахов, Владимир Тимин, Юрий Васютов, Алексей Одинцов, Виктор Напалков, Владимир Попов, Николай Белых, Юрий Ионов.
 8. Виктор Напалков гöтырыскöд, Наталья Васильевнакöд.
 9. Джеджимын.
- Снимокъясыс В.Е.Напалковлөн гортса архивысь.



Ульяна

РОМАНЫСЬ ЮКӢНЪЯС

* * *

Вый войталан лун — джуджыд лӧз енэжас дзирыд шоңди, дзользысь лэбачьяслӧн гӧлӧса, сир дукӧн ымралысь сынӧда. Гожйӧдчӧ парма-вӧр. Гожйӧдчӧ Сосновка посёлок. Во кӧкъямыс сайын кӧ тані вӧлі пожӧма яг, ӧні — механизируйтӧм ыджыд вӧрпункт.

Коми муын, тшӧтш и Эжва катыдын, медводдза посёлокъясыс чужисны комынӧд воясӧ на, кор войвылӧ кутісны вайны страна пасьтаысь сідз шусяна спецпереселенецъясӧс. Сэсся выль и выль йӧз ыльӧбтісны война кусӧм бӧрын. Нефтьӧн, газӧн, из шомӧн, вӧрӧн озыр республикаӧс шуисны ставсоюзса тюрмаӧн, ссылка местаӧн. Серпасыс вежсис Сталинлӧн кувсьӧм бӧрын. Водзті мыжавлӧмъяс пӧвстысь унаӧн лоисны коммунистъясӧн, Сӧветъясса депутатъясӧн, предприятиясса веськӧдлысьясӧн. Ӧтияс мунісны чужан муаныс, мӧдъяс кольччисны Комиӧ. Спецпосёлокъяс пыдди кыптісны выльяс — прӧстӧ посёлокъяс.

Эжва катыдын ыджыд промышленной предприятияс эз вӧвны, медся ыджыд озырлуныс сәні — вӧр. Сикт-грездъясын олысьяс, медсясӧ пашпорттӧм колхозникъяс, вӧліны крепостной крестьяна кодӧн. Вӧдитісны найӧ видз-му, ӧтувъя овмӧсын мырсьывлісны атшавмӧнныс, но олісны гӧля, трудоденьясыд йӧзсӧ эз кӧмӧдны-пасьтӧдны. Война воясӧ унаӧн кувсисны тшыгла. Ок-ок-ок! Абу вежалана олӧмыс коми крестьяниныдлӧн. Тужанужаыс крестьяниныдлы вичмыліс и война бӧрын. Унаӧн, кодъяс вермисны, пышійсны вӧрпунктъясӧ. Пышійсны медсясӧ челядя дӧваяс, кодъяслӧн верӧсьясныс усисны война вылын. Тӧщӧ трудодень вылад эз вермыны велӧдны ныв-писӧ техникумъясын да институтъясын. Да кодсюрӧ мунісны ремесленной училищясыс, босьтісны рабочей профессияс.

Талун сюрс ӧкмыссӧ ветымын кӧкъямысӧд вося июль квайтӧд лун, вӧскресеньӧ. Арсентий Павлович Русинов, коді Архангельскса лесотехнической институт помалӧм бӧрын воис Сосновка вӧрпунктӧ, вӧлі отпускын и лӧсьӧдчис ветлыны Ыжманьюӧ вуграсыны. Леспромхозса директорлысь вӧзйысис буретш тайӧ посёлокас, кӧні оліс да уджаліс мамыс, Степан Анна.

— Вапӧлсянь воліс Матвей чожды. Чоя-вока ӧна и варовитім, гажным бырӧма да,— висьтасис мамыс. Нелямын куим арӧса Степан Анна абу на воштӧма томдырся мичсӧ, кӧть и вуджис сьӧбкыд олӧм: шыльыд банбока, абу на чусмӧмаӧсь смоль сьӧд синъясыс, сӧмын тай смоль сьӧд юрсисӧ визйӧдлыштӧны эзысь сіяс.— Вичмӧд кад да кайлы чужан сиктад, пӧчыд пӧ тәнӧ зэв ӧна виччысьӧ,— энькасӧ, Пульхерияӧс, казътыштіс Анна.

Сизимдас куим арөса Пульхерия олө нучкаыскөд, Кристина-көд, коді дас класс бөрын велөдчис карса медучилищын да фельдшералө чужан сиктас. Верөс сайын. Пөчыс и видзө каганысө.

— Төлысь помас ме пета удж вылө, вевъяла на ветлыны Ва-пöлад.

— Ветлы, дитя, ветлы. Сэні миян став рөдвужным, ловъяис и кулөмаыс. Ыджыд мамыд и, ыджыд батыд и, Модест чожды и — ставныс орччөн куйлөны кладбище вылад. Пөльыдлөн неуна боқынджык гуыс. Модест чождыдысь Ленасө важөн нин эн ад-дзыв?

— Во кык.

— Арсень, ті жө сыкөд воча чоя-вока. Льөмдінад ветлігъясөн мыйла он пырав сы ордө? Матвей воклы норасьөма, Арсень пө менө боковөй туйө пуктө.

Елена Модестовна, кыдзи и көсйысыліс челядьдырйиыс, ма-мыс моз лоис велөдысьөн. Уджалө Льөмдінса шөр школаын. Верөсыс милицияса капитан, гозъя быдтөны кык нылөс. Эз нин көсйы да юаліс Анна:

— Альбинаыдкөд сэсся тиян нинөм эз и артмы?

— У-у! Сійө кор нин вөлі... Школаын велөдчигөн, челядьдырся ышмөм.

— Тэныд ышмөм, а Альбинаыдды вот и абу ышмөм. Кодкөлун Льөмдінын аддзысьлі сыкөд, раймагын вузасьө. Зэв мичаник, сибыд ныв. Кудритөма юрсисө да дзик артистка кодь.

— Төда, мам. Кооперативнөй техникум помавліс.

— Юалі да, верөстөм на пө. Виччыся пө, кор менө коравны локтас Арсень Русинов.

Альбина Канева да Арсентий Русинов төдмасисны сэк, кор зонка локтіс велөдчыны Льөмдінса шөр школаө, көкъямысөд классө. Гожся каникулъяс дырйи Арсень нуөдмывліс Альбинаөс Сосновка гөгөрсә ягъясө вотчыны. Льөмдінсянь поселокөдзыс верст нель, сөмын Эжва сайын-а. Дасөд классын велөдчигөн колльөдчывлісны и окасьлісны, сэсся туйясныс торъялісны.

— Мам, корасьны ог на көсйы. А өні ме муні Ыжманъяюө юквала.

— Мича луныс, ветлы, шойччы. Дядьыд ыжъяслы да көзаяслы вөр бокъясысь турун ытшкыштны муніс.

Ыжманъяю чукольсь-мукольсь, өтар берегыс кө джуджыд кыръя, ыжман кустъяса, мөдарыс — лажмыд, неыджыд лыа көсаа. Эмөсь вабергача йиръяс, кытысь школаын велөдчигөн на Арсень вугравліс комъясөс. Вөрсә векныдык ордым кузя Арсентий восьяліс ю катыдлань, поселоксянь верст кымын и муніс. Бөрсө лэччигмоз кутас и гождьодчыны, и купайтчыны, и вуграсьны. Татчөс вөр-ваыс нинөмөн эз торъяв Вапөл гөгөрсә вөръясысь. Тані кодь жө ягъясө ыджыдджык чойыскөд, Кристи-накөд, ветывлісны тшак-вотөсла. Некор оз вунны Арсентийлөн война кадся да войнабөрсә тшыг воясыс. Нэм помөдзыс Арсен-тий кутас казътывны медбур кывъясөн пөльсө, Як Петырөс, коді Русиновъяслөн семьяысь некодлы эз сет кувны.

Арсентий веськөдчис ю берегань, лыа вылас пөрччысяс и гождьялігмоз кутас вуграсьны. Кыр бокшаөд лэччигөн казяліс:

ю дорышас сулалі пасьтём нывбаба — еджыд трусика, еджыд липа, мыш вылас лэзьгөдөм еджыд кузь юрсиа. Сулалі шонді-ыслы паныд, кияссө бек вылас кресталөмөн. Медым эз повззы нылыд, Русинов некымынысь кызөктіс. Ляа вылас чөвтис вугыр шатинсө, вывсьыс пөрчөм дөрөм-гачсө, а водзө мый вөчны — эз төд. Ныв бергөдчис зонлань чужөмөн, кинас өвтыштөмөн чолөмасис. Арсентий воча лэптыштлис кисө, збоймөдчис да, воськов-мөд вөчис нывланьё. Төдтөм. Тыдалө, неважөн на воөма Сосновка посёлокө. И дум вылас усисны мамыслөн кывъясыс: бөръя кадас пө посёлокад кутисны вайны странасыс став өтбрөссө, адмовысланнойяссө, тунеядечьяссө да прөституткаяссө тшөтш.

Арсентий, дерт жө, и думыштни эз лысьт, мый сы водзын сулалө прөститутка. Сы водзын сулалі енежсьыс гождьявны лэччөм Андел.

— Кыдзи тиянөс шуоны?— рочөн юаліс Арсентий.

— Ульяна. А тиянөс?

— Арсентий.

Найө видзөдісны өта-мөд вылас. Найө пукалісны өта-мөдныслөн син аканьясын.

* * *

Вапөл паськөдчөма Эжва ю пөлөн. Гашкө, та вөсна и сиктыслөн татшөм нимыс. Йөзыс овмөдчылөмаось татчө дас сизимөд нэм помын. Сэки, пөжалуй, Эжваыс кывтлөма сикт бердгыс на. Сэссия вочасөн вежөма ковтыссө, писькөдөма веськыдджык туй. Вапөл горувті визувтысь юсө кутисны шуны Важ Эжваөн — мегыр моз вөчө ыджыд кытш и өтмөдар помъяснас сольнитчө Эжва-мамыскөд. Сиктгөгөрсө вөр-ваыс озыр тшак-вотөсөн, зверь-пөткаөн, уна сикас чериөн. Кывтыдланьыс и катыдланьыс паськөдчөмаось видзьяс да муяс. Ставыс быттьөкө райын кодь: эн дышөдчы и ов тыр судзсяна олөмөн. Кызьөд нэмыс Эжва катыдсалөн пансис эз омөля: воссисны выль школаяс, библиотекаяс, фельдшерскөй пунктьяс, часовняяс. Воссис школа и Вапөлын, шуисны земскөй училищеөн.

Но эз дыр кыссьы лөнь олөмыс Россияын, сідзкө и, Коми муын. 1904 воын пансис японечьяскөд война. Сэтчө веськавлісны и Вапөлса рекрутьяс, на лыдын Петыр Русинов, коді воис гортас морөсас эзысь медальөн и веськыд кокас ранитчөмөн. Як Петырөс сиктын кутисны шуны Чотысь Петырөн. Ветліс ас кинас вөчөм крукыля пома беддьөн. Та вылө видзөдтөг и лэчкасыліс, и пищальнад вөравліс, и черитө уна кыйліс. Тулыссиянь арөдзыс керка стен бердас өшалісны-косьмисны гырысь и посни синма ботаньяс. Зумыд тэчас, снажен морт Чотысь Петырыд, зу моз чурвидзысь, табак тшын рөма пелькиник тошка. Öшинь ув йөрас өти град вылын быдтіс ас табак, шуисны самөсадөн. Сиктын табактө вөдитісны унаөн, но Чотысь Петырлөн кодь ён да чөскыд дукаыс сэссия некодлөн эз вөв. Некор эз жалитлы, аслас көшельысь век гөститөдліс куритчысь ёртьяссө. Воз сөйөмысь йөз табакавлісны сундукын видзан көлуй.

Як Петырлөн гөтырыс Вапөлса жө, а кыськө көвъялөмаось

тешкодъ ним — Пульхерия, вероссыс вит аросон томджык; мичаник гогрос чужома, пытш кодъ тэрыб, нидзув кодъ восны-дик да нюдз. Ваполса анысос быттьо кистотоаосъ оти луын, ставныс лоссыд статьяосъ, зонуловлысь вежнысö петкоданаосъ. Ичотсянь найö мыркöны ставсикас сьöкыд уджсö, гашкö, та вöсна и вир-яй берданыс оз көвъясь лишной госыс да. Во кык отув олөм бöрын Петыр Русинов гозъя майшасыны кутисны: мыйла та дыра оз сьöкты Пульхерияыс, кос сювъя али мый? И отиысь, аръявылыс, шуисны ветлыны тöдысь-бурдöдчысь ань динö, кодi олис дас вит верст сайын орчча вөлөсьтын. Кык көле-саа телегаö Петыр доддялис сьöд гөнөн лөсталысь кузь бöжа меринсö, гостинеч пыдди босытисны туис тыр сола чери, и петисны туйö.

Вөлөкыс чукульöсь-мукульöсь, мунö сьöд вөр шöрти. Вочаась-лис сöмын оти вöла-доддя. Крестьяна гогрöстисны арся уджъяс, и некор вöли весь воштыны кадсö. Колис лөсьöдчыны сортовка-кер лэдзигкежлö. Тöвнас унджык крестьянскöй овмöсыс вöрын. Тöдысь аныд, шуисны сийöс Марья тьötөн, ар квайтымына, примитис кортöм гөсьгыясöс көдзыда. Но кор Пульхерия мыччис сола чери тыра туиссö, тьötыд пыр и небзис. Во дас нин дөвуй-тис; верöсыс капканъяс пукталигөн вöли веськалöма шöйтись ошлөн лапа улö, и морттö косявлöма. Олис көть и торйөн, ёна отсасис ныв семьяыслы. Сиктад кыккивежынь пукавны некор. Личöдчыштöмыс овывлө сöмын ен празникъясö.

— Ыджыд мортгөг ваполсаыд ме ордö оз воывлыны,— шыöd-чис Марья тьöt.— Кутшöм нин ускөттö суис?

— Шогö усим верöскöд, эг кут сьöктыны да.

Нывбабаяс пукалисны енув пельöсса пызан сайын. Петыр сёрнинысö эз кывзы, кильчöвывса лабичö пуксьöмөн куритис кыза гартыштöм ас табаксö.

— Важөн-ö мужика?— гөстялөн синъясö веськыда видзöдиг юасис Марья тьöt — зэв на шылыд чужома, юр гөгöрыс топыда гартөвтöм руд көсаа, мөд ног кө, бабаюра. Пельшөр-акушеркаыс вөлөсьтыясын вöли лыда морт, и Марья тьötöс корлывлисны кага чужтысьяс тшöтш и бабитчысь пыдди.

— Кык во сайын петi верös саяд.

— Тöлыссяыд ас кадö волö?

— Ас кадö.

— Видзöда да, мужикыд чотыштö быттьökö?

— Японечьясыдкөд война вылын ранитчылöма.

— Мужик пассö абу дойдöма?

— Ой, багатырлөн кодъ сёлөн сэтi. Кагаыд колö да, меным покой оз сетлы.

— Терпит, нылук, терпит. Ачым ме первойсысьсö кык во мысти жö сьöктi, көть и мужикöй тэлөн моз зэв жö яр вöвлi. Кутчысьлöй эн оти ног, унджык ног ворсöй вольпасяд. Тэ кодъ мича нывбабаос Енмыс оз öбөдит, сетас тянлы челядьтö. Ме нин аддза: кутан кагуктö мөздорад, нёньöдан.

— Тэнад вомсянь да Ен пельöдз,— нюмдыштлис Пульхерия.

— Чильболя кагукöс, зонкаос, ваян; гөрддзасьöма нин кынö-мад пытшпиыс, регыд номсасыны кутан, сьöкыдторъяс киад эн босыт.

— Збыль али мый?— Пульхерия кыпöдчис пызан сайсыс, кöсйис чукöстны Петырсö, мед тшöтш кывзас сёрнинысö, но кокъясыс быттьö лыжалісны, бөр пуксис.

— Збыль, дитя, збыль. Сиктад эн висьтась, мый тэ ме ордын вöлін, пинь саяд видз сёрнинымöс.

Пульхерия да Марья тьöт прöщайтчисны öта-мöднысö топöдыштлöмөн. Вапöлö локтігөн нин, вöлөкас, Петыр юасис гöтырыслысь ставсö спути-спуть. Верöсыс öтарö нокайтіс, кöть и эскис сьöкыда. Лун-мöд мысти Петырöс быттьö вежисны, омöльдзыка весиг кутіс чотны. И вöлі мыйысь нимкодясьны.

— Петя, Петь, менам тöлыссяöй эз во... Марья тьöтыд, тыдалö, збыльысь тöдысь,— водöм бöрын нин, шебрас улас, висьтасис Пульхерия.

— Енмöй-Енмöй, мед эськö оз жö во,— пернапасасис Петыр и босьтчис меліа малавны гöтырсö.— Узь сой вылын, ог кут вильшасьны.

Колис слöтитана ар. Лым толаяс пиö вöйтчисны öти судта ляпкыдик крестьянскöй керкаяс. Водз куньö синъяссö Вапöл — öшиньясын водз кусöны дзуган би югöрьяс. Сиктса том йöзлөн — нывъяслөн, зонъяслөн, челядьлөн — уна сикас ворсöмъясөн да сьылöмъясөн шыаліс Рöштво. Енлы эскысьяс шуöны Исус Кристослысь чужан лунсö — Рöштвосö — став праздникяслөн мамөн. Пашлякөн лыйсисны крещенньöдырся кöдзыдьяс. Век жö шонді асьыс чужöмбансö пыр ёнджыка бергöдö тулыслань. Нюжалöны луньяс. Топалöны, ляпкалöны лым толаяс. Со и Благовещенньö — крестьянаөн зэв пыдди пуктана праздник. Тайö лунас Архангел Гавриил юöртас Дева Мариялы, мый сійö лоас Мездыслөн мамөн: чужтас пиös и нимыс лоö Исус! Кисьмысь анькытш пуртös моз öтарö гöгрöсмис кынöмыс и Пульхериялөн. Петыр жмитчылö пельнас гöтырыслөн гөг бердö, кывзысьö: мый вöчö сэні, гырк пытшкөсас, кагукыс. Пулу нюмъялö верöсыслысь чорыд тошсö гебльöдлігтыр.

Юяс мездысисны йи шебрасысь. Вöля вылö петісны визув шорьяс. Важ Эжва воссьöмсянь Петыр чöсмöдлö муса Пулусö свежöй чериөн. Верös сайö петысь аньяс моз мичаджык платтьö кышалöны енэжлань кыпöдчысь пуяс. Чöскыд сынöдсыс кодзöмаöсь тэрыб бордьяса кайяс. Крестьяна дасьтöны муяс выль урожай быдтігкежлö. Сьöлөм вөрзьöдана шыясөн клуксігтыр Вапöл весьті войвывлань лэбзисны быдтысьны юсь-дзодзөгьяс. Со и Коми муös шонтыны воис гожöм. Матысмис Петыр лун — Русинов Петырлөн нимлуныс. Сылы тырö комын куим арös, сы мында жö, мыйта оліс и Исус Кристос. Апостол Петыр вöвлöма Кристослөн медводдза да медматысса велöдчысьясысь öтиөн, чери кыйысьөн. Та вöсна и тайö лунсö важысянь шуöны чери кыйысьяслөн праздникөн.

Верöсыслөн нимлунöдз вежон на. Пульхерия, кодös сиктсаясыс шулывлöны Пулуөн, вомöдзыс рушкау, сьöкыд уджьяс оз вöч. Но кыккирудз эз пукав — лунö бана öшиньдорса лабичын кыис ботан. Кор нин кутіс кывны, мый кагукыс регыд кутас вöзйысьны вöля вылö, верöссö тшöктіс ломтыны пывсян. Сэсся юаліс:

— Петюк, ачыд бабитан али кодöскö корлан?

— Менам вед оз артмы. Гашкө, Лева Степанлысь гөтырсө, Öнись Ольгаос, чукөстлыны? Сылон кык кага нин, кужö быдтор.

Кагаыслы рузум-губрассö да дөрөмсö, сюр нёнсьö и, Пульхерия важон нин дасьтис. Чача кодь лосьыдик потан мастеритис и Петыр. Дасьтöма и лайкансö, и пötөлök бердö пысалöма кольчасö. Колис корны Енлысь öтитор: мед эськö лючки-ладнö чужтис кагуксö Пульхерияыс. Вапöлса бабаяслон важонсянь мода: мед пö эз вомдзась, вайны кагасö пывсянын. Сэссия и, пывсяныд пырджык керка стын бöжас, туйысь бокин. Дойысла кө аньыд кутас ымзыны, шыыс ылöдз оз кыв.

Кöзяин ломтис из горья сьöд пывсян. Пач вом дорас сувтöдис ыджыд чугунын шонтыны ва. Дымöвөлөксö эз тупкы, и тшыныс пуритис ывлаö. А ывлаыс югыд шондiа, öд гожом шөр. Ичötик öшинь пыр лунъюгыдыс писькөдчис пывсянö. Петыр корöсьон чышкалис вылис джоджсö и кок увсö. Öнiя моз сьölöмыс некор на эз чеччыв, весиг салдаталiгөн. Чеччас, дерт, батын лосьöдчö лоны да. Гортсьыс, енув пельöссьыс, босьтис зарни сер кытша öбраз, көнi Богородица кутö мездорас ассьыс писö — Исусос, и öшöдис вылис джодж весьтас.

Лева Степанлон семьяыс олö катыдланьын öти керка кост. Öтлаын курутчигьясон Степан вежавлö, мый Петырлы оз ков тöждысьны челядьос вердöм-юкталöм, көмөдöм-пасьтöдöм вöсна. А Петыр вежалис ёртыс вылö, мый сийö кыкысь нин бать. Степан, кызди и Вапöлса уна мукöд крестьяна, тövбыд вöрын, кер лэдзö, нажөвитö сьöм. Мамыс олö пи семьяыскöд, быд ногыс отсасьö моньыслы — Öнись Ольгалы. Керка öтар джынгьяс во гөгөр сулалö ас дöра кыан стан. Татшöм стан вылас кысьыны кужис быд нывбаба. Шабдi дöраысь вурöм дөрөм-гачөн и платтöөн ветлисны верстьö и челядь.

Кыкнан кинас рушкуас кутчысьöмөн Пульхерия надзöник восьлалис пывсянлань. Öтар боксянныс кутышгис верöсыс, мөдарсянныс — Öнись Ольга. Пöварнясьыс водзö Петырлы пырны эз тшöктыны.

— Мун гортад, юрбит, мед гөтырыд бура торьялас,— öвтыштис Ольга.— Да потантö öшöд.

Воис кильчö дорас, а сэнi пукалö Степан. Ёртыс отсалис öшöдны потансö, юалис:

— Нимсö вед думыштiнныд жö нин?

— Нимыс важон нин дась.

— Абу кө гусятор, гашкө, висьталан.

— Эз на чуж да позьö висьтавынсьö? Ог на вед тöд, ныв али пи Енмыс сетас.

— А друг да ныла-пиаос ваяс?

— Эн повзьöдчы, Степан. Кильчö вылын вай курутчам.

— Менам кык пи, налы чой колö. Кага вöчöмыд абу из сёртöм, öти кагатö дора на. Лайкыд менам Ольгушöй, көть и абу гос мешök; но и абу кос печкан.

— Коды кызд... Меным вот из сёртöм кодь вöлi.

Степан казялис ёртыслысь волнуйтчöмсö и кутшöмкө ног зiлис лөньöдны:

— Ольга кө лоас кагаыдлы вежаньон, а ме вежайон — абу паныд?

— Тадзи и сёрнитчылім ми Пулукөд.
 — Вот и бур. Пөдлиннө, сідз эн и висьтав, кызди көсьянның шуны?

— Ныв кө чужас — Катеринаөн, а зонка кө — Павелөн.

— Зэв мича нимгъяс, а то сиктаным ставныс Оксиньяс да Ивангъяс, Огашгъяс да Митрейяс. Локтан вөскресенньоө пө Вапөлса часовняө молибен служитны поп локтө.

— Кутшөм вичкосянь?

— Немдінсянь пө. Сэки и кагатө поэьө пыртны.

Ен отсөгөн ставыс артмис колана ног. Сюрс өкмыссө дас куим вося июль өкмысөд лунө, середаө, Пульхерия вайис пиөс. Сетисны ним — Павел. Тадзи чужис Вапөлын выль олысь — Павел Петрович Русинов. Артмис сідз, мый ая-пия нимлуннысө кутасны пасйыны өти и сійө жө кадө — Петыр лунө. Кысь та-тшөм овыс — Русиновыс? Вапөлө зэв важысянь овмөдчылөмаөсь и роч войвыв районгъясысь крестьяна. Сэксянь и паськалісны роч овгъяс — Русиновгъяс, Напалковгъяс, Жикингъяс... Сэтшөм коми овгъясыс, кызди Изгъюров, Кызгъюров, Лыюров, Порсыюров, Симпелев, Кузьбожев — Вапөлын абу. Лева Степан семьялөн овыс — Кочановгъяс. Тыдалө, артмөма «көчан» кывйысь.

Коми чери кыйысь, пыжсянь ваө ботансө чөвтавтөдз, некор оз вунөд шуны: «Петыр Павел, сет чери!» Да, апостол Петыр ачыс вөвлөма чери кыйысьөн. А Павел? Апостол Павел путешест-вуйтөма Римскөй империяын, пыртөма йөз пөвстө христианство. Кыкнанныслөн оломыс помасьөма мученичeskөя. Петырөс Римын увлань юрөн вөлі рөспинайтөма крест бердө, а Павеллысь юрсө Римын жө керыштисны шыпуртөн. Тайө вөлі зэв нин важөн — 258 воясө. Сэксянь нин Енлы эскысыяс пасйөны Петыр лун — выль стиль серти июль 12 лунө.

Кызди гажөдчылісны тайө лунас крестьяна? Русинов Петыр-лөн мамыс, Микол Пекла, коді чужлөма 1860 воын и кувсис пөрөс висьөмла нелямын сизим арөсөн, пиыслөн война вылысь воөм бөрын казътывліс:

— Том йөз гажөдчылім верстьөысь торйөн. Петыр луны па-ныда рытө мунлім сикт кывтыд помө, көні ворслім, сьывлім, войбыд гажөдчылім өта-мөд бердө кутчысьөмөн, кытшө сувтөмөн. Асывнас кыйөдлім шонділысь петөмсө, Петыр лунө пө, кызди и Ыджыд лунө, шондіыс петігас ворсө уна рөмгъясөн да. Луннас дзоридзьясысь кылім юркытшгъяс, качайтчылім пөвгъя качайясөн. Тадзи матысянь төдмасьлім өта-мөдкөд нывгъяс да зонгъяс, бөрийы-лім өта-мөдлы жөникгъясөс да невестаясөс. Тадзи жө пөвгъя ка-чай вылын «кольмөдіс» менсьым юрөс мичаник зон, сиктаным шуисны Яшөөн. Аръявылыс локтіс корасыны. Мен вөлі сэк дас өкмыс арөс, а Яшөлы кызь куим. Сэсся и тэ чужин.

Мамылысь тайө казътылөмсө Як Петыр висьтавліс и Пульхе-риялы. Абу кузь нэм Енмыс сетлөма и Русинов Яковлы. Ая-пия мөдлапөлын вөлөм чөвтөны турун, кор батыслөн друг сувтас сьөлөмыс. Батсьө дзөбөм бөрын сөмын во мысти Петыр кораліс Пульхерияс.

Павликлы тырис өти арөс, кор пансис Первой мирөвөй война. Вапөлын олысыс сэк вөлі куимсө кымын морт, уна мужичөйөс босьтісны фронт вылө. Арын сьөд кымөргъясөн вевтгысьөм енэж

моз гудырмис олөмыс сиктъясын. Вердысьтөг колис уна семья, крестьяна нөшта на гөльмисны. Чотысь Петырөс, японечьяскөд войнаса эзысь медаля инвалид-ветеранөс, эз босьтны. Буретш да сы кодь арлыда унджык мужичөйыс мунис дорйыны Россияос.

Эз өшйы инас Лева Степан. Быть өд пов: босьтасны кө салдатө, гортас колясны мамыс, кык ичөт пи дай нөбасьысь гөтырыс. Слабог, Кочанов Степанөс эз вөрзбөдны. Кыдзи и көсьысь-лис Петыр другыслы: кагатө бара на «дорөма». 1915 вося тулысын Онись Ольга козьяналіс верөсыслы дыр виччысяна нывкаөс. Шуисны Аннаөн. Вичко нигаын пасйисны: Кочанова Анна Степановна.

Сідзи нин сьөкыд олөмыс, а кызьбөд нэмсө быттёкө кутшөмкө грекысь Енмыс ёрөма. Японечьяскөд войнасянь колис өкмыс во, и со бара выль война. Вапөлса мужикъяс пиысь өтияс эз воны бөрсө, мөдъяс локтисны гортаныс ёна доймалөмаөн, кой-мөдъяс — тыр дзоньвидзалунөн и кодсюрө весиг морөсаныс Георгиевскөй медальөн. Вапөлса крестьяна некор эз ёрччывны пель сьөдмөдана мисьтөм кывъясөн. Вензигъясөн ку письыс петөм морт шулывліс сөмын: «Чич нырад!» Фронт вылысь воөм салдатъяс сиктө вайисны мисьтөм роч мат. Налөн вомсянь жө сиктсаяс медводдзаысь кылісны, кодъяс сэтшөм большевикъясыс да меньшевикъясыс.

Тшыналіс на Первой мирөвөй война, а Вапөлөдз кывсис Петроградын кутшөмкө революция йылысь. Крестьяна этша мый гөгөрвоисны, мый вөчсьө Россияын, кутшөм лоө налөн аския луныс. Локтан арнас Вапөлө воліс Керчомъяса вөвлөм фронтө-вик, большевик Лютоев. Сійө чукөртліс вөлөсьтса скөд, пөся сёрнитіс ичөтик кулактас ёна өвтчигтыр:

— Матысса кадө быдлаысь лоө бырөдөма земствояс. Став власьт вуджас Сөветъяслөн киө. Крестьяналы тырмымөн лоө сетөма муяс да видзьяс. Вочасөн олөмныд кутас вежсьыны бурланьбө. Öти кывйөн кө: кутам стрөитны социализм! Стрөитны большевикъяслөн партия веськөдлөм улын. Та могысь Эжва пөлөнса вөлөсьтъясын котыртчалөны большевикъяслөн партийной ячейкаяс. Уналаын эм нин, а Вапөлын абу на. Тиян водзын сёрниттөдз ме аддзысьлі Русинов Петыр Яковлевичкөд. Сійө тиянлы бура төдса: японечьяскөд войнаса ветеран, эзысь медаля вөвлөм салдат. Кодлөн лоө көсьөм пырны партияө — шыөдчөй сы динө. Босьтөй примерсө суседъясныдлысь: Лебежнөйын да Парчын ячейкаясыс уджалөны нин...

Як Петыр, коді кужис гижны и лыддысьыны, чорыда эскис югыд аскиө и босьтчис уджө. Регыдъя кадөн сійө сяммис котырты дас көкъямыс морта ячейка. Нөшта сизимөн шуисны асьнысө на дор сулалысьясөн. Ставныс разнөй арлыда мужичөйяс.

Но бара пансис война — кызьбөд нэмын коймөд нин. Тайө пөръя гражданскөй, Россияын власьт вөсна косьбө воисны гөрдьяс да еджыдъяс, озыръяс да гөльяс, большевикъяс да меньшевикъяс. Эз өтсөглас вөвны вапөлсаяс: өтияс сувтисны гөрдьяс дор и мунисны партизанъяслөн отрядъясө, мөдъяс — еджыдъяс дор. Öта-мөдөс виана чорыд тышъяс Эжва катыдын мунисны 1919 воын. Кор кывсис, мый еджыдъяс вермасны пырны Вапөлө,

сиктса часовня весьтö джуджыд зиб йылö кодкö лэптис шабди дöраысь вöчöм еджыд флаг. Лун кык мысти паськаліс сёрни: орчча вөлöсьтын пö гөрдыяс! И часовня весьтын кутіс дöлавны гөрд флаг. Часовня дорті мунысьяс шензисны, кодлы да мыйла колö тöвру улын шпорöдчысь тайö дöрапасыс. Война кадö вөлöсьтыясын муніс уна сикас террор: шуин мыйкö эн сідз, и лыйласны. Сійö либö мöд рöма флаг лэптöмнас кодкö, тыдалö, кöсйис петкöддыны вапöлсаөн и еджыдыясöс, и гөрдыясöс пыдди пуктöмсö. Мöд ног кö, ни öти кортöм гөсьт мең эз вермы крукасьны татчöс олысьяс дінö. Вапöлö сідз эз и пырав некутшöм отряд. И сэк жö орчча сиктыясын мунісны косяс.

Война кусöм бöрын нин Лева Степан юалис Як Петырлысь:

— Тöдан-ö, Петь, коді флагыастö кыпöдліс часовня весьтад?

— Юасьлі, но быдөн соссисны. Тэнад удж сійö али мый?

— Менам.

— Видзöдтö, кутшöм тэ герой вөлöмыд.

— Ме вед, Петь, ни большевикъяслы, ни меньшевикъяслы, ни бесъяслы ог эскы. Эска сöмын Енлы.

— А ме вот, дивит кöть эн-а, эска большевикъясыдлы. Чайта да, бур олöм на коркö пуксяс. Огö кö ми, миян челядьным да нукъясным кутасны овны озырджыка, гажаджыка да югыдджыка.

* * *

Русинов Павликöс, öтка да радейтана писö, батыс ичötсянныс велöдіс быдсикас уджö. Зонкалы сöмын на кöкъямыс арöс, а Як Петыр босьтывліс нин аскöдыс ботайтчыны, нуöдіс матыссаджык чöс туй вылö сиасьны. Во-мöд мысти велöдас пищальысь лыйлыны уръясöс. Павлик öтарö виччысьö, кор лоас сылөн чой ли, вок ли, но пыр на абу. Пульхериялөн кага ваян пöраыс эз на помась, сылы комын квайт арöс, но оз сьöкты дай ставыс. Гашкö, бара ветлыны тöдысь-бурдöдчысь Марья тьöt ордö?

— Öтисö Енмыс сетіс дай то слабог,— лөньюдіс гөтырсö верöсыс.— Павликöс колö кок йылö сувтöдны. Таво сійö школаö мунас. Волисполкомын эм велöдчысьяслөн список, кодъяс таво мунасны школаö.

— Уна чукöрмöма?

— Куимнан классас, öтлаын босьтöмөн, кутасны велöдчыны кызь зонка да дас нывка. Воöма вьль велöдысь — öтка, верöстöм и челядьтöм. Волисполком корсис нин сылы патера.

Вапöлын земскöй училище восьсьöмсянь сэнi велöдчис нин уна нывка да зонка, тшöтш и Лева Степанлөн кыкнан пиыс — Модест да Матвей. Велöдысьяс, бокусь воөмъяс, вежласисны быд во. Верстьö йöз пöвстын грамотатöмыс вöлі уна. Сэк, кор 1921 вося августын котыртчис Коми автономнöй обласьт, веськöдлысьяс ыджыдджык тöдчанлун кутісны сетны крестьяна пöвстын культура кыпöдöмлы, восьтісны вьль школаяс, медпунктыяс. Эжва катыдса Лбöмдін уездын, вöвлöм монастырын восьтісны видз-му овмöсса специалистъясöс велöдан техникум. Котыртчалісны пыр вьль и вьль веськöдлан органъяс, кытчö бара жö колісны уна тöдысь йöз. Уездса медводдза партийнöй конферен-

ция вылын бөрйисны комитетö кывкутысь уджалысьясöс. На пöвстысь ставныслөн «низшöй» образование. Татшöм жö серпасыс вöли депутатъяслөн уезднöй Сöветса исполкомын. Сьöкыда, гудыра мунис странаын социализм стрöйтöмыс.

Вапöлса партийнöй ячейкалөн да волисполкомлөн вöли нöшта öти юр висьöм: сиктын паськалис аскур вöчöм. Эз сöмын праздникъясö, но и весь лунъясö унаöн кутисны кодавны. Пырис модаö и кутисны бордйысьны öта-мöдыскöд кывтыдса да катыдса бурлак зонъяс, кöть и öта-мöд вылас эз кутны некутшöм лөг. Сады юрөн ёртасисны, куритчылисны öти табак көшельысь, во-лывлісны öта-мöд ордас корасыны. Гөтрасьлісны и петлісны верöс сайö томөн. Чурка ваян модаыд овліс шоча. Дерт, вöвліны и сэтшöмъяс, сюрас кө стрöка, верöссыс либö гөтырсыс гусьөн мусукасьлісны. Казяласны кө, нывбабаыдлы йöзсянныс көвъясьліс «друг видзысь» ним.

Кызы квайтöд воын гожöмнас народнöй образованиелөн уездса отдел мöдöдис Вапöлса школаö выль велöдысьясöс. Томиник, лöсьыд статья, еджгов юрсиа, мелі чужöмбана, быттö öтарö нюмдыштны көсьö. Восьлалö сэтшöм кокниа, төв кө пöльыштас, йöла турунöс моз вот-вот нöбөдас. Шуисны Елизавета Сергеевнаöн. Овмöдчис Як Петырлөн керка мöд джынъяс. Пульхерия тадзисö чуйдис. Помавлöма Усть-Сысольскса педтехникум. ВКП(б)-са шлен. Йöз дінö сибалысь, сиктын регыдөн лоис ас мортөн, бурлак зонъяслысь вежнысö петкөданаöн. Кодсюрö босьтчыліс нин пондысьны-сибөдчыны, но весьшөрö.

Локтан тулыснас Елизавета Сергеевнаöс бөрйисны партячейкаса секретарөн. Чукöртліс сиктса активистъясöс да пöся сёрнитисны изба-читальня восьтöм йылысь. Катыдпомын эм овтöм керка, овлöмаöсь сэн пöрысь гозъя и кувсьöм бöраныс некод абу кольöма. Партячейка да волисполком воисны öти кывйö: изба-читальня восьтöм могысь тыр дасьлуно вайöдны сійö керкасö. Том йöз некымынысь котыртлісны суботник, уналаті дзоньталісны да вьльмөдисны. Посводз пыддиыс вöчисны жыр. Ёна отсасисны и Модест да Матвей. Во куим сайын сиктын котыртлісны комсомольскöй ячейка, но öдйö бөр киссис. Сійö эновтöм керкаыскöд орччөн вевт улын, öшина и öдзöса, сулаліс выль. Лева Степанлөн семьяыс кыпöдис. Срубсö дасьтыны да лэптыны помеч котыртлісны. Керкаыслөн катыдладорыс кык жыръя. Лева Степанлөн öния оланіныс квайт мортыды дзескыд нин. Тулысянь арöдзыс, көдзыдъясöдз, олöны эськө кыкнанладорас да.

Изба-читальня лоис крестьяна пöвстын культура паськөдан шöринөн. Татчö воисны и Москваын, и Усть-Сысольскын петысь газет-журналъяс, роч и коми кыв вылын. Во-лывлісны томъяс и олöмаяс, Енлы эскысьяс и эскытöмъяс. Ёна вензьялісны, тшöтш и ворслісны-гажөдчылісны, гораа лыддылісны «Коми сикт» газетын да «Ордым» журналын петöмторъяс, венласьлісны шашкиөн да доминоөн. Йöз пöвстын ёна чиніс аскур юöm. Рытъяс вылö Елизавета Сергеевна нуöдывліс Пульхерияöс, коді ёна жалитліс, мый сідз эз и чужтыв нывкаöс.

Кымын водзö быдмис Павел, сымын ёнджыка чужöм-öбликнас и туша-мыгөрнас мунис батыслань. Сы кодь арлыда зонкаяс да нывкаяс гожöмнад ворслісны гораньысь, кикольысь, дзебся-

сьомысь, օтчүкօрօн купайтчылісны Важ Эжваын. Тօвнас бара чүкօртчылісны и ворслісны здօвօльысь. Пуксяс зонмыд улօс вылօ, тупкасны сингыссօ чышгыянօн и колօ тօдмавны, кутшօм нывка пуксяс сылօн мыш сайօ. Тօдас кօ, нывкасօ позьօ окыштны и на пыдди пуксяс выль пара. Тадзи ворсігօн Пашօлы медводдзаысь мойвиис чупнитны бан боксօ Анналысь, кодлы вօлі дас кык арօс, а зонкалы дас нель.

Елизавета Сергеевна велօдіс Пашօօс ворсны шашкиօн. Сэссия и зонка дінօ гортас шашкиасьны кутіс воывылыны Анна. Шегъяслісны и. Нывка да зонка вочасօн лоисны бур ёртгыасօн.

Отиысь, гождօм помланьыс, օнись Ольга локтіс рытгысьсны Пульхерия ордօ. Воывлօны найօ օта-мօд ордас ас костаныс варовытгыштны. Кыкнан семьяыс шօркօдя олысьяс, мօска-вօлаօсь, медалօм йօзօс оз удждօны. Пульхерия буретш кудель печкис, уна рօма чօрсыс тыртօм на, тыдалօ, сօмын на пуксьօма печкан саяс.

— Ая-пиалы да Елизавета Сергеевнаны носки-кепысь вылօ шօртыс колօ. Ботантօ Павлуш нин кыօ, кор оз дышօдчы,— казгыштіс патерантсօ кօзьяйка.

— Сэссия нօсь, Елизавета Сергеевнаыд оз кօсьы пышйыны Вапօлсьыд? Став велօдысьыс на вед мунлісны да...— лабутнօя паніс сёрнисօ гօстяыд.

— Ог лэдзօй некытчօ, кутны колօ.

— Кыдз бара-й кутан, мунас кօ,— сетчօ Пульхерия.— Тэнсьыд пытօ, дона пօдруга!

Виччысьтօг шуօмсьыс шօйօвошліс օнись Ольга:

— Думайтан, сетасны мам-батыс Вапօлса зон саяд, ачыс пօ Донысь да?

— Абу сылօн мам-батыс, тиф висьօмыд найօс нуօма мօдаръюгыдас.

— Вот кыдзи. Гашкօ, эм нин кодкօ Лизаыслօн?

— Абу Лиза, а Елизавета Сергеевна. Велօдысьтօ сօмын нимовнанас шуօны. Гортօдз тай некодօс на эз вайօдды-а,— чօв олыштօм бօрын содтіс:— Модестыд кильчօ дорօдз кольօддօ.

— Ог верит. Кажитчօ, надейнօ, тэн.

— Збыль, Ольга, збыль. Ме вина ютօм морт, оз мен каститчы.

— Мый йылысь, бара-й, сёрнитлօны-а?

— Вунօдін нин, мый йылысь сёрнитлінныд томдырйиыд Лева Степаныдкօд кольօдчигօн?

— Нинօм на, Пулу, эг вунօд. Вом дор пыктымօн Стёпушօй вօлі окалас.

— Сы вылօ и томлунсօ мортыдды сетօма.

— Ог օд и тօд, кымын арօс нин Лизавета Сергеевнаыслы?— унджыктор кօсьис тօдны օнись Ольга.

— Во помланьыс пօ кызы куим лоօ.

— У-у-у! Сылы важօн нин мамօн колօ лоны, а пыр на нылалօ. Гашкօ, кыткօ нелючки да? օтлаас пывсьыланныд?

— Пывсьылам, дерт.

— Сідзнад, казьявлін: эм-օ гօг улас нывбаба пасыс?

— Ольга, эн серам петкօдды. Сылօн ставыс сьօрас. Нёнъясыс, майбыр, абу люсмунօмаօсь тэа-меалօн моз.

— Миян кадօдз воас да и сылօн люсмунас. Менам Мօдюкы

вед сөмын на кызы өти. Вапөлса зонъясыд эськө век ас серти-ныс томджыкөс вайлісны да.

— Вот и быдты ассыд Аннуштө менам Павлушлы, век со өглаын ризъялоны. Гашкө и, коркө сват-сваттясөн на лоам. А Елизавета Сергеевнаыд вевъялас на мамавнытө. Бур монь кодлыкө мойвиас.

— Кодлыкө пө... Ызйөда Степанөс да, корасыны сы дінө во-лам.

— Волөй, волөй. Корасымыд абу гусясьом, оз дөзмы таысь Елизавета Сергеевнаыд. Ме да Петыр огө жө кольөй бокө.

Эз и вежон коль, корасыны ветлытөдз на Модест збодера юөртис гортсаыслы:

— Гөтрасыны көсья!

Сыркмунис мамыс:

— Кодөс нө бөрийин?

— Мам, ме эг бөрийысь, ачыс олөмыс индіс.

— Пасибө, зарни пи, нимкодьөдін батысьө,— ошкана шуис Лева Степан.— Вапөлад став нылыс мича да уджаслив, ме сөмын синма-пея вөлі-а. Виль керкаад пач тэчны сөмын колис. Эм көні овнытө.

— Синма-пея, бать. Зэв мичаник.

— Мөдь, а ме төда, кодкөд гөтрасян,— пыльсмунис Анна.— Елизавета Сергеевнакөд.

— Тэон төдтөмтор нинөм абу,— шыасыліс Матвей.

— Павел мен висьталіс.

— Абу пөръялөма, збыльтор висьталөма,— шылыкнитіс чойсө Модест. А Анна дзик акань кодь: сьөд юрсиа, сьөд синкыма, мугөминик чужөма. Кор вөлі ичөтджык, мамыс и батысь шмони-төмөн, меліа шулісны кагасө чиган доддысь усьөмторйөн.

Елизавета Сергеевна да Модест гөтрасисны лөня, гора свадь-батөг. Коммунистыясөс венчайтчөмысь вөлі вөтлөны партияысь. Партячейкаса секретарлы, челядьөс велөдысьлы эз позь сиктса-яс водзын ыкпашитчыны. Невестаыслөн няня-сола да тшай-сакара пызан сайын пукалісны сөмын Лева Степанлөн да Як Петырлөн семьяяс, корлісны и волисполкомса юралысь, комму-нист Ласей Васьөс — еджыдъяскөд тышкасян кадся партизанөс. Сійө и сетіс виль гозъялы гөтрасьөм йылысь бумагасө. Чужан вөлөсьтсаныыс, Донсянь, племянницасө видлігмоз вөла телегаөн воліс и батыслөн вокыс — Иван дядыс. Быдөн вайөма сьөр-сьыс кутшөмкө да вөлөга. Пызан вылас сулаліс и кык парта самөкур. Медуна сөян вөлі дасытөма чериысь. Павел да Анна көтшасын сулалысь паськыд пу крөватын ворсісны шашкиөн. Мыйла эз чукөртчыны жөник ордас? Сөрничисны да, виль керкаө петтөдзыс том гозья кутасны овны Як Петырлөн керкаын, Елизавета Сергеевна ордын.

* * *

Социализм стрөитөм, мый йылысь юөртисны большевикьяс революция бөрын, мунис сьөкыда. Ичөт грамотаа крестьяна эз төдны, кодлы эскыны, кодлысь кывзысьны. Сюрс өкмыссө кызы өкмысөд воын гожөмнас уездьяс пыдди котыртисны районьяс. Сэки

и чужис Льомдін район. Отка крестьянско́й овмөсьяс пыдди сиктгьясын шуисны артмөдны отувгья овмөсьяс, мөд ног кө, колхозгьяс. Сөмын пө тадз поэо кыпөдны видз-му овмөс, содтыны урожайяс. Вапөлсаяс нөрөвитісны, кыдзи кутасны вөчны тайө уджсө орчча сиктгьясын. Обласгьтса газетгьяс чуксалөны быдторгьяын водзмөстчыны коммунистгьясөс да комсомолецгьясөс, корөны ёсьджыка тышкасны кулакгьяскөд. А Вапөлса крестьяна оз весиг төдны, мыйса сэтшөм йөз кулакгьясыс.

Отысы, энкка ордас волігөн, Елизавета Сергеевна аддзысьліс пиверыскөд. Пуксисны воча ныр и варовитісны вель дыр.

— Матвей, менам тэ дінө зэв ыджыд мог.

— Кывза, Елизавета Сергеевна.

— Сиктаным уна том йөз, но өнөдз абу комсомольско́й организация. Пөжалуй, Вапөлын нин и абу сөмын. Водзмөстчин эськө тайө уджас. Чукөртчылөй нывгьяс да зонгьяс изба-читальняө, котыртөй татшөм организациясө. Лун-мөд сайын Льомдіннын муніс районса комсомолечгьяслөн медводдза конференция. Сэні вөліны став сиктгьяс да деревнягьяс делегатгьяс, ни өти том морт эз вөв сөмын Вапөлысь.

— Помнита да, во вит сайын комсомолечгьясыдлысь организациясө котыртлісны нин, но кусіс. Мунан вөлі улич кузя, паныдасян гажа юра том морткөд и тапкөдө морөсас: төдан пө ме коді, ме пө комсомолеч!

— Сэксаян унатор нин вежсис, сувтисны выль моггьяс. Паськалө енлы эскысьяскөд тыш. Сиктгьясын воссьөны енлы эскытөмгьяслөн клубгьяс. Колө чуксавны ас сиктсаөс регыдджык отувтчыны колхозө. Воас төв. Школаса, изба-читальняса пачгьясө ковмас уна пес. Öні нин колө котыртлыны пес заптөм кузя субөтникгьяс. Отув кысгчөмөн изба-читальняө унджык вермам судзөдны газетгьяс да журналгьяс...

— Ладнө, видла сёрнитны. Но ассым мам-батгьөс да пөчөс сөйны пуксьөм водзын юрбитөмысь өлөдны ог кут. Пызан сайө пуксьытөдз ми ставным пернапастө чөвтам, вомгорулын «Отче наштө» лыддям и. Мый таын лёкыс? Вөлі кө поэялун, ме эськө велөдчи попө. Пөчөлөн ен нигагьд некымын, молитватө уна төда,— Ен водзын моз и висгтасис Матвей.— И ен праздникгьястө пасйөмысь вапөлсагьд оз дутдыны.

Гортлангьяс восьлалігөн Елизавета Сергеевна думыштчис: Енмыдлы эскөм кузя өд прав Матвейыс. Му пуксьөмсянныс комияс кодлыкө да веруйтлісны, и мыйла колө вины тайө верасө?

Эз сөмын мустөм, но и нимкодгьяс выльторгьяс вайисны крестьяналөн оломө комынөд вояс. Районнын воссялісны выль школаяс, бурдөдчанінгьяс, вөр лэдзан предприятиеяс, заводитіс петны районса «Вөр фронт» газет. Мамалө Елизавета Сергеевна, быдтөны Леночкаөс. Видзө кагуксө Модестлөн пөчыс, коді вуджис овны нукыс ордө, неважөн стрөитөм керкаө. Вапөлса начальнөй школын лоис нин кык велөдысь. Сиктсаяс чукөртчылісны скод вылө, пөся вензисны торгья ас овмөсьяс өтиө отувтөм йылысь. Унджыкөныс сувтисны паныд. «Вөр фронт» газетгьяс гораа лыддисны сы йылысь, кыдзи районнын мунө сідз шусяна коллективизация. Мунө пө ньөжйө, и тагысь пө медводз мыжаөсь меставывса партийнөй организацияяс. Уналаын пө колхозгьяслы паныд сувтөны асьныс коммунистгьяс. Сэтшөмгьяссө вөтлөны партиягьяс.

Районса съод вөр шөрө кутісны вайны страна пасьтаысь кулачитомъяслысь семьяс. Сэтшөмъяссө корсисны и Лёмдін районын. Ыджыдджык керкаясын озырджыка олысьяслысь мырдыялісны скөтсө, стрөйбаяссө, эмбурсө. Эжва катыд весьтын ымраліс съод олөм. Комын өтиөд во помын Вапöлын бара муніс крестьяналөн скод, сёрниыс — колхоз котыртөм йылысь.

Скод пансытөдз на изба-читальняө пырис ур ку шапкаа, кузь тулуца, киас россялөм кучик портфеля төдтөм морт. Юрсө йөзлань копрөдлігтыр сійө пискөдчис пызанлань, көні пукалісны партячейкаса секретарь Елизавета Сергеевна да сиктсөвет исполкомса юралысь Василий Власевич — сиктса ног, Ласей Вась. Кодьяслы абу тырмөма лабичыс да улөсыс, сулалісны. Мужикъяс шпуккөны-куритөны ас табак. Жыръясас ныртө чеврөддана нөгыл тшын, вурунос моз көть печкы чөрсөн. Төдтөм морт пөрчис шапкасө да тулупсө, пуксис пызан сайө — Ласей Васькөд орччөн.

— Көдзыд поводдя вылө видзөдтөг, тайө гөсьтыс воис Лёмдінсянь, — сувтлөмөн шуис Елизавета Сергеевна. — Төдмасьой: Кустышев Петыр Георгиевич, партиялөн райкомса секретарь.

Кустышевлы ар комын вит, морөсас кык ыджыд зепта рочной кителя. Портфельсыс перйис «Вөрлэдзысь», «За новый Север», «Вөр фронт» газетъяс да нөшта кутшөмсюрө бумага. Сылы и сетісны медводдза кывсө. Висьталіс, көні да кымын ас овмөс нин котыртісны колхозъяс; мый бурыс өтувъя овмөсьяслөн; кутшөм бригадаяс видз-му овмөсын да вөр лэдзөмын уджалөны медся бура. Планъяс тыртөмысь пө уна коллективлы сетөма съөма премия, өткымын колхозлы — нянь вартан машина. Висьталіс, кыдзи районын бырөдөны неграмотность. Районө пө локтөны велөдчөм специалистъяс, учительяс, бурдөдчысыяс, унаөн пө велөдчөны Ульянаса видз-му техникумын.

Унатор на висьталіс райкомса секретарь. Сэсса чуксаліс вапөлсаөс тайө жө собраннө вылас өтутвчыны өти овмөсө:

— Öтувтө уджавны лоө өна кокниджык и гөриг-көдзигөн, и көрым заптгөн, и урожай идралігөн. А райком да райисполком кутасны быд ногыс отсавны. Найө, кодьяс оз пырны колхозө, мөд ног кө, единоличникъяс, кутасны мынтыны колхозникъяс серти ыджыдджык вуз-вот. Гөгөрвоинныд?

— Гөгөрвоим эськө да... — кылісны гөлөсьяс. — Сідзнад, и гортса пемөсьясөс ковмас сдایتны колхозө?

— Ставыс лоө өтувъя.

— О-о-о! Вот тайө да! — шызисны йөз. — А мый кутам сөйны?

— Воддза кадсө лоө сөкыд, но вочасөн ставыс пуксяс лад вылө и кутам овны өнія серти бурджыка.

Эз өтсөгласөн, но унджыкөныс ошкисны өтувъя овмөс котыртөмсө. Собраннө помасьтөдз на Кустышев юөртіс, меным пө колө на воөдчывны Парчөдз, и лөсьөдчис петны туйө. Ывлаөдз кольөдіс Ласей Вась. Отсаліс доддявны вөвсө, кынысө кутлөмөн прөщайтчисны. Секретарь ямщикаліс ачыс. Пуксис турунөн тыртөм көрзина доддьө и дөрнитіс вөжжисө, веськөдіс кузь бурыся карөй вөвсө Парчлань нуөдысь мир туйлань. А крестьяна водзө нуөдісны ассыныс собраннөсө. Кодсюрө шуис котыртны сиктын кык колхоз, мөдьяс — өтиөс, и юкны сійөс кык бригада

вылө. Унджыкөныс лэптисны кисö öти öтувъя овмöс вöсна. Индiсны весиг юралысьöс — Як Петырöс. Дыр вензьöм бöрын овмöсыслы сетiсны «Выль йöз» ним.

А Коми муын, тшöтш и районын, водзö мунiс сiдз шусяна кулакъяскöд тыш. Газетъяс гижисны: найöс пö колö чышкыштны му вывсьыс. Тыр судзянаджык олысьясöс, кодъяслөн ыджыд керкаыс да мукöдлөн серти унджык скöт, «чышкисны» мисьтöма да яндысьтöг. Вапöлын кулакалöм улö веськалiс куим семья, кодъяс эз сетны колхозлы ни öти мöс ни вöв. Кывсьöма та йылысь райисполкомö и корисны сэтчö кывкутны коммунистъяс Елизавета Сергеевнаöс да Василий Власьевичöс. Найö босьтчылiсны дорйыны ас сиктсасö, воас пö кадыс да ставныс пырасны колхозö, но весьшöрö. Партийнöй организацияса секретарöс да сиктсöвет исполкомөн веськöдлысьöс «пывсьöдiсны» чорыд кывъясөн, сэсся кыкнаннысö вöтлiсны партияысь, а Ласей Васьöс — и удж вывсьыс.

Татшöмторйыс дöзмöдiс вапöлсаöс. Партияысь öтпырйö петiс дас морт, том йöз эз кутны пырны комсомолö. Но колхоз кутчысис кок йылас, кöть и тöв пуксьöмсянь уна колхозникöс мöдöдлiсны сортовка-кер лэдзны. Модест да Матвей Кочанов вокъяс да Русинов Павел уджалiсны öти бригадаын. Сезонса план тыртöмысь неважөн налы сетiсны сьöма премия, и куимнаннысö премируйтiсны ватнöй гачөн.

Лева Степан ыззылыс мöдöдны Анна нывсö Ульянаö велöдчыны пемöсьясöс бурдöдан пельшöрö, нэм кежлад пö лоö зэв бур да колана профессия, но мöдыс пыксис. Сиктад велöдöны челядтьö уджавны ичöтсянныс. Анна быдтор вöчö и горт гөгöрыс, нянь идралiгад чарланад вундыны да кольтаястö вöнявны кужö и, коса-гөрбушнад ытшкыны и. Дай сьылö зэв мичаа. Тувсов да гожся рытьясад ныв-зонъяс петöны ывлаö гуляйтны, мунöны сьылiгтырйи сикт кузя, и Анналөн гөлöсыс ставсьыныс торъялö. Пöдругаясыс шуöны сийöс артисткаөн оз сöмын мич вöснаыс, но и мыла гөлöс радиыс. Юр невеста дай ставыс.

Öнись Ольга ныв дорыс жö сувтiс: некытчö пö гортысь ог лэдз. Тыдалö, полiс, мый тшыкöдны вермасны нывсö. Öд сылы дас көкъямыс арöс нин. Кодкö чöвтас мича ныв вылад синсö дай ылöдас. Батыслысь көсийöмсö Анна висьталiс Пашöлы. Зонмыд сэк дыр думайтöг крапкис:

— Аннуш, ме көсья, мед ми нэм кежлö лоам öтлаын! Көсья, мед ми нэм чöж радейтiм öта-мöднымöс! А тэ?

— И ме көсья!— ныв сывйыштiс Павелöс голя гөгöрыс, сёркни кодь чорыд нёнъяснас жмитчис паськыд морöс бердас. Найö сулалiсны туём Важ Эжва берегын, вежöдысь коръяса джуджыд кыз пу дорын. Тадзисö медводдзаясь на.

— Лун и вой ме думайта тэ йылысь, лун и вой тэ сулалан менам син водзын.— Павел оқыштiс нывлысь кыкнан бан боксö, чангыль ныр йывсö, и, медбөрти, вом дорсö.

— Паш, кодкөдкө окасьлiн нин?

— Окасьлi. Тэкöд. Помнитан, здөвöльсьыд тай ворсiгөн бан боктö чупнитi.

— Ой, сэтшöм нин важөн тайö вöли, а ме помнита жö. Ме вед тэ вöсна и эг мун велöдчынытö. Ачым кө вöзйыси, лэдзисны

эськө мамө и батьө. Муна кө, мися, Пашөөс кодкө удитас, со өд мыйта нылыс сиктаным.

И бара топөдчылісны.

— Кор нө локтам корасьнытө?

— Көть аски.

— Сетасны мам-батьыд?

— Тэ сайө сетасны, а мукөд сайө оз.

— Кымын водз гөтрасям, сымын регыдджык менам мам-батьлы нукөс ли, нучкаөс ли козьналам. А то меысь өтдор на-лөн некод абу. Венчайтчам?

— Ог төд, погыяс вылад өні сералөны да. Модест вок да Елизавета Сергеевна венчайтчытөг олөны.

— Кодкөлун изба-читальняын ме газетъяс листалі, мыйсө сөмын оз гижны. Öтияс пө пырөны колхозө, мөдъяс бөр петөны. Пырөм водзвылас пө ассыныс скөтсө начкөны, медым öтувъя овмөсө эз веськавны.

— Вапөлсаыд эськө абу сэтшөмөсь да, колхозсыыд бөрсө оз петны, а вот партиясыыд унаөн петісны. Комсомолас он көйы пырны?

— Та кузя Матвей вокыд, көть и ачыс абу комсомолеч, ме дінө шыөдчыліс жө. Ог, мися, ме сэтчө пыр. «Вөр фронт» газетад гижөма, районса сиктъясын пө заводитісны тупкавны вичкояс да часовняяс. Немдінса вичкоад пө эм на попыс, ковмас кө, венчайтчынытө сэтчө кайлам. Менө Немдінса поп жө пыртлөма, миян часовняө молебен служитны волөма да сэки.

— Менө сідзи жө пыртлөмаөсь.

— Аннуш, колхозной свадьба кө вөчам?

— Мый сійө сэтшөмыс?

— Изба-читальняө чукөртчылөмөн. Коді көсьяс, мед сійө и локтас. Гудөк и патепон эм сэні, кулакалөмаясыдысь мырддьө-маөсь. Сывны и йөктыны кутам, самөкур ютөг кутам гажөдчыны. Сэні миянөс сиктсөвет гижөдас, тэ лоан Русинова Анна Степановнаөн. Висьтала батьөлы да, мед корлас весиг «Вөр фронт» газетысь редакторсө.

— Мыйла?

— Мед газетас гижас миян свадьба йылысь.

— Бать менам зэв асныра да, венчайтчыны тшөктас. Öти нывтө поплөн благөслөвиттөг оз сет верөс саяд.

— Ас сиктсалөн бурсиөмыс эськө медся на дона да.

— Попыд вед Ен нимсянь бурсө сийө.

— Ладнө, мед тэ ног лоө.

Як Петырлөн ни Лева Степанлөн семьяяс эз сувтны челядь-ныслөн гөтрасьөмлы паныд. Найө и асьныс важысянь көсйыліс-ны лоны сват-сваттясөн. Томъяс öтувтчисны Немдінса вичкоын венчайтчөмөн. А бөрыннас пукалісны Як Петыр ордын, кытчө и вуджис овны Анна да лоис Пульхериялы моньөн.

Регыд тупкысис и Немдінса вичко. Вапөлса часовняын вось-тісны клуб. Кор сиктө вайлывлісны кино, петкөдлісны сэні. Том йөз котырлісны шойччан рытъяс, колхозникъяс сэні жө нуөдлісны собраниеяс. Ныв-зон этшаджык кодалісны, көть и ен праздникясө юсьылісны, кывтыдса да катыдса весиг борд-йысьлісны. Посни челядьөс эз вөрзөддыны, найө видзөдісны

гырысьджык вокъяс вылас да ныр розьнысö гудйигтыр шпынны-
лісны. Бурлак-зонъясыд збодерось да ёнось, быдөн зіліс петкөд-
лыны невестаыслы ассыс збойлунсö. Сайкалыштöм бöрын кут-
лісны öта-мöдныслысь кинысö.

* * *

Верос сайö петöм бöрын во мысти, комын нельöд воын, Ан-
на чужтіс Як Петырлы да Пульхериялы нучкаос. Русиновъяс да
Кочановъяс öтлаын бöрйисны ним и шуисны Кристинаон. Лайкан
бердö пысалісны сійö жö потансö, көні и чурскыліс сюр нёнсьö
и улас исясьліс Модестлөн да Елизавета Сергеевалөн Леночкаыс.
Кристина да Леночка — чоя-вокалөн челядь, мөд ног, воча чойяс.
Лена Кочанова регыд нин мунас школаö.

Газетъяс кө öтарö гижисны кутшöмкө контрреволюционеръ-
ясös, националистъясös, троцкистъясös эрдöдöм йылысь, то Ва-
пöлын олöмыс муніс лөня, быттьö сиктыс кывтіс гыястöм Эжва
ыввті. Куим семья, кодъясös шулісны кулакъясөн, пырисны кол-
хозö, дерт, эз окотапырысь. Öд уна эмбур, му-видз да скöt
асаліс öтувъя овмös. Көзяинъясыс колісны овны ас керкааныс,
но коромина джынъяс öтиын восьтісны челядьлы ясли, мөдын —
колхоз правление, коймөдын — сиктсöвет. Тадзи найö мынісны
тюрмаö пуксьöдöмысь либö ссылкаö мөдöдöмысь.

«Виль йöзын» юралö на Як Петыр. Сиктсаясыс веськөддысь
морттö пырджык ыдждöдлөны Петыр Яковлевичөн. Сійö абу
коммунист, но на дор сулалысь, японечьяскöд войнаса ветеран,
пыдди пуктана морт абу сöмын Вапöлын, но и районын. Вөр
лэдзан план тыртöмысь колхозсö пасйöма районса Гөрд пöv
вылö. Сэтчö жö пасйöма нимнысö вөр лэдзысь ударникъяслысь:
Модест Кочановлысь, Павел Русиновлысь да Матвей Кочанов-
лысь.

Некыз эз гынмы уджыс партия Льöмдінса райкомлөн. Частö
вежласисны сэнні секретарьяс. Вылісянь тшöктöм серти найö
корсисны народлысь врагъясös, а сэсся и асьныс жö веськавліс-
ны на лыдö. Мыйкө шуин эн сідз, кыз колö, и вермин тшукны
тэнö налыштана налыкйö. Татшöм вöлі ВКП(б)-өн нуöдан ныр-
визыс. Елизавета Сергеевна пырис партияö Ленин кулан воö,
буретш сэк, кор унджык йөзös чуксалісны пырны сэтчö сідз
шусяна «ленинскöй призыв» серти. Сыысь, мый кык во сайын
дорйис Вапöлын озырджыка олысьясös, велöдысь Кочановаос
тшöктісны сдایتны партбилетсö.

И со комын нельöд вося гожöмнас Кочановаос корисны рай-
исполкомö. Примитіс ачыс исполкомса юралысь Кырнышев — уна
кизя еджыд дөрöма, сьöд пинжакыс улös бөр вылас. Еджыд
ковтаа, сьöд сарапана, мичаник чужöма аньös аддзöм бöрын
Кырнышев воштыліс кыв-ворсö:

— Пуксьöй матöджык, Елизавета Сергеевна. Миян лоö зэв
кывкутана сёрни. Тавосьянь Льöмдінын лоö шөр школа, а Вапö-
лын — сизим вося. Ковмасны виль велöдысьяс, а найö оз тыр-
мыны. Сиктаныд витöд классö вуджысьяслы оз нин ков мунны
велöдчыны кытчöкө бокö. Райкомкөд сёрнитім нин, тиянös индам
Вапөл школаса директорөн.

— Пасибö дөвериесьыд, Пётр Николаевич. Миян сиктын челядыс зэв уна, тыртöм классъяс оз лоны.

— Пыралоё райкомö, тияны бергöдасны партбилеттö, тадзи шуим бюро вылын.

— Нöшта öтчыд пасибö, Пётр Николаевич.

— Семьяа?

— Да. Верöса, и ныв быдмö, сизим арöса.

— Ачыд на тай эськö ныв кодь да. Кымын арös?

— Ой, уна нин. Комын,— кымын водзö, сымын ёнджыка тайö лöсьыд мыгöра мужичöйыс синсö пöртис аныдысь.

— А мен комын куим. Быд лун удж, удж, удж. Некор и некодкöд сёлöмсянь сёрнитыштны. Облисполкомсянь öтарö воöны индöдъяс: вöчны пö колö сийötö, сийötö; корöны вöчöм удж кузя öтчётъяс, öтарö пинялöны.

— Сьökыд да кывкутана тиян уджныд, Пётр Николаевич.

— Быдöнлы сьökыд. Йöзыс жальöсь, гöля олöны, а отсавны нинöмön ог вермöй. Торъя нин жальöсь найö, кодъясöс мырдөн вайисны странаса лунвыв обласътъясысь. Шоныд оланінтъяс абу-öсь, омöлик кöм-паськöмаöсь, тшыгъялöны, висьöны, унаön кулöны... Ме и ачым ог тöд, мый лоö мекöд аски. Помасьлас-ö коркö тайö адыс?

— Помасъяс, Пётр Николаевич, помасъяс. Дыр кыссыны тадзи оз вермы.

— Извинит менö, Елизавета Сергеевна, тайö восьса сёрни-сьыс. Весиг öд удж кузя ёртъяскöд татшöм сёрниыс оз овлы. Век лоö кодыськö да повны.

— Татчö локтигөн менам сёлöм вылын пукалис из, а тиянкöд аддзысьлöм бöрын муна кокни сёлöмön.

— Шаньöсь да мичаöсь коми нывбабаясыд. На пиысь öти тэ, Елизавета Сергеевна,— «тэ» вылö вуджис Кырнышев.— Лоас кö Вапöлад волöм, бытöн аддзöдла.

— Ме лоа сöмын рад. И кута виччысьны.

И прöщайтчисны.

Вапöлö Кырнышев сідз эз и волы. Во помас нин сы местаын райисполкомын пукалис виль морт. Партиялысь райкомтъяс да Сöветъяслысь исполкомтъяс котыртöм бöрын сэтысь веськöд-лысьяссö обласътса начальство печлалис шегъясöс моз. Кодсюрö уджавлис сöмын тöлысь-мöд, сэсся тодмышкавлісны. Кодсюрöös мыжтöг мыжавлісны. И татшöм «сьöd» воясыс эз на помасьны.

Елизавета Сергеевна бергöдчис гортас сьöрас партийной билетön и сизим вося школаса директорön. Верöсыс чолöмалис гöтырсö тайö должностьнас, но колис веськөдöн, мый бөр лоöма коммунистön.

— Абу кö партияын, директорнад оз индыны,— посйысис Елизавета Сергеевна.

— Сідзнад, енув пельöсысь öбразъяссö ковмас саймовтны?

— Пыртам пыдi жыръяс, сэтчö ас йöзысь öтдор некод оз пырав.

— Пернатöм сьыліяс! Вот кодъяс найö коммунистьясыд!— быттö гимньöв лыйис, мисьтöма мурöстис Модест.— Миян семьяын пернатöмыд некод эз вöв и абу,— чöv олыштöм бöрын содтис:— Тэысь öтдор.

— Ме, гашкө, тэысь на ёнджыка эска Енмыслы, коть и пернатом. Ме абу поп и абу попаддя, а учительница.

Вензисны эськө и водзö, но керкаö пырис Леночка. Модест-лөн пöчыс кувсис во куим сайын, сизимдас квайт арöсөн, и öни олісны куимөн. Нывканыс таво мунас школаö. Велöдіс мамыс да, кужö нин надзöник лыддысьны и артасьны. Быдма пö да, мамö моз жö лоа школаын велöдысьөн.

Оломтö вöжжиөн он кут, сійö бергалö мельничаса көлеса моз, аслас лопъясөн гудыртö-быгзьöдö васö. Мельнича көлеса мозыс жö странаын бергаліс йöзöс репрессируйтан машина. Буксуйтгöг муніс сійö и Коми му кузя. Век жö съод кымөръяс пöвстгі пыр ёнджыка пискöдчисны и шонді югөръяс. Ружтысь колхозъясöс кок йыло сувтöдöмын зэв тöдчанаөн лоисны машинно-тракторной станцияс — МТС-яс — котыртөм. Сэтшöмъясысь öти воссис и Лёмдінын. Сэтчö кутісны вайны тракторъяс, автомобильяс, комбайнъяс, вартан машинаяс. Сэні жö босьтчисны велöдны механизаторъясöс. Трактористөн лоис и кызь квайт арöса Матвей Кочанов.

А Петыр Павел мöдысь нин лöсьöдчö лоны батыөн. Степан Анналөн вомöдзис рушкуыс. Кристиналы кык арöс, öтарö пöчыс киö вöзйысьö. Нывсö да нучкасö видлыны быд лун пыравлö Öнись Ольга. Öтлаын курутчытгöг оз кольы лун и сватъяслөн — Як Петырлөн да Лева Степанлөн. Анналөн энъкаыс, Пульхерия, жалитö моньсö: неважөн на дугöдіс нывкасö нёнясьöмысь, и со...

И Русиновъяслөн, и Кочановъяслөн семьяс зэв на и дөвöль-öсь лоисны: пиös öд чужтіс Анна. Сваттяяс сувтöдісны сватъяслы парта самöкур. Пызан сайын варовитгөн мужичöйяс корсисны кагуклы ним.

— Гашкө, Микита?

— А Парамон кө?

— Тит! Вот тайö мича ним.

— Социализм стрöитам, социалистической ним колö,— тошсö малалігтыр юрсö жугліс Як Петыр.

— Сідзнад, зэв лöсялана ним — Революция!

— Нывка кө вöлі, пöжалуй, тайö нимыд эськө лöсяліс. А миян кагукным чильболя.

— Вай, сват, огö бöрйысьöй, Иванөн шуам дай.

— Иваныд сиктаным быд керка мысьт. Вель оломлань мунам, сідзкө и, вель ним колö.

Сватъяс пукалісны Лева Степан ордын. Арся рытыс пемыд и шоныд. Курутчыны петавлісны кильчö вылас. Сэсся и, Öнись Ольга эз тшöкты тшынодны керкасö, съорысь пö гортö вая Кристинаös. Пульхерия сватялы пö и сідз тырмымөн нокыс. Матвей удж вылысь воём бöрын ужнайтіс и муніс клубö нывъясасьны. Тракторсö сувтöдіс керка öшинювса йөрö.

Пöлыс ордö пырис Леночка. Мамыс мөдöдöма, гашкө пö, пöль-пöчыслы кутшöмкö отсөг колö: сёодчыны ли, пес пыртны ли. Зіль нучкаыс. Таво коймöд классö ветлö.

— Леночка, Анна обыдлөн кагуклы ним бөръям. Гашкө, чуйдан?— шыасис пöлыс.

— Талун велöдысьным миянлы висьталіс öти лыддянтор, Нёб-

дінса Виттор пö гижöма. Вапöлса Ласей Вась йылысь сэн казь-тылöма.

— Но!— чуймис Як Петыр.— Ог помнит, мед миян сиктö коркö воліс Нёбдінса Виттор. А тэ, сват, помнитан?

— Ог жö. Ноко, висьтав, Леночка, мый гижö Витторыс миян сиктса йывсьыс.

— Часлы, уськöда тöд вылö. А-а, усис: Ласей Вась Арсень пö волöма карсянь, сёрнитöма пö рочөн и войтö шулöма ночөн,— быд кыв ярскöба шуаліс Леночка.

— Тайö, шöктуг, абу миян сиктса Ласей Вась йылысь, сылөн абу пиыс,— стöчмöдiс пöльыс.— Сват, кыз тэ видзöдан, Арсень нимаыд öд сиктаным некод на абу. Гашкö, тайö нимсö и вöзъям?

— Ме, Степан сват, тэ дор. Вай тайö ним вöснаыс и нылыш-там винасö. Кузь нэм да бур шуд тэн, Русинов Арсентий Павлович!

— Пасибö и Нёбдінса Витторлы. Сійö чуйдiс миянлы татшöм мича нимсö.

* * *

«Выль йöз» колхозса кыкнан бригадаыслөн муясыс вывтасінын. Тракторлөн мургöмыс эз куслы водз асывсянь. Арнас, видз-му уджъяслы кывкöртöдъяс вöчöм бöрын, Матвей Степанович Кочановöс вöлі пыртöма Лёмдін МТС-са медбур трактористъяс лыдö. Тырмымөн уджыс и тöвнас. Станцияса мастерскöйясын механизаторъяс дзоньталöны техника. Мукöд колхозникъяс, мужичöйяс и нывбабаяс, уджалісны вöрын. Он кö мун кер лэдзны, мортсö лыддылісны дезертирөн и сетлісны судö. Вапöлын татшöмторйыс овліс шоча.

Öтиысь, тулыснас, Матвей локтiс му вывсянь пажнайтны. Сэки и шыöдчис мамыс пиыс дінö:

— Матвей, тэ кодь арлыда зонъясыд ставныс нин гöтыраöсь и котыраöсь, а тэ öтка петук кодь.

— Мам, удита на юрöс сийöсавны. Эн тэрмöдды.

— Петыр Павел да Анна чойыд томджыкöсь тэ серти, а ныла-пиаöс нин быдтöны.

— Мам, ме зэв писка нывъяс дінад. То öти волас сьölöм вылö, то мöд... Видзöда да, коймöд нин кажитчö.

— Вот и бöрйы на пövстысь медся мусасö. Батьыд тай со менö бöрйыліс-а.

— Пасибö Лева Степанлы. Не кö сійö, и ме эськö эг чужлы вöльнöй светас,— Матвей казтыштiс батьсö, кодi войколөн муніс Йöлакöджö ботайтчыны.— А тöдан, мам, мый вежöртасыс менам нимöйлөн?

— Пöчыд тай сетіс тайö нимсö-а.

— Ен нигаын пасйöма: Матвей — сійö Енмөн козыналöмтор. Вот кодi ме!

— А Модест вокыд? Мый сійö Модестыс?— окота лои тöдны мамыслы.

— Модест. Тайö нимыслөн вежöртасыс — авъя, рам, вежавидзысь.

— Анна чойыдысь тöдан жö?

— Вунөдi, видзөдлыны колö. Көнi пöчөлөн ен нигаясыс?

— Нөрөвитлы. Эсiйö важ сундукас куйлöны.— Öнись Ольга восьтiс көртөн песөм сундук öдзөссö, öвтыштiс нырсö чазгöдана табак дук, и перйис сзсь сьöд, чорыд коркаа вель кыз кык нига. Коркаяс вылас зарни рөмөн серпасалöма крест. Пиыс листа-лыштiс öтисö и назöдыштiс:

— Сьватöйясöс лыддьöдлөм, нимъясныслөн вежөртас. Со и Анна. Анна — тыр-бура олөм.

— Видзөдтö, кутшөм мича нимаöсь ставныд чоя-вокаяс. Ноко, Лиза моньалысь öтырышгья видзөдлы нин.

— Часлы, корсям Елизаветаöс. Со, сюрис. Елизавета — Ен-мөс пыдди пуктысь.

— Ачыс, надейнö, оз тöд аслас нимлысь вежөртассö. Тöдiс кө, эз эськö коммунистав.

— Уджыс сьлөн сэтшөм. А сьөлөмнас Енлы эскысь. Мен эськö сэтшөм гөтырыд, но кысь бара-й, мөд сы кодьыс абу да.

— А Гыч Öдяыд мыйөн омөльдзык? Том, мича, велөдчөм, йöз дiнö сибалысь,— Öнись Ольга казгытыштiс нимсö колхозса зоотехник Евдокия Гичевалысь, кодi неважөн воис велөдчанiн-ысь.— Кутан кө «вугравны», и сiйöс удитасны.

— Нинөм шуны: Öдяыд мича, ме дiнö сибалөкодь и. Но...

— Мый «но»?

— Вöсни кокъяса. Ог радей чөрс кока нывгьястö.

— Мортсö колö радейтны, а оз кокъяссö.

— Гөтырыдлөн мед гөгөр вöли мича, тшöтш и кокъясыс.

— А Пиля Митрейыдлөн нылыс? Надейнö, ныма тэд?

— Сьлөн кык ныв. Коднысö кутан тöд вылад?

— Ыджыдджыксö, Дарьясö. Кызiник ки-кока, коскөдзыс сой кыза көсаа.

— Ныма эськö Дашаыд, да куритчö. Табакөн öвтысь бабаыд оз жö ков. Ачым кө куритчи, гашкö и, прöститi-а. Зонгьясыдкөд кертö лэдзигөн, тыдалö, велалöма куритчынысö.

Эня-пия вель дыр корсисны Матвейлы гөтырпуос, да сiдз эз и воны öти кывйö. Та йылысь сёрниыс эз нин öтчыд пансьыв. Мам-бать кө оз тöждысьны, кодi сэсся?

— Мам, менö тракторöй виччысьö. Вель ыджыд пласт на колö гөрыштны, сёрөн локта,— шуис Матвей да петiс керкаысь.

* * *

Вапöлса мужикгьяс важысянь нималöны дошлöй вөралысьясөн да асланыс ныриса кыйсян понгьясөн. Колхозö райисполкомсянь воис бумага, көнi индöма мог: сизим мужичöйöс мөдöдны кыйсян прөмыс вылö. Көсйысьяс пыр и сюрисны, öткажитчис сöмын Кочанов Модест. Районса колхозникгьяс пövстын паськалiс орд-йысьөм унджык вөр лэдзөм вöсна. И Модест сетiс кыв петны вермысьөн. Водзтi вöвлi налөн куим морта бригада — Петыр Павел да Кочанов вокгьяс. Матвей ызйöдiс Павел зятсьö, мед сiйö велөдчис МТС-ын комбайнёрö, шоперö либö ас мозыс трактористö. Велөдöны тövнас Льөмдiнса мастерскöйясын техника дзоньталан кадö. И со, Модест колис öтнас. Сы моз öткөн уджалысьыс вöли некымын. Став уджсö вöчöны лучкөвöй пилаөн

да черён: пөрөдөны, увйөны, кражуйтөны. Олісны вөрас өтувъя баракын: өти джынъяс мужичөйяс, мөдас — нывбабаяс. Өтарө ломтісны пачьяс, мед пусьыны, косьтыны тюнияс да шабурьяс. Артасьысь-бригадир быд рыт юөртліс, кодлөн бригадаыс либө торъя морт петіс медводзө. Дзузган дорын лыддылісны колхозса активистьясөн вайөм газетьяс, томджыкъяс ворслісны доминоөн, шашкиасьлісны.

Комын сизимөд во помын, декабрса көдзыд луньясысь өтиө, колхозник-сезонник Кочанов Модест шуис шедөдны рекорд. Уджаліс личлэдзлытөг, весиг шабурсө пөрчөмөн; көсийс весь-кавны вөр лэдзысь стахановечьяс лыдө и нимкодьөдны медводз гөтырсө да нывсө, сэсся и ставнас колхозөс. Рытнас бригадир юөртіс: талун пө медуна вөр — пөшти кызь вит кубометр — сетіс страналы Кочанов Модест Степанович. Баракын ставөн кекөначисны. Рыгъя нурьясьөм бөрын өтияс нюжөдчисны шойч-чыны нарьяс вылө; мөдьяс, томджыкъяс, нывьяс и зоньяс, петіс-ны ывлаө гажөдыштны асьыныс сьөлөмсө. Төлыся сэзь войыс налы кажитчис лымйөн толтөм горнича кодьөн. Со өд кутшөм томлуныд!

Унаөн узисны гораа шкоргиктыр. Кодсюрө ымөстліс, тыдалө, мыйкө вөталіс. Өти нар вылын ымзөмыс өтарө гораммис. Ськөд орччөн узьысьяс весиг садьмисны. Ымзысь дінө медводз матыст-чис Гичев Миш — Гыч Өдьялөн вокыс.

— Мөдьө, Модест, садьмөдчы... Вөтнад ошкөд косясян али мый?

Мөдыс ымзөмысь эз дугды, эз восьт и синьяссө. Михайлө кисө пуктіс ёртыслөн джуджыд кымөс вылө:

— У-у, плешкыс доналөм көрт кодь. Биалөма.

Нар вылысь чеччисны и мукөдьяс. Некод эз төд, мый вөчны. Некодлөн некутшөм лекарство абу.

— Ёнджыка шебрөдам и асьядорөдзыс нөрөвитлам,— кыліс гөлөс.

— Өтпөлөсөн, тыдалө, пөрөдчөма. Вот и прөстудитчис,— шуис мөд.— Менам самөкур эм. Гашкө, кисьтыштам вомас. Кынмөм висьөмсьыд винаыд лөсялас.

— Код төдас, кутшөм висьөм көвьясьөма. Мед көть абу вуджан висьөм, а то ставным пөрам.— Михайлө кыпөдыштіс Модестлысь юрсө, стөканысь вомас войтөдіс винасө, но мөдыд эз нылышт.

Водз асывнас вөла доддын Модестөс ковмис нуны делянка вылысь Вапөлө. Сэсянь Лева Степан, көрзина доддьө водтөдөмөн, шоныд тулупөн поньталөмөн, лэччөдіс писө Льөмдінса больничаө. Эштыліс тшөтш сөвны доддяс Елизавета Сергеевна, но айкаыс сувтіс паныд; да и энькаыс өтарө өлөдіс моньсө: ми пө кутам гортын юрбитны, мед лоө ставыс бур. Өнись Ольга пернапасаліс ылысмысь вөла-доддяөс и пырис керкаө. Коркө тані пуис уна гөлөса олөм: энькасыс өтдор кык пи дай ныв. Өні повзьөдчана лөнь. Сөмын пачводзын сулалысь позйын котсисны чипаньяс.

Инас эз өшйы Елизавета Сергеевна. Пыраліс пыді жырьяс, кытчө партбилетсө сетөм бөрын инавліс ен-өбразьяссө. Босьтіс медыджыдсө, көні серпасалөма кык вежа дядьөс — кыкнанныс дзор тошкаөсь, кианыс кутөны, морөс берданыс топөдыштөмөн,

Евангелие, и петкөдiс дор комнатаса енув пельöсö. Сэни жö су-
лалiс и сёян пызан. Эня-ныла нуръясисны и мунiсны школаö.

Лева Степан кык лун олiс Льöмдiнын; узылiс сэни, кöни олiсны
Матвей пыыс да Павел зятъыс. Модест эз вöв садяс и сы дiнö
некодöс эз лэдзны.

— Тыыс пыктöма-öдöма... Спаситны эг вермöй,— нориник
гöлöсөн юөртiс Лева Степанлы дзор юрсиа, олöма нывбаба-
врач.

Ыджыд шог суис Кочановъяслыс да Русиновъяслыс семья-
яссö. Комын куим арöса Елизавета Сергеевна колис дöваөн,
дас арöса Леночка — батътöг. Ыркыд поводдя выlö видзöдтöг,
Модестöс дзебисны став сиктөн. Вапöлса шойна вылын содiс
нöшта öти крест.

Быд выль во йöзлөн олöмö вайö кутшöмкö да выльторъяс —
и бурсö, и лёксö. Комиын, кыдзи и страна пасьтаын, водзö
корсöны народлыс врагъясöс. Медъёна сюралö коммунистъяслы.
Дыша пырöны партияö Льöмдiн районса колхозникъяс. Мöдарö:
кодсюрö петöны водзтiджык пыравлöмъяс. Улын авторитетыс
коммунистъяслөн. Верöсылөн кувсьöм бöрын ыззылыс петны
партияыс и Елизавета Сергеевна. Но велöдыс ёртъясыс тайöс
вöчны эз сöветуйтны.

Зятя-шурина — Павел да Матвей — Вапöлын лоисны зэв
колана механизаторъясөн. Зиль уджыс Матвей йылыс «Вөр
фронт» газетö гижны волiс ачыс редакторыс Николай Лихачёв.
Найö пöшти öткодъ арлыдаöсь и сёрнитiсны талунъя олöм йыв-
сыыс зэв вöсчөн. А вöли зэв югыд шоңдiа май, вывтасiнъясыс
исковтiс лымйыс, и Матвей петкөдiс тракторсö гөрны. Сёрнитiс-
ны вөрбокса мудöд выlö пуксьöмөн.

— Матвей Степанович, висьталыштiн эськö аслад мам-бать
йылыс, чой-вокыд йылыс... Гажтöм лоö очеркöй, кута кö гижны
сöмын гектаръяс йылыс,— унджыктор кöсийс тöдны редактор.

— Да, гөгөрвои. Сiдзкөнöсь, вöчам тадз: узьнытö локтöй ми
ордö, сэки и варовитам пöттöдз.

— Ладнö. Пасибö корöмсьыд, гөтырыд кö примитас.

— Ме гөтыртöм, ола мам-батькöд.

— Мый сiдз? Та мында ныв Вапöлын, и...

— Дивитöны эськö сиктсаяс, да мед.

— Пöдлиннö, кыдзи олö Елизавета Сергеевна?

— Тöдсаöсь?

— Менам уджыс сэтшöм, лоö унаöс тöдны. Районса комму-
нистъясыдлөн собраниеяс вылын аддзысьлi.

— Нылыскöд олöны, нельöд класс сiйö помалiс. Елизавета
Сергеевнаыдлөн верöсыс менам рöднöй вок вöли.

— Мыйла вöли?— öтарö юасис редактор.

— Кувсис. Мöймуся декабын кувсис, комын öти арöсөн.
Мамö да батьö тайкö эз йöймыны.

— Дыр олiсны гөтырыскöд?

— Во дас.

— Гашкö, вöлины нин выль корасысыяс?

— Эг на кывлы. Мича нывбаба, учительница, зэв шань, эм
бур оланiн, ас вынъясөн стрöитлiм. Дерт, сы выlö вежалысысыд
эмöсь.

— Воч вожысь ме бура тōда ōти семьяōс, кōни верōсыс пō-гибнитōма еджыдъяскōд тышгъясын. Гōтырыс кольōма ки вылас кагаōн. И мый жō? Вылысь петōма мужикыслōн томджык вок сайō и ōнōдз олōны-вылōны. Ōти пи налōн велōдчō Ульянаса видз-му техникумын, нывныс — Сыктывкарса медтехникумын, медсестраяслōн курсъяс вылын. Тайō семья йывсыс ме гижлi весиг «Вōрлэдзысь» газетō.

— Тэ, Николай Васильевич, он-ō син сыланьō, мед ме коралi Елизавета Сергеевнаōс?— ним-вичалiс редакторōс Матвей.

— Миян сёрни дiнō лōсялiс, вот и казътыштi.

— Павел зять гаравлiс жō нин: вай пō некодлы ог сетōй Ли-за моньтō, гōтрась пō сыкōд. Шмонитiгмоз-ō, збыль-ō тадзсō шуис — ōнōдз ог тōд.

— А тэ мый вочавидзин?

— Мися, мунам корасыны, а Елизавета Сергеевнаыд кō тод-мышкалас?

— Вельшōрō полан, Матвей Степанович. Дōва-нывбабаыдлы век колōны мужик киясыд. Сэсся и, Елизавета Сергеевнаыд том на, олōм на сылы колō овны. Чайта, кодкō сайō петас на. Ōни кадыс сэтшōм: абу быть корасыны. А кодi сийō Павел зя-тьыс?

— Ичōт чойлōн, Анналōн, верōсыс. Льōмдiнса МТС-ад тракто-ристō жō велōдчис, вермас и комбайн вылын уджавны. Сылōн кык челядь нин, ныла-пия: Кристина да Арсентий.

Редактор мунiс колхоз правленньō. Матвейлōн гōригчōжыс юрсыс эз петав Елизавета Сергеевна. Думайтiс, кор да кыдзи матыстчыны тайō ань дiнас. Вōчны сiдз, мед эськō некыдз эз ōбōдит. Кōть мый оз думайтны сиктсаяс, а видлас пōкōритны Елизавета Сергеевналысь сьōлōмсō.



Александр ШЕБЫРЕВ



«Тшайподасис луныс»

КЫВБУРЪЯС

Козин

Кор лытөм кывйөн козьналоны мирсө,
Виж дзоридзьяса лудсө, васө, йирсө...
Эн эскы, ёртöй. Мирыс — абу сылөн!
И дзоридзьяса лудыс — көнкө ылын...
Тэ козьनाव дона мортлы ассьыд виртө,
Став муслунтө, а ськөд — пытшкөс миртө...
Мый тэнад эм. Мый морөс пиад пуө.
Мый тэнө тайö муас кыскö-нуö.
Тэ козьनाव сөмын сийөс, мый тэд — дона.
А дон — эн кор. Эн майшась сыысь ёна.
Тэ сідзи сет... Но вöчав тайöс шоча.
Сэк воас кад — тэд козьналасны воча.

Öти войт

Яла ягъясөс ме некодлы ог сет.
Аслам ингъясөн ме некодкөд ог пудъясь.
Дона вужвойтырлы паныдөн ог пет.
Кевма Енмыслы, мед лёкыс тан эз вужъясь.
Менам муöй, менам нэмöвöйся вын,
Тэнсьыд ловшытö пузчужöмсянь тай кыла...
Коркө сывлан тэ, а коркө овлан кын.
Коркө сывлан тэ, и шыладыс тай — мыла...
Лыа чукöрысь ме — öти лыа чут.
Сöстөм Эжваыслөн öти войтөн олі.
Кадыс тупыльтчö... И сийөс он нин кут.
Кöсья эскыны, мый кодлыкö — да колі...

Суседыслы козин —
Шонді югөр сетіс.
Шай-паймуніс рытыс:
— Лунъюгыдсө вайин!?
Тода: шонді олө
Менам карта сайын...
Аддзыла ме сійөс
Аслам садьман кадө.
Овлө, тайө здукас
Сьөлөм тырлө радөн.
Ки пыдөсын өні
Лунъюгыдыс лоас!
Сёрөнджыкөн войыс
Менө суас. Воас...
...Варовитөм бөрын
Гортас тюрис луныс.
Жаль, мый шонді югөр
Бөрсяныс жө муніс.

Чолөм

Чолөм,
менама асья унма олөм!
Чолөм,
тайө олөм дінас колөм.
Чолөм,
варов ёльяс, сөстөм юяс.
Помөс дорса
гулыд лудъяс, муяс.
Нэмөвөйся
төдса-төдтөм инъяс,
Сэтөра да
пөлөзнича синъяс.
Коми аньлөн
уджач, дона кияс.
Синмө бердан
войвыв шонді бияс.
Вөр-ваыслөн
аслыспөлөс шыяс.
Эжваыслөн
Тувсов ойзан гыяс...
Чолөм!

Кад

Абу шыбитөм шыблас*
Горув исковтөм кадыс!
Сэні кольөма олөм.
Сэні бурыс и радыс.
Сэні кывлөма коркө

* Шыблас — ковтөмтор.

Югөръяснас, летас.
Мыйла, югыд шондйй,
Асывводзас петан?
Мыйла меным шоныдсö
Лунъюгыдын сетан?

Шуöма и гижöма —
Шондй бара пырас:
Луныс коркö рудöдас...
Чашкаыс кор тырас.
Мыйла, зарни шондйй,
Рытгорулас пыран?
Мыйла, рöмыд ывлайй,
Лунъюгыдсö зыран?

Вөр керкаын

Вөр керкаын, войын,
Дөрöм сöмын узьö.
Чискö унзиль чайник.
Асья шыдöй шузьö.
Бинас лампа ворсö...
Юрын — вöt ли вемöс...
Вылын — байдöг горзö.
Тирöм босьтö.
Шемöс.



Висьтъяс

Медся бур зять

Миянын век патеруйтлісны йӧз. Ми велавлім на дорӧ, бура ладмылім. Юксывлім быдлунъя вьльторъясӧн.

Керка миян вӧлі ыджыд, кык судтаа. Стрӧитлӧма дедным, купеч. Бура, нэмъяс кежлӧ. «Сиктаным медся важ»,— висътавліс бать. Олан жырйыс керкаын вит. Ми уна челядя семьяӧн дзескӧдчылім ӧтикын, улыс судтаас. Съӧм абутӧм вӧсна мукӧд жыръясас мам-бать лэдзлісны олысьясӧс.

Тшӧкыджыка ми дорӧ пыравліс, стӧча кӧ шуны, лэччыліс Мария Петровна, Марей баб. То йӧвла, то прӧстӧ кыв вежны мамкӧд, кодкӧд ӧна лӧсялісны.

Мария Петровналы вӧлі ар квайтымын вит. Арлыд вылӧ видзӧдтӧг, зэв на варов, мичаник, нюмбана, мукӧддырйи серамбана и зэв сёрниа. Еджыд чутъяса съӧд ситеч чышъяна, сӧстӧм, ӧкуратнӧй паськӧма. Сійӧ любӧпырысь видзӧдліс ми вылӧ, чойяс вылӧ, пыр ошкис миянӧс, а ассыс внукъяссӧ, куим вокӧс, кулитліс, мыйла зэв вильышӧсь. Кулиганъяс пӧ быдмӧны. Дерт, шуліс тайӧс эз лӧкысь, а сералігтырйи. Аслад ӧд век бурӧсь!

Марей баб, нылыс, зятьыс да бабӧн шуысьяс олісны мӧд судтаын, кык жырйын. Сылӧн нылыс, миянлы прӧстӧ Лина тьӧт, сиктын вӧлі тӧдчана мортӧн, уджаліс больничаян. Лэччывліс миянӧ зэв шоча: дерт, некор, пыр удж вылын.

Марей баб дугдывтӧг нимкодясис нывнас, гӧрдитчис сӧн. Дерт, и аснас, мый сійӧ, дӧва морт, ӧтнас быдтіс нывсӧ, сетіс образованньӧ. А верӧсыс война вылын усьлӧма. «Менам Лина, менам нылӧй...»— пыр долис сійӧ.

Коля зятьыс дінӧ вӧлі мӧдпӧлӧс видзӧдлас. Мария Петровналы унатор сыын эз кажитчы. Лишнӧй веськыдлуныс, мед мукӧддырйи и сералӧмсорӧн, чорыдлуныс, скӧрлуныс. Кыдзи начальник, сійӧ йӧзкӧд сёрнитны мӧд ног эз куж.

Налӧн семья сиктаным лыддыссис интеллигенцияӧн: велӧдчӧм йӧз, скӧт оз видзны, гожӧмын турун оз дасътыны, картофель оз пуктыны — ставсӧ ньӧбӧны. Мария Петровна ӧтнас вермӧдчис горт гӧгӧр да кага видзис.

Корскюрӧ рыгъяснас, кор Лина нылыс да Коля зятьыс волісны удж вывсьыныс, бабӧн шуысьясысь мынтӧдчӧм бӧрын лэччыліс миянӧ. И верстьӧяслӧн пансьыліс кузь сёрни. Быдтор йылысь: мый бурыс да мый лӧкыс кывсӧ сиктын, мый висъталӧны радио пыр.

Меным челядь вежӧрнад кывзыны найӧс вӧлі зэв интереснӧ, торъя нин Марей бабӧс. Сійӧ артистка моз вежлаліс гӧлӧссӧ, чужӧмнас ворсіс, быд ног шенасис кинас, асьсӧ бокъясас клопкыліс, okayтіс да okayтіс. Лунтыр радио кывзӧм бӧрад унаысь повзьӧдліс миянӧс:

— Война! Регыд лоё война. Запомнитё менсыым кывъясөс! Кыдзи сэсса тыдовтчис, тайё вёлёма Карибскöй кризисыд.

Кор велөдчи витөд классын, политинформация вылын висьтавлісны сьökыд войтыркостса положение йылысь, но войнаөн эз повзьöдлыны. Да и ачым мыйсюрö лыдди газетысь: йöзыс пö öні сэтшöм сямаөсь, мый война оз заводитны, тöдöны, мый сэки му вылас олöмыслы воас пом. И эг нин пыдди пукты пöрысь баблысь кывъяссö. Тöді — война оз ло!

Мария Петровна да мамö орчча сиктъясысь. Найö унаысь казтылісны бөрö кольöм, эзысь бордъя том каднысö, кулöм рöдвужнысö, тöдсаяснысö. Уна чуймöдана, а мукöддырйи и зэв шогалана история кывлі насянь, и тайö дыр чепöльтіс сьölöмöс.

Öти пемыд арся рытö Марей баб, кыдзи и век, лэччис миянö шойччыштны аслас вильыш внукъясысь. Ми став семьяөн пукалім ыджыд пызан гөгөр — ужнайтім. Самöвара чайысь öткажитчис. Пуксис лөз сундук вылö да босьтчис пессыны. Тöдчис, мый сылөн эм чуймöдана выльтор и оз терпитсысь öдйöджык висьтавны. Медбöрын лабутнöя пуксис матöджык да тшапа заводитіс:

— Кывлінныд? Менам Анна чойлөн нылыс, Роза, верöс сайö петö.

— Да?!— пöсь чайнас тшöкмуніс миян мам.— Татшöм водз? Вильөн на школа помаліс... Код сайö нö?

— Воысь морт сайö. Тöданныд вед, виль садик кутісны кыпöдны. Сэні сійö стрöитчысьяс вылас начальник. Ме эськö ог тöд, но бур йöзыс шуöны, велөдчöма пö, культураа, оз курит, оз ю. Тайö главнöйторйыс. Сідзкö, менам лобысь зять — бур морт!— помаліс Марей баб.

Сиктаным дзик ютöм мужичöй вöлі зэв этша. Винаыс магазинь эз бырлы. Вузалісны донтöмысь, быдöнлы шедіс. Удж, кутшöмкö-а, вöлі ставлөн. Дерт, кодалісны эз быд лун, ёнджыкасö ыджыд празникъяс дырйи. Унаысь тышкасьлісны клуб дорын. Ичöтджыкнам аддзылі öтчыд, кыдзи кык код морт шыбитчисны ёрта-ёрт выланьыс матысса йöрысь нетшыштöм потшъясөн. Кыдз помнита, дöсмерти чегсытöдз повзи да öдйöджык котөрті гортö.

— А кыдзи нö найö тöдмасьöмны?— водзö юасис мам.— Öд тэнад воча нылыд мöд сиктын олö.

— Стöча ог на тöд, но, чадö, йöзсянь кывлі, мый мортыс дөнзьöма гөтыртöм олöмсыс да удж вылас сералігырйи кутöма юасыны стрöитчысьяслысь, оз-ö тöдны шань нывбабаөс, код вылö позис эськö гөграсыны. Индöмаөсь миян Роза вылö. Ветлы пö орчча сиктö, сизим верст сайын сиктыс, да корась.

Том ныв оліс мамыскöд, коді друг ёна висьмис, кок вылö эз нин сувтлы. Розалы ковмис мамыс местаö мунны уджавны фермаö. Водзö велөдчöм йылысь сёрни эз вермы лоны.

Том морт, кодöс шуисны Петяөн, дыр эз думайтчы — мöдіс гөтырпула. Невестапу пыр и воис сьölöм вылас: сьöд синкыма, сьöд синъяса, нюмтыра мугыд чужöма, статя. А гөлöсыс небыд да мыла. Олöны гöля, но керканыс сöстöм и кыпыд. Тöдчö, мый нылыс абу дыш.

Верöспу Розалы кажитчис жö, көть нинöм сэтшöмыс сыын эз вöв: еджгов юрсия, руд синма. Правда, видзöдö буқышөн, но лабутнöй, и, мый нывлы медся кажитчис, яндысьысь.

Сьёкыда висьсы мам өтка нывсө верөс сайё водз петөмысь эз өлөд. Төдiс, мый аслас овсьома нин му вылас. Көть кокни сьөлөмөн мунас мөдарьюгыдас, нылыс кө местаө воас да лоас шуда.

Мам кулөм бөрас Роза вуджис овны верөсыс дөрө. Овмөдчисны мянсянь неылө. А Розалөн тьотыс пыр ошкис Петя зятьсө.

Өтчыд, Выль во водзын, пырис мянө выль платтьоа.

— Чайтанныд али он, тайө выль платтьөсө Петя зятьө вурис. И вед сэтшөм стөча да ладнө пукалө ме вылын!— вывсьыс платтьөсө малалгтыр долыда висьталіс Марей баб.— Он и шу, мый абу нывбаба вурөма. Нолтө, висьталө, кымын мужичөй сиктаным кужө вурсьыны? Сөмын өти. Сідзкө, менам зять — медся бур! Роза нылөлы, коньөрлы, сирөтинушкалы, везитіс: Ен ськөд, бур мужик сюри.

— Да, жаль, мый Анна чойыд татшөм томөн куліс. Висьөмыд тай оз юав. Öнi эськө радліс да радліс,— дөжналіс мам.

— А Петялөн ки помсьыс, төданныд кө, зөлөта киссьө: ставсө кужө вөчны. Сө ей богу, киподтуя, он нин шу.

— Збыльысь?

— Да, чадө. Гортас ачыс вөчөма... Кыдзи бурджыка шуны? «Стенка», перегородка местаө. Сэни и книга, и мича тасьтi-пань видзан шкап. А медся чуймөданаыс сийө, мый кутшөмкө чертөжъяс серти кужөма вөчны кыскыссян пызан. Колө сөйны — кыскылан сийөс джодж шөрө; помалан — бөр пыртан «стенкаас». Чудеса да и сөмын!— аслас бокъясө кинас клопайтiс Мария Петровна.

Сийө кадө бур пызан-улөс вөчысь мастеръяс сиктаным эз вөвны. Лавкаын эз жө вузавны. Вөдитчисны сийөн, мый коркө пөльяс вөчлөмаөсь: прөстөй пызан-диван-улөсөн. Но озырджык йөзлөн важ кадө мебельыс вөлөма нин: заказ серти вөчлөмаөсь волөм мастерөвөй йөз.

Миян нэмөвөйся керкааным унатор на дзоньвидзаөн кольөма важ олөмсьыс. Мича тасьтi-пань видзан шкапъяс: стеклөысь вөчөм өдзөсторъясөн, гуся, йөзысь дзөбөм томанъясөн. Быдпөлөс ичөтик пызаныс: и гөгрөс, и куим пельөса, аслыспөлөс, синмад шыбитчана кокъясөн. Мичаысь-мича стөнын өшалысь ыджыд рөмпөштан.

— Да, татшөм мортыдкөд шог оз босыт. Ов да ов,— шуис мам.

— А збыль кө,— Марья баб чинтiс гөлөссө, мед ставөн оз кывны,— меным оз кажитчы, мый зэв сөрниттөм. Мукөддырйи сылөн кыв оз пет. Но мед. Главнөйыс сийө, мый оз ю. Вомас дзик оз босытлы.

Розакөд матөджык ме төдмаси тулысын, кор лэдзисны каникулъяс вылө. Бур шондiа лунъясө сийө тшөкыда гуляйтiс ичөт кагаыскөд. Öтчыд корис менө новлөдыштны кагасө коляскаөн, кыгчөдз пө оз унмовсь. Сэсся мөдысь корліс, коймөдысь... Сідзи и кутiм ёртасыны.

Роза вөлі меысь сизим воөн ыджыдджык, но нинөмөн тайөс эз петкөдды. Сөрнитiс кыдзи аскоддьөмкөд. Вөлі век мелi да шань. Сылы гажтөм вөлі лунгыр пукавны гортас, и кольывліс менө кагаыскөд некымын час кежлө, ачыс ветывліс отсасыны верөсыслы вөчны кокни уджъяс: ёнджыкасө краситчис, өти

сайысь и съом најөвितыштіс. Кагаыслы вөлі сөмын на куим төлысь, и вөлі сійө дзик мамыс кодь. Мичаник, сэтөр кодь съод синъяса. И нюмъялысь, войт абу бөрдысь.

Комнатаыс, көні найө олісны, ёна торъяліс миян сиктса жыръясысь. Кор медводдзаысь пыри на ордө, шензьөмөн дыр видзөді гөгөр — любуйтчи. Роза аддзис тайос да нюмъялігтырйи шуис:

— Ставсө вөчис менам Петрусь. Аслас киөн.

А синъясыс сэтшөм шудаось!

Менө ёна чуймөдісны книгаяс. Шкап тыр. Дзик выльось. Мича коркааось. Гортын миян книгаяс эз вөвны. Чукөртны модаыс эз на во. Мый вылө нө, сідзкө, библиотекаыс? Вөлі сөмын кык книга. Кыкнанныс зэв ыджыдось да кызось. Өтиыс — «Библия», мөдыс — Островскийлөн пьеса чукөр. Кор вөлі воа школаысь, бабө ваяс инпөлысь «Библиясө» да тшөктас лыддыны. Ачыс эськө велөдчылөма вичкоувса школаын, но синмыс лёк, өчки колө. Лыддя. Пыр кывзыси, төді, мый чойяс оз кутны сылы лыддыны. Кытысь воөма миянө мөд книгаыс, пьеса чукөрыс, ог төд, но сійө век жө куйліс инпөлын, вылыс джаджйын, «Библиякөд» орччөн. Ичөтджыкнам лыдди и сійөс. Юрө коли сөмын өти пьесалөн нимыс — «Бесприданница». Гашкө, медъёна кажитчис да.

А лыддысьнытө ме зэв ёна радейті. Библиотекаысь книгаяс-сө вайлывлі моздор тыр. Быд прөст здукө лыддысьлі. И весиг сөйигөн. Пукся книганас ыджыд пызан помө, самөвар сайө, медым некодлы не мешайтны. Мам-бать пыр видчисны, но мый мекөд вөчан, сэтшөм кө чужөма.

Том гозъя казялісны книгаяс дорын бергалөмөс и сетлісны мыйскөрө лыддыны гортын. Өтчыд менам пөдруга наянпырысь нюмъөвтис да юалис:

— Оля, мый ыжда платтё новлан? Мыйкө тэ зэв нин жебиник да кос.

— Ме ог төд. Магазинысь платтё миянлы, чойяслы, эз на ньөблыны. Мам век ачыс быд праздник кежлө вурө.

— Вай мерка босьтам, мед водзө кутан төдны.

А вежон мысти сійө мыччис меным кутшөмкө тубрас.

— Мый тани?

— Гортад разян да аддзан. Тайө миян Петруськөд тэныд кага видзөмысь козин.

Тайө вөлі модной платтё, и вурөма лекало серти Розалөн верөсыс. Еджыд рөма, выліас ичөтик дзоридзьяса ситечысь. Дзик стөч меным. Дерт, зэв ёна кажитчис. Новлі любөпырысь бура дыр.

А ывла горйын төдчис нин көдзыд арлөн лов шыыс. Шонді кутис водза-водз дзебсясьны. Керкадорса пашкыр кыдзьяс вылын, быттё кортөм гөсьтъяс, тыдовтчисны өтка виж коръяс.

Өти татшөм гажтөм лунө Роза котшкөдыштіс өшиняс да корис менө пыравны. Сійө вөлі жугыль, бөрдөм синъяса. Чужөм сертиыс төдчис, мыйкө семьяаныс абу ладнө.

— Мыйкө лоис, Роза?

— Эз... нинөм сэтшөмыс...

«Стенка» сайысь сійө петкөдіс фотоплёнка.

— На, Оля, видзодды. Менам дона верөсөй войнас плёнка тыдөдөма да өшөдөма косьмыны.

— Но и мый?— ме нинөм на эг гөгөрво.

— Видзодды бурджыка. Аддзан?

— Мый?

— Синъяссө өти мортлысь парсалөма...

— Кодлысь?

— Бур верөсөйлөн мусукыслысь. Вөлөмкө, Петрусь гуляйтө. Быд кадрикын сьөлөм косьтысысь. Быдлаын сийө... быдлаын...— синва сорөн юксис аслас шогөн Роза.

— А коді тайөс вөчис? Синъяссө?

— Ме. Коді нө? Емөн бытшлалі... Сідзи сылы и колө!

— А Петясыд он пов? Ода пөшти став плёнкасө торкөмыд.

— Ог. Öні меным ставыс веськодь.

Ме нөшта на сюсьджыка видзөдді кадрикъяс вылас, и дум вылө уси сийө луныс.

...Неважөн миян сиктса ныв-зон мөдөдчөны вөлі неылысса сиктө том йөзлөн фестиваль вылө. Ми, челядь, сулалім берег дорас да видзөдім, кыдзи найө гажаа, гудөк шы улө пуксялөны уна рөма флагьясөн мичмөдөм ыджыдысь-ыджыд пыжө. Кор ставөн лючки-ладнө пуксялісны, Петя, Розалөн верөсыс, кутіс тшапа быд боксянь найөс снимайтны. Мунысыяс шөрын вөлі и... Светлана — сельпоса том специалист. Сийө дзик пыр шыбитчис меным синмө аслас мичлунөн да авъялунөн: гырысь лөз синьяс-нас, еджгов кудриа юрсинас, мелі, сибыд нюмнас. И пыр жө кажитчис. Нинөм омөльторсө сы йылысь эськө эг думайт, и сиктысь татшөм сёрнияс эг кывлы. Гашкө, Роза весьшөрө лёк-лунсө кутө сы вылө? Но не меным та йылысь шогсьыны. Меным водз на татшөм дзутсьөм гөрөдьястө разьны.

Мый вөлі водзө Роза да Петя костын, ог төд. Ывла поводдяыс дзикөдз торксис, быд лун кутіс зэрны. Пөдруга эз нин петав кагаыскөд гуляйтны. Да и миян каникуляс помасисны. Заводитчис выль велөдчан во, и лунтыръясөн вошласим школаын.

Вежон мысти, кыдзи и век, рытнас миянө лэччис Марей баб и пуксис «аслас местаө» — лөз сундук вылө. Талун сийөс быттьө кодкө вежөма: зумыш, рам, шөйөвошөм.

— Шогыс кутшөм...— аслысмоз ньөжйөника лэдзөдіс сийө.

— Мыйкө лоис? Кодкөд нө?— повзис мамө.— Кутшөм нө шог суис?

Марей баб дыркодь ышлолаліс, сэсса заводитіс:

— Да, ті весиг думайтны он кужөй. Миян бур зятьным вед йөймис!

— Мый, мый?!— мамлөн тайкө чай блюдыс кисыс усяс.

— Да, йөймис и выйым. Юрас катөма да. Гортас пызан-шкапьяссө черөн керавлөма...

— Мый ачыс вөчліс?

— Да.

— Оз вермы лоны! Вед медся бур зять вөлі! Ачыд пыр ош-кин...

— Ошки да ошкө пөрис. Абу колөма ошкыны. Пөрысь нин, а век на йөй. Ачымөс шуа... Вед төда: некор оз ков ассьыд ошкыны.

— А мыйла нӧ зятъяд татшӧмторсӧ вӧчис?— эз сетчы мамӧ.

— А кодӧ тӧдас, мый семья костад овлӧ. Роза нылӧ, коньӧр, сӧмын бӧрдӧ. Шуӧ, бур зятъным пӧ и юыштавны кутӧма.

Ме кывзӧ тайӧ сӧрнисӧ и эг вермы эскыны, кызди татшӧм страсътыс да йӧйлуныс вермӧ лоны семья костын. А веськыда кӧ шуны, Петяыс коркӧ ӧтчӧд петкӧдӧлис нин ме дырся ассьыс лӧк сямсӧ. Торксӧм вежӧрсӧ. Сэтшӧм лӧкыс горӧдӧс гӧтырыс вылӧ, мый меным эз ло лӧсьыд Роза водзын, ӧдӧджык петӧ да мунӧ гортӧ. И та бӧрын эг зӧль пыравны на ордӧ верӧс дырйиыс. Полӧ весиг сӧлӧн скӧр видзӧддасыс.

— Нинӧм, кодкӧд оз овлы. Томӧсь на. Бӧр бурасясны, лад вылӧ усясны,— кутӧс шаньмӧдны шогӧ усьӧм Мария Петровнаӧс мам.

— Мед Енмыс видзас да сям сетас,— чӧвтӧс пернапас мӧдыс.— Пасибӧ тӧныд бур кывъяссьыд.

Ме, дерт, тӧдӧ, мыйын делӧыс. Парсалӧм синъяса фотоплӧнка! Ме думысь, Роза тайӧс вӧчис думайттӧг, нывсӧ весьшӧрӧ мыждӧс... А мӧд ногӧн кӧ, кодӧ тӧдас, мый йӧз сӧлӧмын вӧчсьӧ?

Регыд мысти том гозъя виччысьтӧг мунӧсны овны юрсиکتӧ. Петялы вӧзйисны выгоднӧджык удж.

Праздникъяс

Полина, абу нин том нывбаба, водз асывнас, кызди и век, петӧс град йӧрӧ теплица восьтавны. А ывлаас тувсовъя шондӧыс синтӧ ӧрӧ. Жар. Кӧть лысва на абу косьмӧма. Дзирдалӧ кок улад, быттӧ бриллиант содз.

Ӧдӧджык восьтӧс теплицасӧ, сӧсся гӧгӧртӧс ассьыс радейтана дзоридзьяссӧ. Видзӧдӧлис, ӧна-ӧ быдмӧмаӧсь вой чӧжнас да абу-ӧ ӧн тӧлысь чегӧма кодкӧ на пиысь. Медбӧрын матыстчис яблӧк пуяс дорӧ. И чуймис. Кыкнан пуыс заводитӧмаӧсь дзоридзавны. Ӧттшӧттш. Медводдзаысь. Тайӧ лунсӧ нывбаба виччысис нин некымын во. Тӧдӧс, мый яблӧк лоӧ сӧки, кор орчӧн розъялӧны кык либӧ некымын пу, и сӧки лоӧ падвежӧн гӧрддзысьӧм. Нӧшта, медым найӧ вӧліны разнӧй сортаӧсь. Ӧти пу сикас плод оз сет.

Полиналы лоис сэтшӧм лӧсьыд сӧлӧм вылас! Тӧрыба пырис гортас, медым юксъыны аслас шудӧн верӧсыскӧд. И кыкӧн найӧ бара на петалисны йӧрӧ. Весиг снимайтӧсны розъялысь чальяссӧ.

Сӧсся нывбаба ломтӧс пач, пӧжалӧс рыська шаньгаяс. Талун сӧлӧн зӧв шуда лун, колӧ корлыны гӧсти пӧдругаяссӧ.

— Алӧ, Ирина, видза олан! Мый нӧ керан?

— Нинӧм ог. Шойчча. Вылӧн град йӧрысь пыри. Жар лои да.

— Сӧдзкӧ, воны чай юны. Пыр жӧ. Менам талун зӧв ыджыд праздник.

— Ог тӧд, Поля... А кутшӧм нӧ эськӧ праздник? Первомай важӧн нин колис. Тувсов Микӧла тожӧ. Нимлунӧдзыд во джын на.

— Воны, воны. Ачыд аддзан, кутшӧм. Виччыся.

— А Наталья пӧдруганымлы звӧнитлӧн?

— Да.

- Тшөтш локтас?
- Локтас, дерт.

Час мысти кымын Ирина пырис Полинаяс ордө. Наталья водзджык воома. Дөнзёма нин виччысыны пөдругасө. Пыр жө босытчис ропкыны:

— Дыр тай локсян? Век сёрмөмьд. Мый нө та дырасө вөчин гортад?

— Пока пасытгаси да, локти да,— гир-гир серөктис Ирина, эз дөзмы сы вылө.— Öти сикт помысь мөд сикт помө. Абу тай матын.

— Бара нин, өтка ныв, выль платтьоа,— пырөдчис сёрниө көзьяйка.— Век на модничайтан!

— Но! Дас во сайын ньөблi. Он өмөй помнитөй? Зэв на и дона вөли.

— Тэ өд донтөмөс он ньөб, төдам. Но вайө, гөстяяс, пуксямө пызан сайө. Талун рыська шаньга пөжалi. Төда, мый тi радейтанныд!

— Көни нө, Поля, верөсыд? Оз тай тыдав.

— Ягө мунис машинаөн. Оз көть и волы сэтысь.

Кор ставөн пуксисны сөянөн тыр пызан сайө, Наталья делөвөя юалис:

— Но, Полина... Öни висытав, мыйла миянөс корин, мыйөн тэнө чолөмавны?

— Нывъяс, талун ме сэтшөм шуда! Быттьө ыджыд праздник менам. Талун град йөрын быдса кык яблөк пу босытчисны дзоридзавны!

— Пара во сайын на висытавлін, мый дзоридзалө яблөкыд. Тадзи жө корлін миянөс чай юны,— дзугис пөдругаыслысь сёрнисө Наталья.

— Сэки первойысь розъялис өти яблөк пу, а талун кык. Вөлөмкө, мукөд пуыслы, кыдзи и мортлы, колө гоз, медым мыйкө чужтыны. Таво, гашкө, и яблөк воас. Мед көть весиг өтик, и сылы лоа зэв рад.

— А яблөкыд кор кисьмас, бара на корлан миянөс?— нюмьөвтис Наталья.

— Быть. Гөрд вина на юыштам. Öти румкаөн. Унасө вед, төда, он юө.

— Да-а. Менам, бур көзьяйкалөн,— содтис Наталья,— теплицам весиг өгуречыс оз бура артмы, а тэнад мыйыс сөмын оз быдмы! Мыйөн сөмын миянөс эн гөститөдлы! И аслад арбузөн, и аслад дыняөн, баклажантө ог нин шу. А таво көсьян и яблөкөн чөсмөдлыны.

— Зато тэнад, Натальюшка, бура быдмөны и картопель, и капуста, и морков, а менам сэтчө сям оз тырмы. И тэ, Ирина, асьтө эн омөльт, ставыс тэнад тую жө. А керка дорад сы мында дзоридз! Та мындаыс сиктаным некодлөн абу. И ставыс сэтшөм мичаөсь! Көть синтө эн и вештыв. А медся чуймөданаыс сийө, мый йөрад ни өти өг турун оз өшйы. Гашкө, полөны тэысь. А менам — пидзөсөдз. И некыдзи ог вермы мынтөдчыны,— шмонитис Полина.

— Поля, а кыдзи нө тэнад юрө воис яблөк быдтан мөвпыс? Төдан өд, мый налы колө шоныд, а миян танi көдзыд,— окота төдны Натальялы.

— Веритö кöть эн, том дырйи на, кор велöдчи карын, вöтаси явö: быттьöкö ме гортö локта. Гожöмын. Луныс кымöра, пемыд. И аддза: кутшöмкö важ керка дорын, дзик стен бердас, быдмöма яблök пу. Абу ыджыд. Морт судта кымын. Корйыс этша, а яблökыс уна. Гырысьысь-гырысьöсь. Гöрдьысь-гöрдöсь. Ме сэки зэв ёна чуйми. Кызди нö, мися, мян войвылын вермис татшöм дивöыс быдмыны? Вежөрö тайö вöтыс колис нэм кежлö. Важөн нин абу важ керкаыс. Сы местаын сулалö выль, мича коромина. Но некод оз ов. Том кöзьяйкаыс врачөн уджавлис... Помнитанныд, сикт дораным тай самолёт усис. Ставөн сотчисны. Сийö сэни жö вöлöма...

— Эн нин казътыв тайöс...— дугöдис Полинаöс Наталья.

— Пыр вöли думайта, гашкö, мися, яблökыд мяннын тожö быдмас. Со тай, арбузыд быдмö. Асьныд тöданныд, теплицаын важөн нин быдта. Во дас. Зэв интереснö вöли тöдмавны, кытысь да кызди лö ыджыд юмов мачыс. Вöлöмкö, öгуреч моз жö позьö быдтыны. Нинöм сьökыдыс абу. Дерт, сразу оз артмы. И колö бур поводдя да опыт.

— Школаад уджалигөн тай кымынысь вайлин аслад класса челядылы. И мянöс чöсмöдлин.

— Öтчыд, помнита, арбузсö учительскöйын сёйим и колим география велöдысьлы пайсö. Пуктим тасьтисö сълөн пызан вылö. Кор воис урок вылысь, пыр жö и юалис: «Кöни арбузсö вузалöны?» Дыр эз эскы, мый менам теплицаысь. Видлис, да ме и юали: «Мыйöнкö торъялö магазинсаысь?» «Оз. Чöскыдджык на. Збыль асьныд быдтинныд?» «Дерт, ачым».

Полина водзö юксис пöдругаясыскöд аслас мөвпъясөн.

— Важөн, тöданныд öд, ылысса сиктъясö арбузтö пöшти эз вайлыны. Август помын конференция вылö вöли ветлам да сьöрсъыным век ваям гортсалы чöсмасьны. А öни гожöм кöть ар — магазиннын вузалöны. Дерт, деньгаыд кö эм, ньöб мыйта колö. Но сёровно быдта. Аслым интереснö. Да и дынятö öни вайöны. Том кадö верöскöд ветлим теплоходөн Волга кузя. Путёвкаөн. Астраханьын бахча вылö экскурсияөн нуöдлисны. Сэни и аддзыли, кызди арбуз да дыня быдмöны. Дыняыд мяннылы сэки дзик эз кажитчы. Шыбитим черияслы теплоходса каюталөн öшиньöд. А öни велаим. Ассьыным сёям, и кöть мыйта.

— Да, пöрысьмыны кутим...— вежис сёрнисö Наталья.— Оз и эскыссы, мый коркö томöсь вöлим.

— Томдыртö, Наталья, он бергöд. Но веськыда кö шуны, и öни на мяннылы бура овсьö,— öлöдис сийöс Ирина.— Помнитанныд, кор воим татчö уджавны, керкаяс дорын некодлөн нинöм эз быдмы, весиг öградаяс эз вöвны. А öни быд керка дорын дзоридза сад. Олöмыс вежсьö жö. И бурлань.

— Но мый, Полина? Пасибö чайсьыд, чöскыд шаньгаяссьыд,— сувтисны пызан сайысь нывъёртъясыс,— а öни вай петкöдлы ассьыд яблök пуястö. Зэв нин окота видзöддыны.

Град йөр шöрын, ыджыд теплица дорас, тувсовъя жар шонди улын красуйтчисны кык пу. Быттьöкö кык невеста асланыс виж платтьö вылö еджыд мича дзоридзьяс пысалöмаöсь.

Ирина да Наталья чуймöмөн видзöдисны мичлун вылас: татшöмторсö войвылын быд лун он аддзы.

— А кынмасны кө дзоридзьясыс? Войнас өд зэв на көдзыд овлө,— пыр жө и юаліс быдторйысь шогсьысь Наталья.

— Öні оз нин кынмыны, а вот зэв көдзыд төвнад асьныс пуясыс вермасны кынмыны.

— А сэки нө мый кутан вөчны?

— Менам со нөшта на яблөк пуясыс быдмөны. Кагукъяс. Куимөн. Видзөдлөй. Найө, гашкө, вояс мысти ыджыдөсь жө ласны. Пошта пыр лунвывса быдмөгъяссө и водзө заказывайта.

— А тайө нө кутшөм пуяс? Ыджыдөсь тай нин, морт судтаось. Абу льөмъяс?

— Абу. Сливаяс, кыкөн жө. Гашкө, мөд во кутасны дзоридазавны. Пөра нин, вит-квайт во коліс.

— А тайө вишняяс?

— Да. Öтикыс дзоридзаліс нин кольөм во. Ставнас еджыд вөлі. Но эг и төдды, розъясыс ставнас киссисны: либө лёк төв нуис, либө кутшөмкө гаг бырөдіс. Öти тусь и лолі. Ачым эг и сөй. Чөйлөн пи карысь воліс гөститны, да сылы сеті видлыны. Шуис, чөскыд пө.

Ириналы синмас шыбитчис нөшта öти дивө. Ичөтик куст. Дзик еджыд. Дзоридзьясыс виноград роз ыдждаось, сьөкыдөсь — көть чальяссө чегасны. Горөдіс көзьякасө:

— А тайө нө мый, Полина? Дзоридз али куст?

— Тайө сирень. Шусьө «Москваса красавица». Кажитчис? Медводдзаысь розъялө. Книгаас гижөма: эм кө көнкө мирас медмича сиреньыс — тайө «Москваса красавица». Колесниковлөн быдтас. Пошта пыр жө закажитлі.

— Меным эськө татшөмыс колө жө.

— Эн шогав, вужйөдөм засө арнас сета. Водзө ачыд рөдмөдан.

— Бур эськө. Сөмын эн вунөд.

Кор гөстяяс мунісны, Полина пыр жө петіс град йөрө. Кодыр яблөк пуяс розъялөны, колө кыдзкө найөс падвежөн гөррдзысьөдны.

Дерт, нывбаба төдіс, мый тайө уджсө вермасны вөчны гутгаг либө варов төв, но журналысь лыддис, мый тайөс позяс вөчны и аслыд. Сідзи жө, кыдзи теплицаын гөррдзысьөдліс арбуз да дыня.

Видзчысьөмпырысь орөдіс яблөк дзоридз да небыдика некымынысь тшукөдчыліс сійөн орччөн сулалысь пу вылын паськалөм розъясө. Сэсся босьтіс сійө пу вывсьыс роз да матыстчис мөд пу дорас. Тадзи вөчис некымынысь. Öні көть öти яблөк да лоас! Сөмын колө виччысьны.

...Быд асыв, чеччөм бөрас, өчкиасяс да медводз петалас йөрө, мед видзөдлыны, кутшөм нин вежсьөмъяс лоисны яблөк пуяс вылын.

Коли лун дас, пуяс век на дзоридзалісны. А сэсся Полина казьяліс, мый кыкнан пу вылас öткымын роз вылын плод заыс гөррдзасис и кутіс ёнмыны, зэлавны, а дзоридзьяс местаын мыччысисны виж анькытшкодь кымын неыджыд тусьяс. Вөлөмкө, тадзи и заводитө яблөкыд артмыны.

Полина лои сэтшөм рад, мый кутіс збыльмыны сылөн уна вося гуся думыс.

А сэсса некымын лун пöльтіс вой тöv. Кыдзи вермис нетшкис ставсö, мый веськавліс сълөн туй шөрö, и пуяс вылысь розъяссö тшötш.

Кор пуксис лөнъ, бур поводдя, Полина казяліс, мый кыкнан пу вылас кольöма сöмын некымын вотöсөн, зато зія босътчöма-öсь быдмыны коръяс.

Дзик быд лун бергаліс мам моз аслас быдтасъяс дорын. Поліс, мый друг бара петас лөк тöv да чегас жебиник плод заяссö. Либö катша-рака кокаласны кын вотöссö. Весиг верöсыс «вись-мис» яблök пуяснас: кадысь кадö быд боксянь снимайтіс быд-мысь плодъяссö.

Гожом шөрнас гортас воліс ыджыдджык пиыс семьяыскöд. Олöны найö лунвылын, дачааныс яблökсö мукöд воас пö воштыны некытчö.

Но и найö чуймисны. Дыр видлалöмаöсь гөгöрбок. Весиг öти яблök кок чегöмаöсь. Мöд луннас Полина аддзис сійöс сук турун пиысь. А сэсса и нöшта öти яблök вошис тайö пу вывсьыс. Гашкö, ракаяс гусялісны.

Колис öтик, но сійö вöлі крепыда овмöдчöма кык чаль костö. Усьны некыдзи. Быдмис и быдмис.

Август помын Полина бара звöнитіс пöдругаясыслы. Бара корис найöс «праздник» вылö.

Дасътысис сьölöмсянь. Быдгор вайис пызан вылас, мыйөн озыр град йöрыс. И арбуз, и дыня, и клубника. Пöжаліс рыська шаньгаяс. А пызан шöрас мича алькös тасьтi вылö пуктiс ыджыд, кисьмöм яблök.

— Но мый, Полина? Кутшöм нин тэнад талун гаж?— нюмъя-лігтыр юалісны нывъертъясыс, кор пырисны керкаас.

— Талун менам яблökлөн урожай праздник.

— А кöні нö яблökъясыд?

— Со тай, пызан шöрас!

— А ми чайтiм, мый магазинысь. Зэв тай ыджыд! Аслад? Некедзи оз эскыссы. Сöмын öти и лоис?

— Некемын эм на, но найö пока ичötöсь. А ме и öтикыслы талун рад и зэв шуда. А öні вайö видламöй яблökсö.

Кöзьяка тэрыба вундаліс сійöс нель шөрöм вылö. Верöсыслысь пайсö вештiс бокö.

— Видлöй! Гашкö, оз и кажитчы тiяны. Гашкö, и сёйны оз туй.

Наталья первой дыр исаліс яблök тшытшсö, сэсса курччыштіс.

— Ак! Кутшöм чöскыд! Абу на магазинсаыд. Войвывса яблök-ыдлөн кöрыс лöсьыдджык на вöлöма. Но тэ, Поля, и молодец!

— Сійö öд миян Мичурин,— сералöмөн содтiс Ирина.— А водзö мый кутан быдтыны? Ананас?

— Кötь век сералöй ме вылын. Но ме збыль сэтшöм шуда, мый ас синмөн аддзылі, кыдзи чужö да быдмö лунвывса плодыс. Öні кöсья на тöдмавны, кыдзи артмö виноград. Эм нин гуся дум: быдтыны кötь öти роз.

— А виноградсö нö кытысь босьтан?— пыр жö и юаліс Ирина.

— Менам сійö быдмö нин. Теплицаам. Куим во. Мöд во, чайта да, розъявны кутас.

— Ирина, эн вунөд. Во мысти, арнас, кутам сёйны Полина-лысь виноград!

— Окота эськө, но... Видзөдлам. Кыдзи шулоны рочөн, доживём до понедельника,— нюмдiс кöзьяка.

Лэбöны уткаяс

Данилалөн некыдзи эз кут кольны медбөрья урокыс. Видзөдiс эз дöска да тетрадь вылö, а öшиньö, кöни гажьялис тулыс. Некумын лун нин сикт весьтöд лэбöны уткаяс. Думьяснас детинка вöли эз урок вылын, а ты дорын, утка кьянинын. Со öти пуксис, со мöд...

— Данила, унмовсин али мый парта саяд?— кылис сийö велöдысьлысь гора гөлөссö.— Мыйкö тай он гиж?

Лидия Ивановна ыджыд тушаа, ён тэчаса нывбаба. Гöгрöс чужöма, руд мича синьяса. Зэв стрöг, но кор гораа серöктас, чужöмыс пыр жö вежсяс, весиг мичаммас. Сийö зэв ёна кöсийö, медым кöкъямысöд класса челядь бура тöдiсны ассыныс чужан кывсö. А Данилалы, кыдзи аслыс чайтсис, оз сетчы гижасян урокыс, пыр вöчö уна öшыбка. Зато зэв ёна кажитчö география. Сэтысь сылы век пуктöны «пять». А öтчыд весиг корлисны ичöтджык классын нуöдны география урок.

Данила тэрыба босьтiс ручкасö да кутiс гижны мисьтöм почеркөн дöска вылысь -чч- да -тч- шыпаса кывьяс. Кор кылис звöнок шы, первойөн тювкнитiс парта сайысь да котөрөн мöдiс гортас.

Мамыс, дерт, эз на вöv. Воас сöмын рытнас. Колхозын сийö ыжъясöс видзö.

Данила тэрмасигтырйи мыйкö тшавкнитiс пызан вылысь, вежис паськөмсö, босьтiс вокыслысь кыйсян ружье, гартыштiс важ курткаö, мед некод оз аддзыв, гач зептас суйис некумын патрон да котөрөн-сорөн лэччис берегö. Бур, мый керканыс дзик ю бокас. Вокыслөн пыжөн вуджис ю мöдарладорö да гырысь воськовьясөн веськөдчис тылань. Латшкöс тушаа, паськыд пельпомьяса — мужик да и сöмын!

Ты дорын некод абу. Тайö бур. Пуксяс кö утка, лоас сылөн, сöмын колö веськавны! Данила тэрмасьтöг видзөдлiс гөгөр, аддзис бадьяс горулысь кодöнкö вöчöм сайöд да дзевсис сэтчö, медым не повзöдны уткаяссö. И кутiс виччысьны.

А гөгөр сэтшöм лөнъ! Ва веркöсыс рөмпöштан кодь шыльыд. Пуяс оз шувгыны, весиг ичöt лэбачьяс оз дзользыны. Уткаясöс виччысигмоз унатор усьлис дум вылас.

Танi Данила вояс сайын вöли нин ыджыд вокыскöд. Но вокыс öни абу: сьöкыда висьмис да кувсис. Мамыс век на синваасьö. И Данилалы вокыс жаль: вöли кö ловья, öни эськö öтлаын кыйсисны. Кыдзи шуö мамыс, вокыд пö ягысь да ва вылысь эз и вольты. Чери да яй пызан вывсьыныс эз бырлы.

Öтчыд, кыдзи помнитсьö Данилалы, сылы сэки вöли ар кöкъямыс, водз асылын найö кык вок ветлисны чериасьны. И сэтшöм ыджыд гөрд чери шедiс! Детинкалы вöли окота ошйысьыштны, мед йöзыс аддзыласны, кутшöм ыджыд чери найö кыйисны. И мырдөн корис вокыслысь, медым сетас черисö сикт кузя нуны сылы.

Вокыс өшөдіс сылы черисө мышладорас: юрсө Данилалы пельпом вылас, а бөжыс кыссьө муодыс. Тадзи и локтісны гортаныс.

Өтчыд урок вылын Павлин Алексеевич шуис: «Март 8 лун кежлө колө ас киён вөчны мамъяслы козин». А мамсө Данила зэв ёна жалитіс, од вок кулом бөрас став сьөкыд уджыс усис сы вылө.

Школаысь локтігөн пондіс кокъяссө лымыйсь весавны и казяліс, мый содвывса гөликыс дзыкөдз кыссьөма. «Колө выль рос вөчны,— думыштіс сюсь детинка.— Мамө лоө рад».

Мөд луннас урокъяс бөрын пыр жө котөртліс гөлик росла. Ылө эз и ков мунны, ю дорас баддыс — мыйта колө! Чегъяліс моздор тыр, вайис гортас да дзевис сарайө — мед мамыс водзджык оз аддзы! Весиг турунөн вевттыштіс. Ачыс вөлі зэв рад: бур козин лоө.

Рытнас могөн пырис рөдня ордас. Пыригөныс на казяліс, мый Лёня дядь вөчө выль гөликъяс, но оз баддысь, а кыз пу росъясысь. Зонкалы лои сэтшөм яндзим ас водзас. Бур көть, мый эз на удит вөчны бадь гөликсө. Серавлісны эськө. Сідзи нинөм мамыслы эз и козьнав.

А нөшта дум вылас уси зэв страшнөйтор. Öти жар гожөмө, кор сылы вөлі ар сизим, өтрасөн ворсіс гортас. Мамыс, кызди век, вөлі удж вылын, а ыджыд вокыс петіс суседъясө, Степан дядь дорө, коді оліс орччөн, пара шаг ылнаын. Оліс сійө өтрас, эз на пөрысь вөв, но пиньясыс кыссьөмаөсь, чужөмыс — быттьө некор абу мыссылөма. Но зэв гажа, смешитчысь мортыс. И ягынвөрын нэмсө ветлысь.

Ворсігмозыс Данила эз и казав, мый ывлаын поводдяыс вежсьөма, шондіыс пырөма сук кымөръяс сайө.

Друг войын моз пемдіс, кыптис вына төв, а сэсса өшиньясас кодкө быттьө кутіс кучкавны. Детинка зэв ёна повзис, кватитіс курткасө да тэрыба петіс гортсыс. А сэні мый вөчсьө! Му вылө шумөн гылалөны чипан кольк ыджда йи маच्याс. Данила куртканас вевттис юрсө да котөрөн уськөдчис вокыс дорө, Степан дядь керкаө. А сэні некод абу. Пызан вылас кык тыртөм стөкан, өшинь восьса...

— Вокө, көні тэ?— мый вынсыс горөдіс Данила.

— Танөсь ми!

И пу крөвать горулысь тыдовтчис первой öти юр, сэсса мөд. Вөлөмкө, найө вина румка дорад абу пыр казялөмаөсь, мый неминуца локтө, и сөмын сэки повзьөмаөсь, кор шерыс жугөдомө өшиньсө. Вот и пырөмаөсь крөвать горулө.

Виччысьтөг Данилалысь думъяссө дзугисны кык утка: найө лөня пуксисны пөшти ныр улас. Кутшөм любө вөлі видзөдны, кызди юрнысө вылө лэптөмөн найө уялөны ва веркөсас. Но кыйсысьлөн могыс — стөча лыины. Босьтіс найөс мушка вылө, личкис куроксө. Öтик уткаыслөн юрыс лигыша сунгысис ваө, а мөдыс пыркнитчис бордьяснас, качөдчыліс вывлань, но бөршняпкысис. Данила лои зэв рад, мый өтпырйө кыкөс лыис.

Öні колө вөлі судзөдны найөс. Кытыськө кыпөдчөм төв ныр нуис уткаяссө эз берегань, а мөдарө — весиг кузь шатинөн он нин судзөд. Пыж, көть өмөлик, тані абу. Мый вөчны? Ковмас аслыс пөрччысьны да варччывны. Данила сідзи и вөчис. Пөрччысис, но кор пырис ваас, нымөн сьлөмыс эз сувт көдзыдысла.

Дерт... Водз тулыс, берег пөлөн көнсюрө йи на куйлө, абу купайтчан кад.

Дум вылас уси, кызди ичөтджык классын ыджыд перемена дырйи найо котравлісны купайтчыны. Йи сөмын на вөлі кылалөма. Берегдорса луд вылө кольөма ыджыдкодь ва гөп, сэні и купайтчисны, а сэсса котөрөн бөр кайлісны школаө. Учителяс кывлөмаось да висьталөмаось директорлы. Мария Георгиевна сувтөдіс став школасө построение вылө. Видзөдліс, кодлөн юрыс ва. Зэв ёна видіс: «Висьманныд кө, коді кутас ті вөсна кывкутны?» Зонкаяс көть и зэв ёна полісны Мария Георгиевнаысь, мөд луннас бара на котөртлісны, но өні юрнысө эз нин көтөдны.

Ваысь упкигырйи петөм бөрын Данила шыбитіс уткаяссө му вылө, а ачыс тэрмасьөмөн кутіс пасьтасыны. Кор шоналыштіс, көсйис бөр дзэбсьыны, но эз удит. Кылісны кок шыяс, и бадь сайысь петіс Степан дядь, суседныс. Ружьеөн. Кыйсьыны жө локтөма.

— Данила, тэ?

— Привет, Степан дядь!

— Мый нө керан?

— Утка лыя.

— Өні тэ лыйин?

— Да.

— А сюрис?

— Кык.

— Но и молодец! Вокыд кодь жө бур кыйсьысьөн лоан. А кызди нө уткаяссө васьыс босьтін? Пыжыс тай абу. Али бөр баддяс пыжтө дзебин?

— Варчылі.

— Збыль?! Эн омөй кынмы йиа ваас? А висьман кө? Тэ бара, чадө, эн шутит. Кынмыны абу дыр, век на со тіралан. Вай өдйөджык мун гортад да шонтысь.

Данила ачыс нин гөгөрвоис, мый бурджык лоө, мөдас кө гортас. Сійө тэрмасьтөг кутіс чукөртны оlassө. Ружьесө бөр дзебис куртка пытшкас, пунктіс питшөгас утка гозсө да мөдіс.

— Энлы, Данила!— чукөстіс сійөс Степан дядь.— Тэ ружьенад өстөрөжнө. Тэныд оз позь на сійөн ветлөддыны. Сюран кө милициялы, босьтасыны... Школатө помалан да сэки и кыйсьысь лоан.

— Төда, Степан дядь. Абу ичөт,— мунігмозыс нин шуис Данила, а ачыс думыштіс: «Мамө кө оз тшөкты вокөлысь ружьесө водзө босьтны, ог босьт».





Нюмъэвтис сьолөм

КЫВБУРЪЯС

Рытив-вой төв

Инас оз өшйыв рытив-вой төв.
Кучкас да дзебсяс, быттьö эз вöv.
Здук мысти сывйөн бергöдчас бөр.
Ас пытшкö некыз сийö оз төр.

Өвсьытöм чöрс моз бергöдлö лым,
Отпырйö овлö кöдзыд да пым.
Бытшкасьö лымйөн, мунны оз сет.
Ывлаö понйöй весиг оз пет.

Эрд вылын асьыс петкöдлö вын.
Кутлас кö, öдйö сысыс он мын.
Сюран кö гыжъяс, ас гөгөр педз,
воськовтны водзö төв ныр оз лэдз.

Кодзув

Дзирдалысь кодзув, ме тэнö аддзи,
енэжтас вылö тэ дорö качи.
Öдйö тай кызкö сибöдін менö,
кылан, а тайöс вежөртін эн-ö?

Ойдлис кöть югыд муслунөн сьолөм,
пöдлалі öдзöс... Гөтыра вөлөм.
Торйöдчөм бöрын век жö тэ матын,
пыр быттьö орччөн, кöть абу татөн.

Ыдждöдлін менö, сöстөмөн шуин.
Кытчö нö кокни лов шыöс нуин?
Эзысьөн важ моз лолöй оз пöртмась.
Тöдны кö водзвыв, эг эськö тöдмась.

Окав менö

Лымйö, лымйö, окав, окав менö!
Кыпыд видзöдласöн паныдала тэнö.
Бывлаыс көть чизыр төла, ыркыд,
асья рунад войся руос пыркöд.

Лымйö, лымйö, окав, окав менö!
Кöдзыд дырйи виччыси ме тэнö.
Шондöдас öд, кор тэ лунбыд усян,
кор тэ лöня муяс вылö пуксян.

Лымйö, лымйö, окав, окав менö!
Турöб шöрын йöктöдышта тэнö.
Сывъясям да бергалышта вальсын,
воша тэнад паськыд еджыд пасьын.

Лымйö, лымйö, окав, окав менö!
Вывтi ёна радейта ме тэнö.
Банйöд чужöмöс да нюмöс öзты,
помтöм мелiлунын лолöс пöдты.

Асья гöсьтьяс

Садьми. Нюмъөвтiс сьölöм.
Танi гöсьтьяс нин вölöм.

Чöвлун ветлалö ньöжйö,
бара ойбыртны вöзийö.

Пельöсын черань-пöчö
везтi надзöник лэччö.

Тувсов төв воис кыськö,
бусöсь джаджъясöс чышкö.

Лэбач ывлаын дзользьö,
позьö овны пö, позьö.

Еджыд кунöрттор кывтö,
мусö енэжкöд йитö.

Зарни кияса кыа
дöра дзирдъясысь кыö.

Шондi öшиньöд пырис,
керка гажлунöн тырис.

Чолöм, донаяс! Чечча.
Мыйкö чöскыдтор вöча.

СЫКТЫВ Ю

Чолөм, төвся Сыктыв ю!
Кыдзи-мый нин кывтан-олан?
Во гөгөр тэ меным колан.
Лызь туй тэнад медся бур.

Чолөм, тувсов Сыктыв ю!
Кыдзи-мый нин кывтан-олан?
Во гөгөр тэ меным колан.
Йитө кылөдиг эн дур.

Чолөм, гожся Сыктыв ю!
Кыдзи-мый нин кывтан-олан?
Во гөгөр тэ меным колан.
Сэтчөдз варчча, кольмө юр.

Чолөм, арся Сыктыв ю!
Кыдзи-мый нин кывтан-олан?
Во гөгөр тэ меным колан.
Кыа рөма ваыд — сур.

Сьолөм нормөдана, шань,
Визув, бытьё коми ань.
Тэсьыд мусаыс оз сюр.
Нимкодпырысь водзё тюр!



Мый вӧлі сё кызь во сайын

Ӧнія лыддысысыяс, дерт, оз ёна тӧдны Ыджыд ӧксы Сергей Александрович Романовлӧн, бӧръя роч сар Николай Второй дядьлӧн, Коми муӧ волӧм йылысь. А сэтшӧмторйыс вӧлі 1898



воын. Воинскӧй командаяс да командиръяссӧ видлӧм могысь Сергей Александрович сәки кытшовтлӧма Вӧлӧгда губерня, кежавлӧма и Усть-Сысольскӧдз.

Сәкся комияслӧн лабутнӧй олӧмын тайӧ зэв ыджыдтор вӧліс, ёна шызьӧдліс коми пармасӧ и коми войтырсӧ. Шемӧс, дерт: сар вира морт локтӧ, сар дядь, пӧшти ачыс Роч сарыс, код йылысь сӧмын мойдыяс, лубок-серпасъяс да «Вологодские ведомости» лист бокъяс серти тӧдісны. Ми ӧд ӧні правительстволысь да президентлысь быд несйыштӧм кывлам, а сәк мӧд ногджык на вӧліс телевидение да интернетӧгьд. Да и мый кӧть эн шу, а сар дорӧ комияс сәк вежавидзлісны ёна на, ен туйӧ на пуктывлісны.

Май кызь квайтӧд лунӧ поездӧн Сергей Александрович воӧма Вӧлӧгдаӧ. Водзӧ сәсся

катӧма Эжва ю кузя «Царевна» паракодӧн. Май 30 лунӧ воӧма Тотьмаӧ, май 31 луннас — Югдінӧ (Устюгӧ), юнь ӧтикӧд лунӧ сувтлӧма Совдорӧ (Сольвычегодскӧ), юнь мӧд лунӧ — Яренскӧ, а сәтысянь нин мӧдӧдчӧма Усть-Сысольсклань. Катігмозыс Сергей Александрович сувтлӧма и Емдінӧ, коми-зыряналӧн медваж юрсиктӧ.

Юнь мӧд лунӧ, дас ӧти час комын минутын, «Царевна» паракодъд пырӧма Емва вомӧ, но кос ва понда берегӧдзыс абу сибалӧма да, Ыджыд ӧксыӧс вуджӧдӧмаӧсь паракод вывсяньыс пыжӧн. Емдін ӧзынын сійӧс няньӧн-солӧн да зібйив Спасӧн паныдалӧмаӧсь Емдінса благочиннӧй, орчча кык приходса попъяс да Емдін гӧгӧрса сиктъясысь чукӧртчӧм войтыр. Сергей Александрович пыравлӧма Перымса епископъяслӧн важ кафедральнӧй Благӧвещеннӧ вичкоӧ, сән копыртчывлӧма Ярасим, Питирим да Иона ӧкӧлъяслы* да босьтӧма настоятельсянь дона

* Ӧкӧл — *моци*.



козин — комиясӧс православиеӧ пыртысьясльсь образсӧ. Сэсся Ыджыд ӧксыӧс нуӧдӧмаӧсь Аркандел Микайлӧ вичкоӧ, кодӧс Перымса Степан на лэптывлӧма важ комияслӧн пузувтлӧм вежайнӧ. Сергей Александровичлы лов вылас воӧма зэв мичаа баситӧм Царскӧй врата да, сийӧ чуйдӧма: татшӧм мичсӧ пӧ колӧ Вӧлӧгдаса древлехранилищеӧ* нуны, мед унджык йӧз аддзывлас. (А кысь нӧ он? Миян комиысь ӧд бурсӧ да мичасӧ поводнӧя нуисны Мӧскуваӧ, Питерӧ, Кардорӧ, Вӧлӧгдаӧ... Аслыным, комияслы, тыдалӧ, мичыс оз сы выя ков). Вичкоысь Сергей Александрович зэв нин сӧрӧн петӧма. Час вой бӧрын сӧмын слӧймӧма бӧр пуксьыны паракод вылас. Бур, мый кӧка войснад оз пемдывлы, да луныд сутки кузя нюжалӧ. Сэсся и номыйд гожӧм пансигад абуджык на. Мирскӧй красованньӧ!

Усть-Сысольск карса управа да земство ыджыд гӧсьт локтигкежлад лӧсьӧдчӧмаӧсь сьӧлӧмсяньыс. Паракод ӧзынӧ лэптӧмаӧсь ыджыд павильон, ӧзынсянь берегӧдз тӧчӧмаӧсь зумыд вӧла туй, карас котыртӧмаӧсь выставка, мед Ыджыд ӧксы вермис тӧдмасьны комияслӧн оласногӧн да прӧмысьясӧн. Юнь коймӧд лунӧ, лун шӧр гӧгӧр, жыннъяс бовкнитисны-юӧртисны «Царевна» паракод матыстчӧм йылысь, кодлӧн палуба вывсянь Сергей Александрович синмалис Усть-Сысольск гӧгӧрса вӧр-васӧ да серпасьяссӧ. Миян кодъ пармаыд Мӧскува-Питерьяс гӧгӧрад абу. Дерт, эськӧ ӧнӧ и Комиын нин парма-матушканым нярмикушмис да, сӧ кызь во саяд вӧлӧмаӧсь на Усть-Сысольск гӧгӧрыд и пожӧма ягьяс, и козьятӧ тӧльяс, и кыддза расьяс. Вӧлӧма на мый вылӧ шемӧстчывнытӧ.

Сергей Александровичӧс кӧть нин ылысянь видзӧдлыны чукӧртчӧмаӧсь и карсаяс, и матӧгӧрса сиктъясысь войтырыс. Ю дорын и юпӧлӧнса керка вевтъяс вылын йӧзыс тшем пукалӧ. Ставныс лӧкгоршӧн косялӧны-горзӧны «Его Императорскӧй Высочестволы — ура!!!» Ӑзын вылӧ Сергей Александровичлӧн лӧччӧм мысти уездса воинскӧй начальник сетис сылы рапорт, сэсся

* Древлехранилище — музей-архив; музей да архив запасникъяс.



сьорсьон-бёрсьон, няньон-солон матыстчисны карса гырысь йоз: карса юралысь, мөд гильдияа купеч Забоев, земство управаон юралысь, запасса штабс-капитан Скрябин, Көрткерөс вөлөсьтса старшина Коюшев. Быд паныдалысь матыстчывліс кык депутаткөд. Нянь-сов быдөнлысь видлөм бөрын Ыджыд өксы мөдөдчис павильон пыр карса чиновникъяслань. Войтырөс Ыджыд Князьлөн кытшовтігөн сы дорө чепөсйис чери кыйысь, Сизимөд флотскөй экипажса вөвлөм матрос Белоголов Ёгор Степан, уськөдчис пидзөсчань ыджыд гөсьт водзө да козьналіс дзык на выльон кыйөм ыджыдсьыс-ыджыд стерлядь. Дерт, сыв кузя черитө эз ачыс Сергей Александрович босьт, колльөдысьясыс иналісны, но вөвлөм матросөс дона гөсьт аттьөаліс, весиг юрнас лайкнитыштіс сылы. Сэсся пуксис өтка вөлөн доддялөм пролёткаө да йоз чукөрлөн «ура!» горзөм улө мөдөдчис первой Троицкөй, а сэсся Перымса Степан вичкояслань.

Троица соборас ловъя Ыджыд өксыөс петкөдлыны вайөдөмаось карса куим класса училищесысь велөдчысьясөс учительинспектор А.Н.Малышев кык учителькөд да ассьыс быдтасьяссө приходскөй училищеса велөдысь А.Д.Латкин. Ыджыд пернаон да вежа ваон вочаалісны дона гөсьтөс зарниа-еджыда паськөма протоиерей Ондрей Попов, Богословский да Вишерский попъяс, дякөн да кык саломщик. Гөсьт окыштіс пернасө да велөдчысьяслөн «Спаси Господи люди Твоя!» сьылөм улө пырис енколаө, көн кывзис ектения да многолетие. Сэн жө Ыджыд өксылы ошйысисны Петыр Первойон — купеч Савватиевлы, а купечөн — вичколы козьнавлөм кубокөн да усть-сы сольсксалон сьом вылө гижлөм образон, кодөс сиөмаось Александр Второйлөн, Сергей батылөн, кызь вит во саралөмлы.

Сергей Александрович ошкис да аттьөаліс велөдчысьясөс мылаа сьылөмысь да мөдөдчис Перымса Степан вичколаны, көн сійөс виччысисны нин велөдчысьясыскөд духовнөй училищеса смотритель Н.А.Яхлаков да В.К.Смирнов. Татчө жө вайөдөмаось челядьнысө женскөй прогимназияса начальница Е.И.Забоева да велөдысьясыс. Вичкоө пыранінын князьөс вочаалісны

протоиерей, Ермиевский да Журавлёв попъяс. Бара жö «Спаси Господи люди Твоя», ектения да многолетие сьылöм бöрын протоиерей дженъдыдика висъталыштис Перымса Степан йылысь да козьналис Святительлысь карса серпасалысьöн гижöм öбраз. Öксы кытшовтис вичкосö, видзöдалис Вежа Синодöн вичколы козьналöм öбразъяс, юасис, кор лэптöма вичкосö да мыйла пытшкös уджъяссö абу на убöлитöмаöсь эштöдны, сесся аттьöалис училищеса смотрительöс челядьлөн мылаа сьылöмысь да мöдöдчис земствоса выставка вылö.

Сэн сийöс виччысисны нин карса управа председатель, шленъяс да гласнойяс. Управа председатель юöртис, мый могөн лöсьöдöмаöсь выставкасö, ошйысис коми войтыр оласногөн, кипом уджъясöн, заводъясын да мастерскойясын вöчöмторъясöн. Ыджыд öксы кытшовтöма ставсö: йöрсянь босьтöмөн да управапытшса жыръясöдз. Медъёна сылы лов вылас воöмаöсь лазъя-дукöса чери кыйысь да вöралысь, кодъяс виччысьöмаöсь Ыджыд Князьöс кар шöрын наросьнö лэптöм вөр керкаясын, гымга-ветельяс, чöсъяс-лэчъяс да кыйсян кипельяснас и пом. Вöралысьыс локтöма коми лайка гозйөн. Ыджыд öксы кытшовтöма выставка юкөнъяссö, юасьöма экспонатъяс йылысь, а мыйсюрö и ньöбöма мастеръясыслысь. Дона гösътлы вильгортса кресттяна, Налимов Öлексан да Ватаманов Михайлö, козьналöмаöсь выставка вылö вайöм, ас вöчöм фисгармония, мыйысь Ыджыд öксылы зэв любö лöма. Ог тöд, ёна-ö ворслис фисгармо-



ниянас Сергей Александрович, но инструментыс зэв на шогмана: мыла гора да мича вöлöма. Чери кыян юкöнын сар дядьыд тшöктöма сьöрсыйс вайöдöм фотографыслы вöчны некымын снимок, а сесся дыр аттьöалöма и выставка котыртысьяссö, и выставкавывса мастеръясöс.

Сэтысянь ыджыд гösътыд мöдöдчöма воинской управлениеö, öнйя ног кө, военкоматö, да сы бердса воинской командаö, прöверитöма сэн запасной чинъяс йылысь гижöдъяс, паныдасьöма усть-сы сольскса воинской командакöд, видлöма служивöйяслысь сёян-юансö, пыравлöма библиотекааныс да казармааныс.

Сэн кулитöма, мый казармаыс важ, но төдмалöма, мый Усть-Сысольскын лэптöны нин выльöс, да ошкыштöма водзмöстчысь-яссö. Сэн жö Сергей Александрович пыравлöма цейхгаузö, көн усть-сысольскаяс видзисны улыс рекрутъяслы да ратник-ополченецъяслы обмундирование да ружье-припасъяс, сэсся мөдöдчöма духовной училищелань.



Училищын Ыджыд öксыöс паныдалöмаöсь смотритель, отсасысь, велöдчысьяс да «Спаси Господи люди Твоя» сьылöм улö колльöдöмаöсь актöвöй залö. Быдтор йылысь юасьöма Сергей Александрович: и велöдчöм йылысь, и велöдчысь лыд йылысь, и библиотека йылысь, и мый дон сувтöма училище лэптöмыс... Пыравлöма классьясö, спальняö, залö, сэсся гора «ура!» улö бөр мөдöдчöма öзынлань. Кыр йылас лэдзöма пролёткасö да тэрмасьтөг лэччöма ю дорöдзыс подөн. Йöзыс чукöртчöма тшем, и матыс и ылыс сиктъясысь. «Ура!» горзöмыс абу орлöма гөсьтлөн öзынö вотöдз. Павильон весьтö öшöдöмаöсь «Бур туй!» гижöда дöра. Сы улын Ыджыд öксы бергöдчöма колльöдчысьяслань, аттьöалöма чинаясöс да улöдз копыртчывлöма чукöртчöм войтырыслы. Инкин купечлы, кодi кузяла гурийöдлöма сийöс пролёткаа вöвнас, князь паракод вылас нин козьналöма дона изъяса зарни чунькытш.

«Ураыс!» бара юрöбтöма да абу лөньюма, кытчöдз бөр Вөлöгдалань нырсö босьтöм паракодыс абу саялöма ю чукуль да вөр-пу сайö.

Кывтигас Ыджыд öксы сувтыштавлöма сöмын Котласын, Совдорын, Тотьмаын да Устюгын, но сьöдз тшöктöма петкöдлыны кык коми сикт, кытысь катигас казялöма олысьяссылысь дасьтысьöмсö. Юнь коймөд лунö, Усть-Сысольскысь куим час кызь вит минут рытын петöм мысти, квайт час да джынйын пыравлöма Зеленечса вичкö да школаö. Сы бөрти чеччывлöма Отйö (Коквицы), видзöдалöма Христорождественскöй вичко да вөлöсьт правление. Отйын, карын моз жö, Ыджыд Князь локтигкежлö лэптывлöмаöсь туйсö, вöчлöмаöсь зумыд öзын, а вадорсян вичко дорöдзыс вольсалöмаöсь ас кыöм джодждöраяс.

Сергей Александровичыд видзöдлöма выльöн кыöм джодждöраяс вылö да шуöма: «Татшöм мич öд оз жö позь тальявны!» Сидз вичко дорöдыс и мунöма джодждöраяс пöлöныс. Сэсся дыр на сылысь öзынсянь вичкодорöдз каянинсö шуöмаöсь «Князь туйöн». Дерт, öнi и вичкоыс нин абу, и Князь туйыс абу кольöма. Сöмын нейджыд вал кодь тöдчö на Гөрд салдатлы сувтöдöм памятника—эжмöм вичко подула костас.



Юнь витöд лунö Ыджыд öксы воöма Вöлöгдаö, пуксьöма поездö да вой шөрланьыс нин мöдöдчöма көрт туй кузя гортланьыс.

Мöскуваö воöм мыстыыс Сергей Александрович ыстöма сийöс колльöдлысь Вöлöгдаса вице-губернатор А.П.Лаппо-Старженецкийлы татшöм телеграмма: *«Нöшта öтчыд көсгя аттьöавны Тиянöс нокгяссьыд да юöртны, мый Ме вои гортö Вöлöгда губерняти ветлöмысь ыджыд шемöсөн. СЕРГЕЙ».*

Бура примитöмсьыс ыстывлöма Ыджыд Князьыд Вöлöгда губерняса сикт-каргясö и дона козингяс. Сидз, Емдинса Благовещеннö вичкоö волöма зарниа-эзыся, эмальöн вевттьöм престолыввса крест-распятие, код мышкö гижöма: *«Крест сей принесен вкладом в Благовещенскую церковь Великим Князем Сергеем Александровичем в память посещения Им села Усть-Вымь 2 июня 1898 года».* Содтöд волöма зарниа-эзыся, эмальöн кисьтöм лампада, кытчö сидзжö гижöма: *«Вклад Великого Князя Сергея Александровича, к мощам Святых Герасима, Питирима и Ионы, Епископов Пермских. Устьвымь 2-го Июня 1898 года».* Отса Христорожественскöй вичкоö Сергей Александрович козьнавлöма гижöда жö зарниа-эзыся престолывв крест.

Сё кызь во таво тырö Александр Сергеевич Романовлөн Коми муö волöмсянь. Оз унаөн та йылысь тöдны. Историкгяс сöмын да, гашкö, сийö йöзыслөн, кодгяс гораа да сьöлöмсяньыс горзывлисны дона гöсьтлы «ура!», паметяджык йылöмыс казтьывлöны, мый көнкö вöлис «Князь туй», мый кутшöмкö князь-

лы кок улас пöрысь пöль-пöч вольсавлöмаöсь джодждöраяс, мый кутшöмкö Сергей-князьлы коми морт козьнавлöма ыджыд стерлядь...

Кадыд тай визувтö, Эжва моз нуö олöм васö. Унатор вунö, унатор вежсьö. Со и роч саръясыд бырисны, и Сöвет власьтыд пуксьывлис да мунис.

Историятö он вермы бöр косöдны, сöмын казтьывлыны колö, велöдчыны сы серти: мый эськö позьö на миян олöмын вöчны, а мый, важас видзöдлöмön, оз позь ни оз ков. Бөръя кадö весиг чужис сідз шусяна «альтернативной история»: а мый эськö вермис лоны, эз кö ло, шуам, Гөрд Октябрь? Сöвмис-ö Коми му? Аддзисны-ö из шом? Лэптисны-ö Комиын выль каръяс? Нюжöдисны-ö кöрт туй? Видзöдлис-ö кодкö Комилань Мöскува-Питерсянь?

Дерт, тайö фантазияясыс, вежөрөн ворсöдчöмыс збыль история туявны оз шогмыны, но ас местаас быттö и ковлывлö жö муртавлыны öтарсянь и мöдарсянь, мед öти и сійö жö гуас мöдысь не усны. А мый эськö вермис лоны, Романовъяс кö колисны власьт бердын, эз кö ло революция, Николай Второйöс кö эз лыйлыны? Та йылысь мöвпалö Жеребцов И.Л., история наукаса доктор.

Снимокъяс вылын:

1. Ыджыд öксы Сергей Александрович Романов.
2. Сергей Александрович «Царевна» пароход палуба вылын.
3. Ыджыд öксыöс паныдалöны Усть-Сысольскса пристань вылын (1898 во).
4. Усть-Сысольск, Спасскöй улица, Романовъяслөн царствуйтöмлы 300 во тыригкежлö мичмöдöм Земскöй управа (1913 во).
5. Усть-Сысольск, Набережной улица. Шуйгаладорсянь медводдзаяс Духовной училище (öнія Национальной галерея). Водзас — Сергей Александрович воигкежлö тшупöм беседка.
6. От сикт, Христорождественскöй вичко. Вичко веськыдладорас сідз шусяна «Князь туй».

Аттьöалам Коми Республикаса национальной музей архивса снимокъяс сетöмысь.



Мый эськӧ вермис лоны...

(Альтернативной история)

«Ваше Величество, ми пырим Усть-Сысольск губерня».

Миколай Второй видзӧдліс ӧшиньӧ. Поезд ньӧжйӧник гутшкис рельсыяс кузя Луз ю пӧлӧн Зыряна муывывса медводдза станциялань, Лоймалань. Губерня юркарӧдз лоасны на Занульӧ, Кебра, Визин станцияяс. Мыш саяс колины Устюг да Никольск, ог нин сёрнитӧй Санкт-Петербург йылысь, кодӧс Государь эновтіс кык лун сайын. Да-а, квайтымын квайт арӧснад кузя жӧ кыссьӧ туйыд. А мӧдар боксянь кӧ, важӧн нин коліс волыны Империяса та пасьта да татшӧм озыр губерняяс, кӧні сӧвмисны промышленность да транспорт, кодӧ йитіс Европа-Азияӧс. Сэсся ӧд кызь вит во нин Романовьясысь некод эз во-лы таланьыс, 1898 восянь. Да и тайӧ волӧмыс эськӧ вермис не лоны, не кӧ императрица Александра Фёдоровна. Стӧч гӧтырыс синіс императорӧс ветлыны «старецлы» памятник восьтані-нӧ, Паль сиктӧ, кытысь петавлӧмаӧсь Григорий Ефимович Распутинлӧн пӧрысь пӧल्याсыс.

Император шпыньмуніс: тӧд вылас усис «Усть-Сысольск губерняса ведомосьтысь» кутшӧмкӧ А.А.Чеусовлӧн гижӧд. Зыряналӧн нэмӧвӧйся журналист тшук абу кывбурӧн гижӧма, мый Григорий Распутинлӧн орд вужьясыс петӧны коми «туньяс» да «тӧдысьяс» пӧвстысь. Ыстысьӧма журналист весиг ӧти учёной-зыранлӧн, А.С.Сидоровлӧн, «Знахарство, колдовство и порча народа коми» книга вылӧ. Дерт, «Усть-Сысольск епархияса ведомосьтын» (мӧд татчӧс журналын) пыр жӧ сетӧмаӧсь Чеусовлы (дай Сидоровлы сюрӧма) чорыд вочакыв. Татчӧс общественник А.М.Мартюшев вомалӧма пыдди пуктана, кыз журналын быдсяма еретникьяс да тшыкӧдчысьяс йылысь нинӧм абусӧ гижӧмысь да Усть-Сысольск губерняын «Лысӧй гӧравывса шабашьяс котыртӧмысь». Сэтчӧ и губерняса батюшкаяс содтӧмаӧсь, мый татшӧм гижӧдьяс пыддиыс колӧ йӧзӧдны да театрьясын петкӧдлыны Роч Православной вичко лэптанторьяс да войтырысь бур кристианаӧс вӧчанторьяс. Мыйӧдз пӧ ӧд воим!? Либеральяс пӧ театр сцена вывсянь нин тешитчӧны священнослужительяс вылын, попьясӧс мӧмӧтысь улӧ пуктӧны. «Тыдалӧ, ӧткымын зыряна дорӧ не сӧмын Тютчев, но и Пушкин абу на воӧма», — думыштіс татчӧс поп-дяк да Мартюшев коддьӧм йылысь император.

Усть-Сысольскса пресса йылысь казгыштӧмӧн босьтіс Николай Второй сылӧн локтігкежлӧ выльӧн йӧзӧдӧм «Губерня» номер. Пырмунігмоз синмаліс медводдза лист бокьяссӧ, кӧні «Налӧн Императорской Величество» дорӧ шыӧдчӧмаӧсь пӧсь чолӧмьясӧн губернатор, земской собраниеса юралысь, Усть-Сысольск карса юралысь, Роч партияяс юкӧнъясӧн веськӧдлысьяс: «Аркандел Михайлӧ союз», «Ӑтувья да Юктӧм Россия», «Торгово-

промышленной партия», конституционалист-демократъяс да мукд. Весиг татчос «Коми му выльмодысьяс» ним улын отувтчом «левакъяс» нимкодпырысь чолмаломоась императорос губерняса став уджалысь йоз нимсянь.

Дырджык кезлө сибдывліс сар «Зыряна автономия вöсна» партиясянь гижодö, кодос помаломоась, кызд и век, Его Императорское Величество дорö шыодчомон: мед сийö Усть-Сысольск губерня одйоджык торйодас Зыряналон ашпör княжествоö. Коми автономистъяслон нырщикыс, Д.А.Батиев, сомын на воис Шпицбергенсянь, кодос, кызвыннас сылон зильомон жö, удайтчис пыртны Россия империяö 1919 воын. Норвегияса король онöдз на дузъялö роч сар вылö. Но Германияос кызвыннас роч сарон вермом да Европа джын босътöм бöрын Норвегияса король Роч саркод вензыны эз лысьт. Бур, мый 1916 воын сар вермис Германия да Австрияса социал-демократъяслы отсыштны (ыджыд аттö Савва Морозовлön быдтасъяслы да мукд фабрикантъяслы зарнинас отсыштöмысь). Ковмис Немеч да Австрияса императоръяслы престолсö энотны, а сесся и империясныс регыдон киссисны. Некымын во эськö ковмис жö терпитны гоз-мод социал-демократияя республика (Бавария, Пруссия, Венгрия, Словакия...), но бырисны найö. Сы пыдди Польша паськодчис Австро-Венгрия да Германия муяс тшöt весът, да Роч император борд улын отувтчом полякъяс этшаджык кутисны бунтуйтны. Пилсудский сомын некызд оз öвсьы. Но да Ен сыкод.

Лөкджык, мый этайö Батиевыс кадысь кадö пилсудскиялö жö. Пинялö и партияса ертъяссö, и губерняса чина йöзос бюрократияысь, горзö, мый колö весавны властьяссö «жуг-өгсьыс». Гашкö, и збыль кывзысьны да, гоз-мод мортос весавны, ыстыны уджалан лагерö, кодос 1921 воын Батиев жö и чуйдис восьтыны Ухтаын? А мый? Унаон төрасны. Местаыс тырмас. А мый Батиев корö Шпицберген мырддыны Олонец губернялысь да пыртны Усть-Сысольск улö, сийö нин вывтiasьом лö. Сидз нин «Зыряна губернялы» (кызд политикъяс шулывлöны Усть-Сысольск губернясö) сетисны Новöй Земля, Вайгач да Колгуев дяс. Изьваслы зэв тайö сёлöм вылас воис, но и яранъяслы сэн лов сертиыс, мый понда и кыптивлöны на костын зыкъяс. Коркö император весиг кöсьивліс юкны дяссö кык войтыр костас, но кодi нö овмодчас Новöй Земляса Войвыв дi вылад, сывлытöм йиас повстад. Нинöм и сёрнитны, губерняыс ыджыд, пасьта сертиыс Европаса ни öти страна сыкод орччон он сувтöд. Да мый губерняыс, весиг торъя уездъясыс (Усть-Сысольскса, Печераса, Яренскса) пасьтанас быд государстволы воча лоасны. Олысьыс тай этшаджык-а. Весиг Бакуса татара, Литва да Бухараса эмиратысь вайöм уджалысьясон заводъяс тыртны эз артмы. А завод тайö губерняас кыптіс уна. А.А.Чернов, П.И.Полевой да мукд учёнойяс корсисны из шом, нефть, зарни. А би сёлöма войтыр нин сесся босьтчис заводъяс кыпöдны. Мыйта кöть сийö жö Г.П.Семяшкиныс да А.Г.Гансбергыс вöчисны! Уква-Печераса нефть перьян да карасин вöчан заводыс дзик налön водзмöстчомон чужис. Эз öд весьшөрö сар налön морос вылö öшöд зарни медальон.

Вөр прöмышленник В.Н.Латкинлön быдтасъясыс ёна жö зі-

льоны, и пӧрӧдчӧны, и плака-брустӧ пилитӧны ӧнія Усть-Сысольск губерняын. Сӧмын кар бердас кык ыджыд вӧр пилитан завод госуларстволы и граница сайӧ вузӧс вылӧ сӧмын дзижгӧны-пилитӧны. Оз кольччы наысь и Печеравомса «Войвыв кодзув» вӧр завод (бара жӧ аттӧ сыысь Гавриил Прокопьевич Семьяш-кинлы, кодӧ нӧбис да выльмӧдӧс шведъясӧн восьтывлӧм пред-приятисӧ). Ыджыд вӧр заводъяс эмӧсь и Мылдинын, и Косла-нын, и Зӧвсьӧртын... «Роч войтыр» котыр да сылӧн татчӧс юкӧныс «Коми войтыр» эськӧ и ӧна дзуртӧны, мый иностраннӧй капиталыс вывти нин вужъясис Коми муса вӧр промышлен-ностьӧ, но вӧчны тан нинӧм: капитал колӧ кыскыны быдлаысь. Уква-Печераса нефть тай со американечъяслӧн концессия отсӧ-гӧн жӧ ковмис корсыны да перйыны. А бура на и артмис ста-выс.

И кӧрт туйтӧ концессиясӧн нюжӧдӧсны (норвегъяс весиг кӧсйӧны вӧлӧ пырны, но дузгысисны Шпицберген понда да ӧновтчисны, кӧть ӧнӧ и гыррдзасӧ йирӧны). Не кӧ кӧрт туйыс, вермис ӧмӧй губерняын овмӧсыс тадзсӧ кыптыны? Сюрисны йӧз, некымын проект олӧмӧ пӧртисны. Медводдза кӧрт туйсӧ Мирӧвӧй война дырйиыс на нюжӧдӧсны, немеч да австрияк во-еннопленнӧйяс киясӧн. Вермӧм бӧрас нин эштӧдӧсны; йитисны Укравом Мылдинкӧд, а сӧсся и Кама вывса Ксенофонтвскӧйкӧд, Соликамсккӧд, Перымкӧд. Сийӧс эз на удитны эштӧдны, а босыт-чисны нин мӧд кӧрт туй вожӧ, кодӧс ӧна нин корисны усть-сысольсксаяс. Мӧд вожыс нюжӧдчис Ханты-Мансийсксянь Из вомӧн Тшугӧр вомӧдз да Мылдинӧдз, сӧтысянь нин Немдин да Кулӧмдин пыр Усть-Сысольскӧдз. Госдумаса депутат Д.Я.Попов кужис империяса медыджыд чиновникъясӧс асланьыс песовтны, уставитны, мый Усть-Сысольск пыр Сибирсянь Мурманск пор-тӧдз туйыс медся веськыд. Кӧрт туй эштӧм бӧрын позис нин паськӧдчыны Ӗжва пӧлӧнса муяс вылӧ, сӧвмӧдны вӧр промыш-ленность, ӧддзӧдны да донтӧммӧдны Сибиркӧд вузасьӧм. Усть-Сысольсксянь торъя вож кежис Визин, Кебра, Занулльӧ, Лойма да Вятка-Котлас кӧрт туйса станция Луза вывсянь Устюг да Никольсклань, Буй станциялань. А сӧтысянь нин, ӧна кӧ нин колӧ, Мӧскува да Питерӧдз. (Стӧч тайӧ туйӧдыс Питерсянь и воис Зыряналӧн губерняӧ Император).

Сы бӧрти кад воис и Усть-Сысольсксянь Ухтаса нефть перъ-янинъясӧдз кӧрт туй нюжӧдны (Паль, Емдин, Княжпогост, Уква-вом пыр), да Ухтасянь Кардорӧдз вож вӧчны, дай Емдин, Зӧв-сьӧрт, Яренск, Совдор пыр Котласӧдз. Содтыны ковмис и Уква-вом—Княжпогост—Кослан—Пинега—Кардор вож. Ставыс тайӧ вужвыйӧныс вежис удорасалысь олӧмсӧ, ӧддзӧдӧс вӧр пӧрӧдӧм да Косланын вӧр прӧмысел комплекс лӧптӧмсӧ. Вяткакӧд йи-тӧдъяс ӧнмисны, кор Сӧська, Нювчим, Вотча да Кажым пыр, Сыктыв пӧлӧн ещӧ ӧти кӧрт туй визь мунис. Сӧк и кӧрт туйпӧ-лӧнса Нювчимса, Кажимса, Нючпасса кӧрт сывдан заводъяс кыпӧдчисны, ӧд ковмисны рельсыяс, вагон да паровоз дзоньта-лан базаяс. Заказыс лоис сы мында, мый и Занулльӧын вӧссис выль завод, код йылысь гаравлисны 18-ӧд нӧм помын на.

Но Коми муын медыджыд лӧмторйӧн, дерт, лоис Индига вомын мореса порт восьтӧм. Йи улӧ веськавлытӧм Индига губа вӧлис Печера вом серти бурджыкӧн, кӧн мореса порт жӧ вӧлӧ,

но төвъяснас кынмывліс. Коми экономистъяс, А.И.Бабушкин, А.М.Мартюшев да мукөд, важон нин подулаломон сёрнитлісны Индигаын порт стрөитом йылысь. Сійо жө Д.А.Батиевыс, коді политика кындзи сюртчис и экономикалань, войвыв мореплаванияетө лэптіс зэв вылө. Шпицберген йылысь венъясын эз вунөдлы и индигаса ва туй йылысь. Эз лакируйтөм штиблетъясон, а сапөгөн-көтіөн зумкъявліс-пыравліс Зимной да Таврической дворечьясө, Кремльө, пызанъясө кулакнас камөдөмон сёрнитліс Индигаса портыслөн коланлун йылысь. Сы дор сувтісны и Д.Я.Попов да П.А.Сорокин, кык ыджыд коми политик. Батиевлөн зільомыс эз весьшөрө ло, воссис Индига вомын ыджыд порт, кодөс Чилимдін пыр йитісны Уквавомкөд, а сы пыр Вяткакөд, Перымкөд, Ханты-Мансийсккөд көрт туйон жө.

Император, дерт, шпынныліс зыряналөн татшөм водзмөстчысыс вылас, но аслыс зэв на и любө вөлі, мый Усть-Сысольск губерняса власъяс эз дзескөдчыны көрт туйясө да портъясө, а парма пыр писькөдалісны и автояслы туйяс. Талун позьө нин, дерт, поездысь нөбжйөджык, но автоөн дзужгыны Войвыв Саридзянь Перым да Вятка губернясөдз, а Войвыв Двинасянь Уралөдз, некытчө мытшасьлытөг. Важ Сибиряков трактөд позис нин ветлыны Из сайөдз не сөмын вөла-доддяөн, но и бензиномоторъясон. Эз вунөдны комияс и нэмөвөйся ва туйяс йылысь. Джудждөдалісны да весалісны юяссө, пароходъясон да мотоботъясон кыскалісны грузъяс, йөзөс Печера, Эжва, Емва, Мозын кузя. Вьльмөдісны да паськөдісны и эндывлөм нин Эжва—Кама йитысь Императрица Екатерина Вторая нима канал. Регыд, гашкө, артмас нин йитны и Печераа-Оба, Печераа-Эжваа да Мозына-Емваа торъя каналъясон.

Авиация сөвмөм, дерт, кольччыштө на. Усть-Сысольсксянь орчча губернясөдз лэбалө нин эськө аэроплан, но сиктсаяслы аэропланд — дикөвинка кодь на. Көть эськө и зыряна-авиаторъяс бура асьнысө петкөдлісны Германиякөд война вылын. Висьтавлісны государлы, мый кутшөмсюрө уездын воссисны «Добролёт» котырлөн юкөнъяс, но аэроплан тырмытөм понда найө вөдитчөны аэростатъясон. Энтузиастъяс весиг видлөмаось Нювчимсянь воөдчыны Мөскуваөдз. Но зэв на пө тшөкыда аэростатъяссө шыбитө парма шөрө, кытысь энтузиастъяслы ковмывлө петны подөн, пыжөн либө вөлөн.

Индигаын порт стрөитигөн нин император кывзысис бур йөзлысь да шуис котыртны выль Усть-Сысольск губерня, кытчө пырасны Вөлөгдаса Яренск уезд, Кардорса Печера уезд, Перым да Вяткаса Чердін да Орлов уездъяс. Батиев да Попов, кык Митрей, эськө и корөны вөлі выль губерняс пыртны ставнас Коммуса комийөс, но туй министерство сэки сувтіс паныд: туйяс пө абуось, экономика йитөдъяс абуось, мый көть и кывныс өткодь!? Но өні и туйяс, и экономика йитөдъяс бурось, позяс бергөдчывлыны та дорө выльысь. Сэсся и Лига наций шызьөма, корөны быд войтырлөн культура дорө вежавидзны, быд войтырөс сөвмөдны...

Император серти, зыряналы грек няргыны: культура сөвмө. Мый нин каръясын, да весиг гырысьджык сиктъясын воссисны театръяс да культура керкаяс. Оз нин важ моз медалөм керкасын войпукны-гажөдчыны. Господин Цембер быд карын вось-

таліс музейяс. Цирк сөмын оз тырмы. Но кызд сійө жө Батиевыс гальскывлө: миян парламентон да правительствоон пө некутшом цирк оз ков. Школаясын челядьос велөдоны коми кыв вылын. Дерт эськө, гырысьджык карьясын коми челядьыс и этшаджык лоис рочон сёрнитысьяс сертияс. Россия быд пельосысь локтоны йозыс: кодкө удж корсьны, а кодкө и сідз колтыкайтчыны, съөдсө воштавны. Корсюрө сэтшөм жуг-жагыс йылысь газетысь лыддян да юрсиыд сувтлө: сэн виомаось, тан гусьясьомаось. Водзын татшөмыс эз кывсьывлы. Дерт, шуам, газетыд газет и эм да, этшаджык лыддыны колө прессасө...

Көть и журнал-газеттөгыз некызд жө. Губерняын радио паськалө, но газетыд век на паськыджыка юөртө сетө. Губерняын дай уездьясын лэдзөны некымын журнал-газет, коймөд пайыс зырян кывйөн. Асланыс алфавит лоис, кодөс войнаөдыс на коми велөдысь В.А.Молодцов думыштлис.

Молодцов алфавитон жө гижисны коми гижысьяс. Татчө мөдөдчигон нин государлы козыналісны зыряналон «ловья классиклысь», К.Ф.Жаковлысь, гижөд чукөр. Кывсис эськө, мый рочон гижө, а кодсюрө бөрас нин комиөдоны. А томджыкьяс и асьныс нин гижөны, весиг кырмасьоны ас ногыс, оз рочьяс моз: Илля Вась, Тима Вень, Нёбдинса Виттор... Бөрьяыс пө тшөкыда радиосянь юргө: коркө лыддьө гижөдьяссө, коркө балалайкаон ворсө да сылө... Кывсьывліс: неважон зэв ыджыд донысь судзөдома Семён Налимовон вөчөм инструмент. Откымын литератор отпырйө и наукаясон ноксьө. Велөдоны Усть-Сысольскса университетын, кодөс неважон восьтісны К.Ф.Жаков, В.П.Налимов да П.А.Сорокин зильөмөн. Господин Сорокин ректоралө. Зэв сійөс пыдди пуктоны. Позьө өнісянь нин шуны, мый во ветымын мысти университетлы Сорокинлысь нимсө сетасны. Император локтігкежлө университетын котыртомаось губерняын медводдза универсиада. Физическөя ордысьны да вермасьны кутасны став губерняса студентьяс, англичанаон вайөм кывйөн кө, «спорт-меньяс».

Губерняын университет да институт тырмө: империялы колөны велөдчөм йөз. Эм вөр, нефть, горной институтьяс, туй йитөд, му вөдитан институтьяс... Специалистьяс бөрся, дерт, дөзбөр колө, корсюрө и чорыд ки. Мед нин вольнодумецьяс бөрся кыйөдоны, да өд специалистьясыд и уджас на унаторйөн вермасны пакөститны. Со, шуам, крестянаөс мырдон тшөктөны скөтлы көрым вылө выль быдмөг рөдмөдны: асьным пө койдысө ваям, асьным велөдам, тьянлы пө сөмын ытшкыны да сюрукьяснытө вердны кольө. Азыгум кутшөмкө, Дальной Востокса. Нимыс эськө быдмөгыслөн и төдса, но кодсюрө шуасьө нин, зэв пө асныра быдмөгыс дай петшөрысь чорыда чишкалө...

Институтьяс, студентьяс... А гапкө, восьтыны Усть-Сысольскын Наука академия юкөн? Нимтыны, шуам, «Зырянский императорский центр», ЗИЦ. Юралысьнас, ЗИЦ-председательнас, пуктыны кодөскө татчөс академикьясысь. Сэк и студентьяс инасяны, и губерняса экономика позяс ещө на кыпөдны. Татчөс мулөн озырлуныс тай помтөм.

Печераса из шом бассейныс куш мый дон! Выль көрт туй колө Воркута вомсянь Косьва вомөдз, а сөсянь Чилимдинөдз, кытчө позяс узлөвой станция вөчны. Ещө өти вож Усавомсянь

мунас Мылдинӧдз. Сы кузя Индигаӧ, Перымӧ, Вяткаӧ, Котласӧ мӧдӧдчас и из шом, и Ен кӧ сетас, нефть, кодӧс аддзӧмаӧсь нин Усва да Колва вылысь. Кара вомын сӧк ковмас нӧшта ӧти саридзса порт восьтыны (дерт, Индига серти дзоляджыкӧс), а сэн и асыввывлань, Урал вомӧн Обдорскӧдз позяс поездъяс мӧдӧдны.

Николай Второйлӧн сӧрсъяс нин зырянаӧн выль планыс. Найӧ вӧзйӧны Обдорсксянь Чукоткаӧдз да Камчаткаӧдз кӧрт туйтӧ нюждны, йитны Индига да Петропавловск-Камчатскӧй. Проектас жӧ уджалысь А.М.Мартюшев эськӧ и шуис видзчысьӧмӧн: «Вӧзйынытӧ эськӧ и вӧзъям, но збыльмас али мича вӧтӧн коляс проектным, сьӧкыд на шунысӧ». Колӧ вылысь, бурджыка видзӧдлыны проектсӧ. Тэрмасьтӧг.

*«Ваше Величество, пырам Усть-Сысольск карӧ, кодӧс зыряна шуӧны Сыктывдинкарӧн! Со видзӧдлӧй — самӧй вокзал водзас сулалӧ Екатерина Великаялы памятник, кодӧс зыряна вежавидзӧмӧн сувтӧдисны Усть-Сысольск сикт карӧн нимтӧмысь. Орчӧн, ӧтувгя композицияӧ йитӧмӧн, лӧптисны Тіян Императорскӧй Величестволысь пертаснытӧ. Сы вӧсна мый стӧч Тіян ки улын уездса ичӧтик кар пӧрис Роч муса медыджыд губернялӧн юркарӧ. Со постамент вылас гижӧма латыньӧн, рочӧн да зырян кывйӧн: **«Медыджыд Роч Монархъяслы вежавидзысь зырянасянь»**.*

Ваше Величество, карса губернатор да пӧштеннӧй публика виччысьӧны Тіянӧс перрон вылын!»

Да сар и ачыс нин кыліс, кыдзи вагон ӧшинь саяс муракылысь гымӧн поездлысь гыпкӧмсӧ вевттис гора да долыд роч «ура!».

Комиӧдис Олег Уляшев.



Ылі Австрияын, война помас...

Быд морт олөмын эмөсь лоөмторъяс, кодъяс йиджтысьөны вежөрад, кольөны нэм помөдзид, вөрзөдөны ловтө да пыр казтылөны ас йывсьыныс. Уналы, ме думысь, медтөдчана лоөмторнас лои Ыджыд война, Айму вөсна вир кисьтана тыш, көні юрнысө пуктисны миян лыдтөм-тшөттөм йөз.

Бөръя войналөн йөлөгәыс кылө и менам сьөлөмын. Сы пыр мунисны менам пөль да бать. Кык чожд, мам-батьлөн Ольөксан ни-ма Гуляев да Ульянов ова өтка вокъяс, эз воны бөрсө Эжда йывса Дереваннөй сиктө, дас өкмыс арөса зонъясөн сотчисны войналөн ыпъялана биын. Буретш тайө кык зон йывсьыс и петалис Ыджыд Вермөмсянь 65 во тыригкежлө менам «Дереваннөйса Ольөксанъяс» очерк. Первой «Коми му» газетын, сэсся «Войвыв кодзув» да «Арт» журналъясын. Гижөдас пасйылі, мый олөмыд пыр водзө восьлалө-мунө, и ылыстчысь войнаыс дыр на кутас бурдлытөм дой моз висьны йөзлөн сьөлөмъясын, казтывны сийө ылі да сьөкыд кад йывсьыс, виччысьтөг восьтыны уна гусятор. Тадзи и лои...

Ульянов Ольөксан кузяыс кө быттө ставыс вөлі ясыд, рөдвужыс төдім, кор кувсьөма, мыйысь да кытчө дзөбөмаөсь (коркөя Сталинград дорө), но мамө вок йылысь сөмын республикаса Паметь небөгысь аддзи дженъыдик юөр: тышкасьөма вөрөгкөд 107 гвардейскөй стрелкөвөй дивизиялөн 348-өд полкын. Ефрейтор. Усьөма Австрияын, дзик война помас, 1945 вося апрель 26 лунө. А сэсся кыв ни джын... Помнита, гортсаяс меным челядьдырйи на висьтавлісны: Ольөксан чожд пө ылі Австрияын куйлө. Но кутшөм кар-сикт дорын ловсө пуктөма, кытчө дзөбөма коми зонмөс — некод нинөм эз төд. Юрын уна юалөм бергаліс да, та понда и босьтчи корсьны-туявны мамө воклысь войनावывса туйсө. Отсалис Сергей пийө. Сийө компьютерөн ноксьө да вөзйис пыравны Россияса оборона министерстволөн өтуввезйын сайтө. Гашкө пө, сәні мыйкө эм Ольөксан Гуляев йылысь да. Война кадся уна документъыс пө өні киритөмаөсь «гуся» пассө. И недыр мысти миянлы мойвиис. Öтуввезйысь пийөлы сюрөма некымын колана кабала...

Со на пиысь өти. Кабалаас Австриялөн карта, стөчджыка кө шуны, петкөдлөма-индөма страналысь сийө юкөнсө, көні тышкасис немечьяслы паныд 107-өд дивизиялөн 348-өд стрелкөвөй полк, сәки ставныс найө пырисны 3-өд Украинскөй фронтө. Апрель 13 лунө миян часьтъяс босьтисны Вена да вочасөн мунисны водзө. Венасө мездысьяс лыдас вөліны и 348-өд полкса салдатъяс. Полкыс сэсся кежис шуйгавыв, Альпы гөраяслань. Лиленфельд да Хайнфельд ичөтик каръяс дорын, векнъыдик Визенбах ю бокын и пансисны немечьяскөд вир кисьтана косьяс. И мунисны найө дзик война помөдзыс...

Киын кута мөд кабала. Öні абу нин гуся. Сәні и пасйөма Ольөксан чожд йылысь. Нимсө сета рочөн, сідзи, кызди уна во сайын вөлөма: *«Именной список №59 безвозвратных потерь личного состава 348 гвардейского стрелкового полка 107 Первой майской стрелковой гвардейской дивизии за период с 20 ап-*

реля по 29 апреля 1945 года». 246 лыдпас улын гижёма: «Гуляев Александр Дмитриевич, гвардии ефрейтор, связист, член ВЛКСМ, 1926 года рождения, Коми АССР, Усть-Куломский район, с. Деревянск, призван Усть-Куломским РВК, убит 26.04.45., похоронен на высоте 782 в 2-х км. от населённого пункта юго-вост. Хайнфельд, отец Гуляев Дмитрий Васильевич». И со мый содтёд чуймөдiс менö. Усьöмаяслысь овъяссö лыддигөн казялi: Гуляев А.Д. бöрын, 247 лыдпас улын, индöма Коми муысь нöшта öти мортöс. Тайö Павел Разумникович Елькин, связист жö, комсомолеч, чужлöма Сыктывдiн районса Сёська сиктын 1926 воын, чожкöд öтшöтшгья. Уджавлöма Будённый нима татчöс колхозын. Мамыс Елькина Людмила Григорьевна. Сёськаса зон усьöма Гуляев Öльöксан моз жö 1945 вося апрель 26 лунö. Кыкнанныслы вöлöма сöмын на дас öкмыс арöс...

Коймöд кабаалаас индöма, кытчö дзёбöмаöсь коми зонгьясöс. Бара жö нимсö вайöда рочöн. Сiдзи, кызди гижлöмаöсь 1945 вося апрельнас: «Схема расположения могил военнослужащих 348 ГСП в районе высоты 782». Документыслөн шуйгаладор юкöнас нель пельöса серпас. Синмад шыбитчö ичöтик юлөн сунис кодь визыс. Пасйöма: «река Визенбах». Орччөн тыдалö 782-öд мыльк. Визенбах ю дорас крест сяма пасгьяс (гöгöрвоана, мый гуяс): 1, 2, 3... Лыддьöдлöма и усьöмаяслысь овъяссö, буретш найö куйлöны тайö куим гуас. Индöма: салдатгьясöс дзёбöмаöсь орччөн, öти бöрся мöд, лунвывсянь войвылö. Первойя гуас öкмыс морт, медводдзаяс чожой, Гуляев А.Д., сы бöрся Сёськаса Елькин П.Р., сэсся Овчаренко, Гераськин, Кузьменко, Воротнюк... Мöд гуас куйлö дас нель салдат, коймöдас көкъямыс. Ставыс комын öти морт. Унджыкыс том йöз, чужлöмаöсь 1925-1926 воясö.

Став тайö кабаласö лыддьöм бöрын ме шензгышті быдөн: со, мися, дзик война помас кымынөн на кувсьöмаöсь чужан муысь бокын. На лыдын тшöтш менам чож да Сёськаысь Павел Елькин. Зырöмаöсь вөрöгöс Австрияса Альпы гöраясöдз да танi и пуктöмаöсь юрнысö коми зонгьяс. Öти лунö усьöмаöсь чорыд тышын, öти гуын и куйлöны сы мында во нин. Кыкнанныс связист-гвардеечгьяс, кыкнанныс ефрейторгьяс. И кызди неважөн на тыдовтчис, повтöм да збой войтыр. Позьö шуны, геройяс. Та йылысь ме неуна сёрöнджык висьтала...

А Сёська сиктын чужлöм Павел Елькиныдлөн нимыс дыр на бергалiс юрын. Ёртасисны, дерт, öти батальонад служитiгөн кык коми мортыд, бура тöдiсны öта-мöдсö. Очерксö йöзöдöм мысти виччыси: гашкö, мися, кодкö шыасяс да. Гижöд вылад. Елькинлөн рöдвуж пöвстысь. И кежалас Печать керкаö. Но сэки эз сюр татшöмыс. Сiдзкö, думайта да, кадыс абу на воöма...

Аслым сэсся окота лои водзö туясыны, мыйкö выльтор тöдмавны чож йылысь, усьöмаяслысь гуяссö корсыны. Но кызди тайöс вöчны? Австрияö ветлытöг? Бур йöз висьталiсны: Сыктывкарса журналист Галина Лавриненколөн нывьёртыс, роч гижысь Светлана Ширшова, Австрияö поздысьöма, Венаын пиыскöд олöны. Ме и шыаси Галина дорö аслам шог-дойөн. Австрияын усьöм коми зонгьяс йылысь висьталi... Мися, гашкö, Светланаыд кызкö-мыйкö отсалас да? Мöдыд, дерт, абу мöдöма пыксыны, корöма миянлысь став кабаласö да воём бöрас пиыскöд и ветлöмаöсь Визенбах юбокса 782 мыльк бокшаö. Кузь лунтыр корсысьöмаöсь гöра пöлöныс,

кытшпөвтөмаоь гөгөр, мылык йылөдзыс кавшасьлөмаоь. Но документъасын индөм гуястө абу аддзөмаоь. Некутшөм пас ни памятник пө сәні, тшем вөр нин та дыра каднад быдмөма, пөрөм пуяс туплясьоны, гырысь изъяс да... Светлана шогпырысь сәсся юөртис миянлы (сетам рочөн): *«...Скорее всего, мы находились на том самом месте, где были захоронения, или в диаметре десятков метров от них. Мы добросовестно облазили тот кусок леса-горы, где, предположительно, были похоронены ребята, но ничего не смогли найти. Не исключено, что их останки вывезли и похоронили в другом месте...»*

А места там красивейшие, природа очень пышная, сложно даже представить, что здесь когда-то погибали наши солдаты...»

Та вылын быттьө и орины-помасисны миян корсьысьөмгъяс. Но виччысьтөг войнаыд восьтис ассьыс нөшта өти гусятор. И тайө гусяторйыс бара жө вөлі йитчөма Өльөксан чожекөд да Сёськаса Павел Елькинкөд.

Неважөн уджъөрт вөзйис меным: пырав пө оборона министерствоөн өтувзейын лөсьөдөм «Подвиг народа» сайтө. Сәні война кадө орден-медальөн пасйылөм салдатъяс йылысь уна юөр чукөртөма. Гашкө, мыйкө сюрас тэныд да...

Сө збыль, ылі войнаыд дыр на кутас шензьөдны миянөс. Шензьөдис-чуймөдис сийө и менө. Кымынөдысь нин. Пыри индөм сайтад да курыд ёкмыль горшө тасасис: чожлы награда сетан кабала сюри. Дзик сийө: Гуляев А.Д., чужлөма 1926 воын, коми, гвардияса ефрейтор, 348-өд полкысь мөдөд батальонса телефонист, тышкасьө вөрөгкөд 1943 восянь, армияө босьтлөмаоь Кулөмдинса райвоенкомат пыр. Награда сетан листас гижөма (йёзөдам кызди эм): *«В боях за город Вена 10.04.1945 года тов. Гуляев будучи телефонистом обеспечил четвертую роту телефонной связью несмотря на ожесточённый огонь пулемётов и снайперов противника. Проверая телефонную линию, наскочил на засаду врага и огнём своего личного оружия уничтожил 6 солдат противника. За проявленное мужество и отвагу гвардии ефрейтор Гуляев А.Д. достоин правительственной награды ордена Славы третьей степени»*. Кабаласө кырымалөма 1945 вося апрель 15 лунө 348-өд полкса командир, гвардияса подполковник Г.Е.Кащук. Татшөм жө награда сетан кабала Г.Е. Кащук дасьтөма и Павел Елькин вылө. Чожлөн ёртыс абу жө кольччөма мукөдысь, бырөдөма вель уна немечөс. Тыдалө, чорыд кось мунөма Вена вөсна апрель 10 лунас. А муртса сёрөнджык, апрель 23 лунө, 107-өд дивизияса командир генерал-майор М.А.Богданов аслас приказөн сетө орден-медальяс Вена мездысьяслы. Коймөд степеня Слава орденъяс вичмөны мукөдкөд тшөтш А.Д. Гуляевлы да П.Р.Елькинлы. Но эз мойви кык коми зонлы пысавны морөсаныс ыджыд наградасө: куим лун мысти Альпы гөраяс дорын налысь ловсө апыштис пезж войналөн адгорш би...

Выль кабалаястө аддзөм бөрын весь овны эг нин вермы. Шуи кайлыны Сёськаө, корсьлыны Павел Елькинлысь рөдвужсө. Отсалис меным татчөс олысь, пөсь сьөлөма морт М.В.Кузьчуктомова. Весиг карөдз лэччылөма, медым корсьлыны Павеллысь Юля чойсө. Мария Васильевна коркө уджавлөма Сёськаас сельсөветса предөн, дыр веськөдлөма ветеран котырөн. Унатор на помнитө, көть арлыда

нин. Сійö и висьталіс меным, мый Елькинъяс овлöмаöсь Вичкодор грездын, лэптылöмаöсь сэнi ыджыд да кыпыд керка. Павеллөн вöлöма нель чой: Елена, Надежда, Нина да медся ичöтыс Юля. Батыс, Разумник Дмитриевич, мунöма гражданскöй да финскöй войнаяс пыр, но бөръя тыш вылас арлыд сертияс абу нин босьтлöмаöсь. Зэв бур да шоныд гын сапöг сёськасалы гындылöма. Вöйлöма 1942 воын чери кыйигөн. Мамыс, Людмила Григорьевна, нэмсö колхозын, видз-му бердын мырсöма. И пыр виччысöма öтка пи-сö война вылысь. Кувсьылöма 1967 воын.

Павел Елькинлөн нель чой пöвстысь талун сöмын öти ловъя, медичöтыс, Юлия Разумниковна. Олö Сыктывкарын, 85 арöс регыд тырö. М.В.Кузьчуткомоваыд туйдöдiс да, ме волi Павел Елькинлөн чой ордö. Со мый сійö висьталіс ас вок йывсьыс:

— Ме нэм чöж бур кывйөн казтыла Павелöс. Помнита, сійö пыр видзліс менö кодöнкö дзерöдöмысь, зэв тöждысис медзöля чой вöснаыд. Лыддьыліс кывбуръяс, кинотö сиктад ваясны да, киноö аскöдыс босьтылывліс. Уна бурторйö менö велöдiс. Мыйкö дыра уджаліс Будённый нима колхозын. Сэсся война вылö босьтiсны. Колльöдiс Павелöс мам öтнас. «Бородино» пароходөн Сыктывкарö лэччисны. Менö керка видзны мам нарадитіс. Му-көд чойыс сэки гортын эз нин овны. Коді карын уджаліс, коді Вильгортö лэччис... Ырзöмөн, кыз синваён бөрдi, вокыд жалъ да. Быттö бөръяысь аддза Павелöс. Сидзи тай и лои...

Юлия Разумниковна сутш чöв олыштiс, быттö бергöдчыліс сійö ылі кадас, да водзö нуöдiс сёрни визьсö:

— Гортö, дерт, вок гижыштавліс фронт вывсянныд. Весиг карточка на мөдöдліс, автомата сулалö. Но письмөясыс дыр каднад вошласисны-гудыртчисны кытчöкö. Карточкаыс сöмын коли. Альбомын тонö куйлö. А май 9 лунтö бура помнита. Велöдчи ме сэки сизимöд классын. Мунім школаö, а сэнi шуöны: талун пö огö велöдчöй, война кусöма, Победа, Победа! Мунöй сельсöвет дорö, сэнi митинг лö. Йöзыс чукөрмис сьöд, быттö став сиктыс воöма. Унаён сёрнитісны митинг вылад, нимкодя-сисны, мый пеж гадöс лои нырыштöма... Коді сьылö-йöктö, гажöдчö, коді бөрдö, синвасö чышкалö... Гортö локтöм бöрын нин сельсöветсянь ли, поштасянь ли, öнi ог нин помнит, кодкö пыраліс миянö да вайис весьöпöртана юөр: «Людмила! Павелыд öд тэнад усьöма...» Мамöлы быттö сьölöмас пуртөн сатшкисны. Крапкысис джоджö да садьсö воштiс. Öдва и паляліс. Сэсся куим лун ловъя нисьö кулöма туплясис. Синва оз пет ни. Ас пытшкас вöйтчис, тыдалö. Коркö, палялыштiс да, лыддьöдлөмөн мөдiс бөрдны. Пуктас Павеллысь карточкасö пидзöс вылас, да синваыс шорөн киссьö. Кымыныськö казтыштас бур кывйөн öтка питö. А думсьыс, дерт, пыр виччысис Павелсö война вы-лысь, эскис, мый коркö сійö быть локтас чужан сиктас, Сык-тыв ю бокын сулалысь бать-мам керкаас. Но эз тай тадзи ло. Мыйта лектор вайис тайö пеж войнаыд...

Сьölөмöс чепöльтіс олöма анылөн вок йывсьыс тайö висьтыс. Павелыс дзик жö менам Öльöксан Гуляев чож кодъ вöлöма. Вежа-видзысь да пöслукман, писькöс да повтöм. Кыкнанныс Коми мулөн бур быдтасъяс. Найö и ылі Австрияын эз янöдны коми йöзöс, войналөн бөръя здукö пуктісны юрнысö Альпы гöраяс дорын.



Аделина ИГНАТОВА,
5 класс,
В.Т.Чисталёв нима
Помөсдинса школа.

Фронт вывсянь фронтö

(Мамлөн казтылөмгьясысь)

Менам пöль, Уляшев Егор Дмитриевич, чужлөма 1907 вося май 1 лунö. Война вылö мунöма 1941 вося юль тöлысьын. Первой вöлөма учебкаын, некымын тöлысь велөдöмаöсь Вөлöгда карын. Сы бöрын ыстöмаöсь Карельскöй фронт вылö, лыжнöй батальонö. Нелямн градуса декабр тöлысьö Нева ю форсируйтигөн ранитчöма кокас. *«Фашистгьяс лыйлöны Нева мөдар боксяньыс, снаряггьяс усялöны и йи вылö да жуглöны йисö,— висьтасьлис пöль,— видны да ранитöны мянлысь салдатгьясö. Коді пырö йи куд улö, коді берегас нин ранитчö да кулö. Сэни ме вошти став комиясö и война чöжыс сэсся эг кывлы ни öти коми кыв».*



Колö шуны, Невасö форсируйтöмаöсь войнас, рытсяньыс заводитöмөн. Ранитчöм бöрас пöль асылöдзыс куйлас снаряд воронкаын (шуöны тай, мөдысь сэтчö снарядыд оз нин веськав). Воласны санитаргьяс да кöртавласны ранасö, пöрччөдасны усьöм салдатгьяслысь шынельясö да пуктасны улас, мед оз кынмы. Асылöдзыс сэсся ковмас куйлыны 40 градуса кодзыд дырйи. Тыш помасьöм бöрас нин санитаргьяс нуасны лазаретö, а сэсся — госпитальö. Бурдыштас да бара мөдöдасны фронт вылö.

Öтчид пöль да нöшта кык салдат мунасны разведкаö тöдмавны фашистгьяслысь вынгьясö. Бөр локтигас нин веськаласны мина вылö. Кык салдатыслы кувмöныс лоас миналөн взорвитчöмыс, а пöльöс шыбитас метра дас сайö. Контузитчас... Госпитальысь петöм бöрын веськалас мөд часьтö, 1 Прибалтийскöй фронт вылö артиллеристөн. Вöлөма пулемётчиклөн мөд номерөн, сіджжö вөлөн кыскалөма пушкаяс.

Великие Луки кар дорысь плацдарм босьтигөн усяс фашистскöй снаряд дзик дїнас. Осколкыс веськалас вöлыслы юрас, да мөдыс пырысьтöм-пыр кувсяс. А пöльлөн бара на шуйга

кокыс ранитчас, и салдатъяс ѳдва вермасны кыскыны пѳльѳс усьѳм вѳв улысь. Бара госпиталь. Бара операцияяс. Бурдѳм бѳрас — тышѳ. Ѳні нин веськалас 2 Белорусскѳй фронт вылѳ, кодѳн веськѳдлѳма маршал Рокоссовский. Вѳлѳма уна-уна кось, но Берлинѳдз воны пѳльлы оз и удайтчы: Германияса Франк-фурт кар дорын 1945 вося апрель тѳлысьын нин зѳв чорыда ранитчас. И бара шуйга бокас. Ѳкмыс сутки садьтѳгыс куйлас. Победаыс суас пѳльѳс госпитальын. Кокыс сѳсся косьмас. Госпитальын куйлѳгѳн, 1946 вося май тѳлысьын, воас гортсянныс телеграмма, мый мамыс куланвыйын (батыс кувсьылѳма война дырйиыс нин), и пѳльѳс, дас куим тѳлысь чѳж госпитальын куйлѳм да уна операция бѳрын, лѳдзасны. Кокыс век на гипса. Гортѳдзыс сетасны колльѳдны салдатѳс.

Чужанѳнас воѳм бѳрын, сѳйѳ жѳ воас пѳль босьтчас уджавны Ярашъюбокса дзѳляник Ырым посѳлокын. Сѳсся тѳдмасыс пѳчкѳд да локтас уджавны Скѳрѳдумса колхозѳ. Пѳч война чѳжыс конюкалѳма, да и война бѳрас на вель уна во... Пѳль вѳчалѳма колхозлы додьяс, коса пуяс, куранъяс. А сѳсся пѳльѳй да пѳчѳй уна во тѳчитчѳмаѳсь колхозлы да совхозлы: пѳч бергѳдлѳма тѳчиласѳ, а пѳль косаясѳ лѳтчѳма.

Пѳльлѳн уна награда: I степеня Отечественнѳй война орден, «За отвагу» медаль, кодѳс война пыр прѳйдитѳм ѳѳз зѳв вылѳ донъялѳны. Но висьтавлыны война ѳылысь абу радейтлѳма, дай военнѳй киноястѳ абу кыскѳма видзѳднысѳ, вывтѳ пѳ уна стракѳ аддзывлѳм да...

Томдырйиыс пѳль зѳв бура ѳѳктывлѳма, сьывлѳма да гудѳкасьлѳма. Весиг корѳны вѳлѳм Сыктывкарѳ артистѳн, сьывны... Война бѳрас медся ѳна радейтлѳма «Прощай, любимый город!» сьыланкыв, кодѳс сьывлѳма праздникъяс дырйи, ас коддьѳмыскѳд пызан сайын пукалѳгѳн. Век шулѳма: «*Менам томдырйи зѳв ѳн здоровьѳй вѳлі, быд пывсьѳм бѳрын, тѳвнас, юкмѳсын вѳлі купайтча*». Ёна ветлѳдлѳма вѳрѳ... Сизимдас арѳс бѳрѳдз на кыйсьѳма вѳрас да ва вылын, кѳть ѳти кокыс кос вѳлѳма. Квайтымын арѳснас керка на стрѳитѳма.

Кувсьыліс пѳльѳй 1987 вося сентябр 14 лунѳ, 80 арѳсѳн...

Снимок вылын: Уляшев Егор Дмитриевич (1980-ѳд вояс).



Содтөд жыр

ВИСЬТ

Володька кутіс нин вунөдны батысө. Кажитчис весиг, мый найө мамыскөд пыр олісны кыкөн. Но өти вөскресенньө, рытланыыс нин, батыыс виччысьтөг локтіс. Медводдза здукас Володька весиг эз төдмав сійөс.

Батыыс сөмын пырис, босьтіс Володькаөс ки вылас да лэптыштліс.

— Ого! Дзонь мужик быдмөмыд!

Сэсса судзөдіс зепсьыс машинка да сетіс Володькалы. Стен дорас нөрөвтчөмөн кызкө эскытөма видзөдіс та вылө мамыс.

А сэсса Володькаөс ыстісны ывлаө. Батыыс малыштіс сійөс юрөдыс да шуис, мый налы мамыскөд колө сөрнитыштны. Сөрнитісны дыр. Бөръяпомыс корисны Володькаөс.

— Володя,— чорыдакодь заводитіс мамыс, но гөлөсыс мыйлакө кутіс тіравны.— Володя... өні тэ батыыдкөд... лэбзян сы дорө гөститны.

— Самолөтөн?!— нимкодъысла Володька весиг чеччыштіс.— Ура! Муна өртгъяслы висьтала.

Недыр мысти югъялысь чужөма пырис бөр. Мамыс чукөртіс ыджыд сумкаө сылысь көлуй-паськөмсө, сетіс киас портфельсө.

— Школаө мунтөдз мөй ог лок?— чуймис Володька.

— Төлысь-мөд велөдчыштан сэні,— ышловзис мамыс.

Дерт, сьөкыд вөлі лэдзны писө. Но зонка та йылысь эз мөвпав. Сійө өдйөджык нин көсйис пуксьыны самолөтө, некор на өд эз лэбавлы.

Володька тэрыба чупнитіс мамсө бан бокас, лөсьөдчис нин петны, но мөдыс өна топөдіс сійөс ас дорас да дыр эз лэдз. Володька лэптіс юрсө, да казяліс мам бандзибъясысь тюрысь синва.

Батя-пия мөдөдчисны.

— Володька,— автобусас нин шуис батыыс,— өні тэ, вокө, пыр кутан мекөд овны.

— Кыдзи? Ог мөй гөститны мун?— Володька весиг дугдіс видзөдны өшиняс.

— Он. Пыр кежлө... И ставныслы сідзи висьтав, сөрнитчим?

— Кодлы ставныслы?

— Но...— нурбыльтіс батыыс.— Юасьны кө кутасны.

— А мамө нө кызди?— Володька муртса эз бөрддзы, казытыштіс мамыслысь шөг чужөмсө да. Тыдалө, мамыс ставсө төдіс да сійөн и бөрдіс.

— Гөгөрвоан, вокө,— батыыс гыжйыштіс тшөкасө,— тэ өд и менам пи, сідз? Мамыдкөд олыштін, өні кутан овны мекөд.

— А өтлаын ставнымлы оз позь?

— Оз,— батыыс видзөдліс часі вылас.

— А мамө кутас миянө воыны?

— Дерт.

— А сэссия ме бара дыр кута овны мамөкөд?

— Видзөдлам. Гашкө...

«Но, либө.— думыштіс Володька.— Дерт, батыслы тшөтш пөди окота пиыскөд олыштны. ТерпITYшта».

Батыслөн карыс вөлі неыджыд. Медводз, мый шыбитчис Володькалы синмас — уна пожом да стрөйтчан кранъяс. Найө быттьө ордайысисны өта-мөдыскөд джуджтанас. Нөшта вөлі уна джынвийө кыпөдөм керка. Öти сэтшөм стрөйба водзын батыс сувтіс

— Тані лоас миян патераным. Сөмын эн вунөд: кутасны кө юасьны, тэ тані пыр кешлө.

Батыс висьталіс тайөс лөня, корөмөн. Володькалы весиг эз ло лөсьыд. Сійө пыр өнджыка гөгөрвоис, мый овны көсйө сөмын мамыскөд, но и батыслы өткажитны эз вөв лөсьыд.

— Ладнө,— нурбыльтіс Володька.— А өні ми көні кутам овны?

— Общежитиен.

Тайө неыджыд карас ставныс быттьө вөліны өта-мөдыскөд төдсаөсь. Либө ставныс төдісны сылысь батысө. То өти, то мөд сувтлісны, киасьлісны ськөд да довкйөдлісны Володька вылө.

— Пиыд ли мый?

— Пи,— ошйысьөмөн вочавидзліс батыс.— Мекөд кутас овны.

Локтісны общежитиен. Но сэні Володькаөс виччысис нөшта өти лөк юөр: вөлөмакө, батыслөн эм гөтыр, тэтя Люба. Сійө копыртчис, окыштіс Володькаөс юрас.

— Пөрччысь, прөйдит,— шуис батыс.— Öні тайө тэнад керка. Кыдзи шулөны, в тесноте, да не в обиде, сідз өд?

— А мамө кор локтас?

— Гажтөмтчин нин?— серөктіс батыс.— Эк тэ!

Володька ышловзис, гөгөртіс синнас дзескыд жырсө: диван, пызан, шкап. А сійө нө көні кутас узыны?! Гортас сьлөн торъя жыр вөлі. Володька уськөдіс төд вылас ассьыс лөсьыдик пельөс-сө, мамсө и бөрддзис...

Водтөдісны Володькаөс раскладушка вылө дивана-пызана костас. Сійө дыр эз вермы унмовсьны, бергаліс, дзуртіс раскладушканас.

— Володя,— меліа шыасис тэтя Люба,— эн бергав, ми узыны огө вермө.

Володька быттьө кынмис да вөрзьөдчытөг, лөсьыдтөма и унмовсис.

Верстьөяс мунлісны удж вылас водз. Раскладушкаыс мешайтчис, и Володькалы быть вөлі чеччыны накөд өтлаын. Батыс, асывъяснас раскладушкасө уберитіг и рытъяснас бөр лөсьөдіг, пыр скөраліс.

Велөдчытөдз колис кык вежон. Володькалы босьтісны прока-тысь велосипед, и сійө лунтыр шувкъяліс карса уличьясті. Öд-йө өртасис общежитиеса зонъяскөд. Весиг школаас сэссия төд-масьны эз ковмы: мөдөд классас вөлі дас вит велөдчысь, и ставныс — суседьяс.

Мөдөдчисны өта-мөдсьыс торъявтөм велөдчан лунъяс. Урокъяс бөрас Володька кольччывліс продлөнка вылө и гортас муніс батыскөд да тэтя Любакөд. Удж вылас найө өна мудзлісны да

Володькалысь тетрадьяссө некор эз и видзөддыны. Өтчүд батыс ветліс жө школаас бать-мамлөн чукөртчылөм вылө да висьталіс гортас, мый Володька йылысь ни омольсө, ни бурсө нинөм эз шуны. А кор помасис четверть, тыдовтчис, мый Володькалөн — ставыс «три».

— А мамыд висьтавліс, мый первой классө тэ бура пома-
лін,— дөзмөмөн шуис батыс дневниксө видзөдлөм бөрын.—
Кыз нө сідз, а, вокө?

Володька лэдзис юрсө, сійө и ачыс эз төд, мыйла тадзи арт-
мис.

Гортас уна сёрнитісны вьль патера йывсьыс: мый медводз
нбөбасны, кытчө сувтөдасны. Сьомсө чукөртісны важөн нин.
Шойччан лунъясө ветывлісны видзөддыны керкасө да быд лок-
төмөн казясісны кутшөмкө вежсьөмъяс. Со стеклө нин тэчөмаөсь
өшиньясас, со и мыськалөмаөсь нин, а век на оз овмөдны.

— Асьным мучитчам, зонсө мучитам,— броткис батыс.—
Кор тайө помасяс?

Володька, эз кө гуляйт, пукаліс диван вылын да лыддысис —
батыс босьталіс книгагяссө библиотекаысь. Зонка кусыньталіс
коксө, мед прөст местаыс вөлі унджык, но и сідзи мешайтчис
төтя Любалы.

— Володенька,— меліа шыасьліс сійө,— гашкө, петан да ко-
ридорас ёртъясыдкөд ворсыштан.

Володька, дерт, петавліс.

Сійө тшөкыда гижліс мамыслы письмөяс, корис сійөс гөститны.
Но гижөмыс сетчис сьөкыда: артмыліс няйта, өшыбкаяса, вужынь-
вежыня. Батыс шуліс, мый татшөм письмөяссө ыставны яндзим
да шыбитліс найөс. Володька өна гажтөмтчис, но батыскөд эз
вензы да гижөмсьыс дугөдчис.

Мамыс сылы эз жө гиж. Письмөяс волісны батыслы. Сійө
лыддыліс да висьтавліс мамсянныс чолөм. Сөмын Вьль во кеж-
лө Володькалы воис открытка. Помас вөлі гижөма: «Пөся окала
тэнө, менам көчиль». Володька дзєбис открыткясө портфеляс
да тшөкыда сэсся видзөдіс сы вылө. Сэні вөлі серпасалөма ош-
пи: сійө нуис вөрысь ичөтик коз да куньтыраліс Володькалы,
эн пө шогсьы!

Со и локтіс дыр виччысяна луныс, кор позис вуджны вьль
патераас. Велөдчыны Володька эз мун: отсаліс кыскавны быдся-
ма тубрасъяс, книгагяс, нуис асьыс раскладушкясө. Төтя Люба
өшлис важөн нин дасьтылөм занавесъяс. Патераыс лои лөсьыд,
гажа, мамыслөн кодь.

Володька күйліс раскладушка вылын торъя жырйын и төж-
дысьтөм мөвпгяс надзөник шымыртісны сійөс: өні кө сылөн эм
аслас жыр, ёртгясыс вермасны воывлыны сы дорө гөститны.
А гашкө, и мамыс локтас да кутас накөд овны.

Дөвөльной Володька вуграліс нин, кор жыръяс лөня пырис
батыс. Сійө пуксьыштіс раскладушка пельөсас, мөдыс лөгпы-
рысь дзуртыштіс.

— Он на узь?

— Ог,— унзільсө вөтліг бергөддыштіс юрнас Володька.

— Мамсьыд гажтөмтчин?— друг юаліс батыс.

Володька чуймис: батыс медводдзаысь паніс мам йывсьыс
сёрни.

— Гажтöмтчи... Ёна.
— Лэбзям аски сы дорö?
— Лэбзям...— ёнджыка и ёнджыка чуймис Володька.
— Эн дöзмы, Вовка,— падъялöмönмоз шуис батыс.— Ме эг сетлы тэныд мамсяныд письмöяссö... Сидзи вöли колö, гөгөрвоан?

Володька нинöм эз гөгөрво да куйлис ланьтöмön. Чöv олыштис и батыс. Сэссия мыжаа, сьöкыда висьталис водзö:

— Гөгөрвоан, вокö..., колö вöли, мед ставныс эскисны, мый тэ кутан пыр овны мянкöд... Мöд ног мянлы тётя Любаыдкöд сетисны сöмын öти жыръя патера... А öни век жö содтöд жыр эм... Тэ отсöгön, гөгөрвоан?

— А талун самолётъясыс оз нин лэбавны?— юалис Володька.

— Виччысышт аскиöдз,— кокныда лолыштис батыс да петис.

Аскинас Володька вöли мам ордас нин. Сийö шудаа гөгöртис вунöдчыны нин кутöм жырсö и öдзöс костöдыс друг казялис, кыдзи мамыс сетö батыслы кутшöмкö сьöм.

Тайö вöли алимент, кодi волис мамыслы, кор Володька олис бать ордас.

Батыс тэрмасьтöг лыддис сьöмсö.

— Бур. Ставыс... Шуан, он босьтышт... Но, он кө и он.

Восьтис öдзöссö и мунис.

Комиöгис Иван Кичигин.



ПЫДДИ ПУКТАНА АВТОРЪЯС!

Редакцияö гижöдъяснытö ыстигön быть колö юöртны:

1. Ассыныд ним, вич, ов; кор да көни чужлöмныд (луң, төлысь, во).
2. Паспорт юöрьяс: номер, серия, кор да көни сетисны, гортса адрес (прописка серти).
3. Индивидуальной налогöвöй номер — ИНН (коддön эм).
4. Страховöй свидетельство номер.
5. Банкын счёт реквизитъяс.

Тайöс юöрттöг редакция гонорар оз вешты.

*Журналын йöзöдтöм гижöдъяс
редакция оз рецензируют и авторыслы найöс оз мöдöд.
Редакция оз век во öти кывйö авторъяскöд.*

Компьютерный набор — **Н.Кузнецова.**

Учредители: Администрация Главы Республики Коми,
«Союз писателей Республики Коми» — региональное отделение общероссийской
общественной организации «Союз писателей России».

Издатель: АУ РК «Издательский дом Коми». Директор Плетцер Е.В.
Адрес издателя: 167982. ГСП-2, г. Сыктывкар, ул. Карла Маркса, д. 229, Дом печати.

Адрес редакции: 167982. ГСП-2, г. Сыктывкар, ул. Карла Маркса, д. 229, Дом печати.
Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

E-mail: kodzuv@mail.ru; Сайт: www.komimu.com

Подписано к печати 13.06.2018. Дата выхода в свет 28.06.2018. Формат 70x108¹/₁₆. Печать офсетная. Усл. печ. л. 7; усл. кр.-отг. 8,4; учётно-изд. л. 7,54. Тираж 452. Заказ № 184747. Регистр. ПИ № ТУ11 - 00347 от 24.03.2017 г. выдано Управлением Федеральной службы по надзору в сфере связи, информационных технологий и массовых коммуникаций по Республике Коми. Публикация материалов на социально значимые темы осуществляется за счет субсидии, предоставленной Администрацией Главы Республики Коми из республиканского бюджета Республики Коми. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.

Эжва нөрысöй

Кывъясыс А.Ваневлөн

Шыладыс А.Горчаковлөн

Кышыда

1. Вой-на ып - ни-тан лунь - я-сö кыв - тис Эж-ва
ю ку-зя юсь-па - ро - ход. Сьы-лис ы - шö-дан, збой сьы-лан-
кывь - яс шы-рöм юр-си-а нюмсе - ра морт: "Эж - ва
нö - ры-сöй, Слö - бö-да ке-рö-сöй, Ко - ми му - а - нöй дай
лöз - пар-ма - вөр, став-ным ми ры-тыв-ыв-ла-нбö тэр-ма-сям.
Вö - рö-гöс вöт-лам дай бер - гöд-чам бөр."
2. Пов-том А--а (юкализ) У - сьöм зонь-я - сös сьö-лöм-сянь казыты-лö Слö-бö-да
места - б кы - па - лöм кар.

